



VIII GOVERNO CONSTITUCIONAL

PROGRAMA

VIII GOVERNU KONSTITUSIONAL

Aprovadu iha Konselhu Ministrus

Díli, 20 Julhu 2018

ÍNDICE

PREÂMBULU	6
1. MUDANSA BA PROGRESU NO BEM-ESTAR	6
1.1 Vizaun Jerál	9
1.2 Senáriu Atual	11
2. KONTINUA HO DEZENVOLVIMENTU KAPITÁL SOSIÁL	14
2.1 Edukasaun ho Formasaun	14
2.1.1 Ensinu Pré-eskolar	17
2.1.2 Ensinu Báziku	17
2.1.3 Ensinu Sekundáriu Jeral no Tékniku Vokasional	18
2.1.4 Ensinu Rekorrente	19
2.1.5 Reforsu ba Koezaun Sosial Liuhosi Edukasaun	19
2.1.6 Jestaun No Kualidade Ensinu	20
2.1.7 Ensinu Superior	21
2.1.8 Fundu Dezenvolvimentu Kapital Umanu	23
2.2 Saúde	23
2.2.1 Objetivus jerais área saúde nian	24
2.2.2 Prestasaun Servisu Saúde Primária	25
2.2.3 Prestasaun Servisu Saúde Ospitalár	26
2.2.4 Infraestruturas Iha Setór Saúde	27
2.2.5 Jestaun ho distribuisaun Medikamentus no Ekipamentu Médiku	27
2.2.6 Emerjências médicas	28
2.2.7 Jestaun ho Administrasaun Setór Saúde	28
2.2.8 Rekursus Umanus	29

2.3	Inkluziun Sosiál, Protesaun Sosiál no Solidariedade	29
2.3.1	Kombatentes Libertasaun Nasionál	30
2.3.2	Feto	32
2.3.3	Labarik	33
2.3.4	Idozus	34
2.3.5	Grupus Vulneráveis seluk	35
2.4	Kultura ho Patrimóniu	36
2.5	Juventude	38
2.6	Desportu	39
2.7	Teknolojias, Informasaun no Komunikasaun	40
2.8	Komunikasaun Sosiál	42
2.9	Relijiaun	43
2.10	Sosiedade Sívil	43
2.11	Abitasaun	44
3.	KONTINUA HO DEZENVOLVIMENTU INFRAESTRUTURAS	45
3.1	Governasaun iha Setór Infraestruturas	46
3.2	Rede Rodiviária	48
3.3	Bee mós no Saneamentu Báziku	49
3.4	Enerjia	52
3.4.1	Fornesimentu Eletrisidade	52
3.4.2	Gás Natural	53
3.4.3	Enerjia Renovável	53

3.5	Transportes	54
3.5.1	Transporte Terrestre	55
3.5.2	Transporte Marítimo	55
3.5.3	Transporte Aéreus	56
3.6	Meteorolojia	57
3.7	Telekomunikasaun	58
3.8	Servisu Postál	59
4.	KONTINUA HO DEZENVOLVIMENTU EKONOMIA	60
4.1	Agrikultura, Pekuária, Peskas no Florestas	61
4.1.1	Agrikultura	61
4.1.1.1	Kultura kona-ba Kafé	64
4.1.2	Pekuária	64
4.1.3	Peskas	66
4.1.4	Produsaun Florestal	69
4.2	Petróleu ho Rekursus Humanus	70
4.2.1	Dezenvolvimentu Baze Lojística ida iha Suai	72
4.2.2	Dezenvolvimentu Refinaria Petrolífera ida ho Kompleksu Petrokímiku	73
4.2.3	Dezenvolvimentu Fábrica Gás Naturál Likefeito	73
4.2.4	Dezenvolvimentu Zona Kosteira Sul	74
4.3	Turizmu	75
4.4	Comércio	79
4.5	Indústria	80
4.6	Setór Privadu	82

4.7	Empregu	85
4.8	Kooperativas	87
4.9	Ambiente	88
5.	KONTINUA HO KONSOLIDASAUN GOVERNATIVA	92
5.1	Política Makroekonómika	93
5.2	Setór Finanseiru	93
5.2.1	Banku Dezenvolvimentu Timor – Leste (BDTL)	94
5.2.2	Banco Nacional de Comércio de Timor-Leste (BNCTL)	95
5.2.3	Mikro no Uniaun Kréditu	95
5.2.4	Política Monetária	96
5.3	Finansas Públicas	96
5.3.1	Reforma ba Jestaun iha Finansas Públicas	96
5.3.2	Reforma Impostos no Taxas	97
5.3.3	Efisiénsia no Efikásia iha Despeza Pública	97
5.3.4	Orsamentu tuir Programas	98
5.3.5	Transparénsia no Aprovisionamentu	98
5.3.6	Empréstimu	99
5.3.7	Parserias Público-Privadas (PPPs)	99
5.3.8	Participasaun Setor Público iha Investimentu Privadu ("Participasaun Ekuitativa")	100
5.3.9	Korporasaun de Investimentos de Timor-Leste (TLIC)	100
5.3.10	Jestaun ba Fundu Petrolíferu	101
5.3.11	Jestaun ba Fundu Seguransa Sosiál no ba Fundu Veteranus	101
5.3.12	Jestaun ba Património Estadu	102

6. BOA GOVERNASAUN NO KOMBATE BA KORUPSAUN	102
6.1 Administrasaun Públika	104
6.2 Desentralizasaun	106
6.3 Administrasaun Eleitoral	107
6.4 Ordenamentu Teritóriu	108
6.5 Dezenvolvimentu Rurál	110
6.6 Rejiaun Administrativa Espesial Oe-Cusse Ambeno no Zona Espesial ba Ekonomia Sosial Merkadu	111
6.7 Governu Eletróniku	112
6.8 Justisa	113
6.8.1 Polísia Sientífika ba Investigasaun Kriminal	118
6.9 Defeza no Seguransa	119
6.9.1 Defeza	119
6.9.2 Seguransa	123
6.9.3 Servisu Migrasaun	126
6.9.4 Servisu Nasionál Intelijénsia	127
6.9.5 Autoridade Nasionál Protesaun Sivil	127
6.10 Relasaun Internasionál no Polítika Esterna	128
6.11 Delimitasaun Fronteiras Terrestres no Marítimas	130
6.11.1 Indonézia	131
6.11.2 Austrália	131
6.11.3 Dezenvolvimentu Institusionál	133
6.12 Komunidade Timor-Oan iha Estranjeiru	134

PREÂMBULO

1. MUDANSA BA PROGRESU NO BEM-ESTAR

Programa VIII Governo Konstitusional sai hanesan instrumentu polítiku ida, ba tinan lima, nebé reflete aspirasoens povo timo nian no mós fó sai medidas prioritárias ba dezvoltimentu sustentável, hanesan define ona iha ‘Planu Estratéjiku Dezenvolvimentu 2011-2030’. Ezekutivu ida ne’e, durante nia mandatu, sei kontinua kontribui ba transforma Timor-Leste, país ida nebé iha rendimentus ki’ik ba país ida ho rendimentus médios-altos, pís iha nebé populasaun moris iha seguransa nia laran no saudável, instruída no próspera.

Programa Governu nian inkorpora (katak, tau mós) roteiro (dalan) nebé Timor-Leste define tiha ona atu kumpri (ka implementa) “Ajenda 2030 ba Dezenvolvimentu Sustentável, husi Nasoens Unidas”, roteiro ida nebé dezvoltididu (ka halo) ho baze iha Planu Estratéjiku Dezenvolvimentu, hodi artikula ninia metas ho prioridades ho “Objetivus Dezenvolvimentu Sustentável (ODS)”, atu bele atinje progressus nebé konkretus ba dezvoltimentu sustentável. Ajenda Global ida ne’e iha 17 ODS, nebé buka hatán ba nesesidades emar-nian, hodi realsa katak labele iha ema ida nebé husik hela iha kotuk, atu garante futuru nebé diak liu ba timoroan sira hanesan ba mundu tomak.

Timor-Leste mós assume tiha ona kompromisu polítiku ba implementasaun Ajenda ida ne’e no Timor-Leste envolvido tebe-tebes iha inkluziun (ka atu hatama) “Objectivu 16 - Paz, Justiza no Instituisoens efikazes, responsáveis no inkluzivas, iha nível hotu-hotu”, tamba Timor-Leste hatene katak, se la iha paz, justiza no instituisoens fortes no efikazes, difísil tebe-tebes atu implementa objetivus sira seluk, nebé indispensáveis ba dezvoltimentu sustentável.

Nune’e, Aliansa Mudansa ba Progressu (AMP), husi partidus polítikus tolu, bolu ba nia an-rasik dever no responsabilidade atu kontinua:

- i) Implementa políticas públicas no reformas nebé la’o hela, nebé mós hatudu katak la’o diak, hodi mantein estabilidade no loke dalan ba dezvoltimento ekonómiku no sosial;
- ii) Promove reformas nebé estruturantes, atu aselera transformasaun ida nebé nesesária, iha setores nebé seidauk hatudu la’o ho diak populasaun sira nian;
- iii) Reforma, korrije no aperfeisoa prosesus, sistemas no metodolojia nebé difikulta (sátan netik) dezvoltimentu sustentável, iha áreas hotu-hotu, atu instituisoens tomak bele sai efikaz liu, responsáveis liu no inkluzivas liu.

Ba Estadu jovem (ka nurak) ida, ho deit tinan 16, mantém paz no promove justisa, sai nudar aspetus importantes tebes. Revê, kapasita no hadi'a instituisoens, nebé fó garantia ba kondisoens sira né, mak kontinua sai prioridade nasional, tamba se la iha paz no justisa, sei la consegue hakat-liu barreiras nebé Estadu bele sinti liu tiha ona situasaun frájl nian. Pas, justisa no instituisoens fortes mak pilares (ka ai-rin), nebé sei hamosu konfiansa no seguransa va populasaun, bele atrai investimentu no desenvolve setor ekonomiku no sosial, husi dalan nebé sustentável.

Diversifikasaun ekonómika no kriaun empregu, mak sai prioridades ba Governo oda ne'e, atu fó resposta ba dezafius nebé mai husi modernidade no atu apoia populasaun jovem nebé aumenta lalais tebes. Ita iha benefísiu tamba iha riku-soin enerjétikus, maibé ita tenki esforsa-an maka'as atu sés-an husi 'maldição dos rekursus' (ka 'malisan husi riku-soin'), hodi bele harí pontes atu hetan ligasaun nebé forte entre rekursus sira né ho progressu.

Atu hasoru dezafiu ida né, ita sei kontinua investe iha áreas fundamentais tolu: kapital sosial, desenvolvimentu infraestruturas no desenvolvimentu ekonómiku, nebé hatúr iha kuadru institucional ida nebé efikaz duni, no bele kontribui atu elimina tiha korrupsaun no burokrasia nebé todan liu, ho nune'e promove kompetensia, profissionalismu, onestidade no transparensia.

Investimentus iha kapital sosial, ho objetivu atu harí sosiedade saudável no instruída, no ho nune'e bele hatán ba nesesidades sosiais povu-nian no bele hamosu forsa-de-trabahu atu bele disponível ba desenvolvimentu País nian. Investimentus nebé aloka iha infraestruturas ho hanoín atu kontribui ba ekonomia ida ke buras, interligada no sustentável. Ami iha planu kompletu iha infraestruturas, ba konstrusaun portus, aeroportus, estradas, bé-mos no saneamentu báziku iha rai-laran tomak, nebé sei implemente ho dinâmika foun ida, iha tinan 5 mai né.

Investimentus iha desenvolvimento ekonómiku sei ajuda Timor-Leste atu kria ekonomia moderna, diversifikada no próspera, liu husi konstrusaun iha setores industriais estratéjikus, ho kbiit atu transforma. Agrikultura, peskas, pekuária no rekursus florestais mak fonte de rendimentu no ba alimentasaun, buat rua krusiais ba desenvolvimentu nebé, ho tán hadi'a no haboot empreendedorismu, sei kria oportunidades barak ba desenvolvimentu iha indústriia. Turismo prezisa tama iha prioridade investimentu, atu bele kapitaliza (fó valor) ba ninia beleza, ninia diversidade no atu aproveita lokalizasaun jeográfika País nian. Nune'e mós, investimenu atu transforma kosta-sul ba sentru petrolíferu rejional ida – projetu Tasi Mane – ne'e sai hanesan aposta ida nebé brani, nebé sei lori impaktus ekonómikus multiplikadores ba munisipius hotu-hotu to'o suku no aldeias tomak.

Parte importante iha prosesu konstrusaun Estadu no Nasaun, mak atu garante soberania total da Rai, inklui ba Tasi nebé, tuir direitu internasional, iha Timor-Leste ninia jurisdisaun (ka kontrole no uzu). Tan ne'e mak VIII Governo sei kontinua fó prioridade máxima ba negosiasoens atu hetan delimitasaun fronteiras terrestres no marítimas ho Indonésia, nune'e mós oin-sá implementa Tratadu kona-ba fronteiras marítimas entre Timor-Leste no Austrália, iha Tasi Timor, ba nebé projetu Tasi Mane iha relasaun nebé boot tebes.

Hodi haré katak Tratadu entre Timor-Leste no Australia, kona-ba delimitasaun fronteiras maritimas, temi mós estatutu juridiku ba kampu gás Greater Sunrise nian no estabelesimentu rejime espesial ba dezvoltimentu rekursus no fahe reseitas nebé sei mai, ami sei kontinua defende opsaun kadoras mai ita-nia Rain, hodi implementa vizaun husi ita-nia povu, nebé hakerek ona iha Planu Estratéjiku Dezenvolvimentu 2011-2030.

Ami iha konviksaun katak susesu da Timor-Leste, nudar Estado no nudar Nasaun, depende ba konjuntura demokratika no politika iha tinan hirak mai né, tempu nebé Estado timorense se estrutura di'ak liu tan no konsolida-an nudar Estado modernu ida, iha nebé ema hotu-hotu rekonhese primado do Direito (katak lei mak ás liu) no iha nebé iha responsabilizasaun (husu responsabilidade) no iha responsabilidade (ema ida-idak simu ninian) husi forsas vivas (komponentes, sosial, politika, ekonomika) tomak iha sociedade laran.

Só liu husi konsolidasaun Unidade Nasional, Paz no Democrasia, mak iha possibilidade atu atua ho forma konsertada atu reduz ki'ak no mukt iha País laran, diminui dezigualdades nebé iha no asimetrias (diferensas) rejionais, hodi reforsa soberania nasional. Nune'e, Governo sei husu instituisoens públicas hotu-hotu no atores sociais nacionais atu partisipa iha prosesu ida ne'e, hodi bele konsilia (tau hamunutuk) vizaun kona-ba dezvoltimentu nebé hotu-hotu iha laran, tuir rekizitus (ka normas) konstitusionais.

Nune'e, VIII Governu Konstitusional kompromete atu elabora Planu Estratéjiku Dezenvolvimentu II, ho konsulta permanente ho Sociedade Sivil, atu atualiza plano nebé hala'o hela no hodi reflete estadu atual Nasaun nian no mudansas nebé mosu hela iha ita-nia Rai laran no iha Mundu, nune'e mós atu hatudu vantajens kompetitivas Nasaun nian, iha dezvoltimentu setores estratéjikus nebé temi tiha ona, tamba setores sira ne'e mak sei lori ba progresu nebé efetivu.

Programa Governo nian, ba legislatura 2018-2023, nebé apresenta daudauk ba Distintus Deputados iha Parlamentu Nasional, sintetiza (tau hamutuk) politikas publikas nebé importantes atu hala'o, hodi reforsa no otimiza setores governasaun no setor rekursus nian, nune'e habadak dalan kona-ba transforma Vizaun 2030 ba realidade.

Ikus liu, dokumentu ida ne'e representa konjuntu kompromisus ba sociedade timorense, nebé hotu-hotu bele haré tuir ka fiskaliza, kompromisus ba dezvoltimentu nasional no ba progresu no bem-estar timoroan hotu-hotu, liu-husi mós partisipasaun husi timoroan hotu-hotu.

1.1 Vizaun Jeral

VIII Governo nia programa atu haktuir polítikas nebé implementa ona ho susesu, tamba objetivos no prioridades sentrais Governu nian mai ho baze kontinuasaun ba esforsus nebé hala’o tiha ona no ba progresus nebé iha daudauk kona-ba desenvolvimento ekonómiku, sosial no polítiku.

Tamba ne’e, Governu halo análise sésia ida kona-ba situasaun interna País nian – Estadu da Nasaun – atu bele buka no hetan estratéjias nebé di’ak liu atu implementa iha tinan liman oin mai.

Nune’e, importante atu lembra fali pasadu nebé resente no sintetiza ponto-de-situasaun internu iha País:

1. Núdar País nebé foin horis, prosesu difísil ‘konstrusaun Estadu’ ezije esforsu boot, hodi haré katak, bain-hira hahú, la iha esperiensa governativa, la iha instituisoens Estado-nian, la iha infraestruturas bázikas, la iha rekursus umanus no la iha rekursus finanseirus.
2. Tan ne’e, prosesu konstrusaun Estadu, iha kedas nia hahú, harí ho baze ba dependensia finanseira no institucional husi parseirus desenvolvimento no Países doadores, nebé sai hanesan dezafiu idatan ba desenvolvimento instituisoens nasionais, tamba desenvolvimento né tenki kesi-an ba padroens no regras internacionais, nebé lori husi estranjeiru, hodi forma no limita komportamentus no dudu ba konfliktus iha prosesus konstrusaun no konsolidasaun instituisoens públikas nian.
3. Krizes lubuk ida mós mosu no prezisa kedas tinan 2 atu IV Governu bele rezolve no, iha ona 2009, tinan 10 depois de referendu nebé lori mai independensia nasional, Povo timor adopta (kaer, simu) mote ‘Adeus Conflito, Bem-vindo Desenvolvimento’.
4. No, tamba mote ida né ezije desenvolvimento, maka iha 2010 no 2011 sorin balun, hala’o iha Pa’is tomak debates públikus nebé Governu promove, kona-ba potencialidades ba País nia desenvolvimento, hosi nebé rezulta (ka hetan) Planu Estratéjiku Desenvolvimento 2011-2013.
5. Ho lansamentu Plano Estratejiku Desenvolvimento, iha 2011, komesa iha ona kuadru ba longo prazu ida núdar referensia, atu kumpre vizaun ba Timor-Leste, hodi bele sai País ida ho rendimentus médiu-altus, ho populasau saudavel, instruida no iha seguransa, iha 2030. Planu né prevê abordajem ida ke engloba (kaer hamutuk) kurtu, medio no longo prazu, ho baze iha vizaun kona-ba País ida nebé iha objetivu atu hakbit no haboot-an iha bases fortes.
6. Maibé, Plano ida ne’e, aprovado iha Parlamento Nasional iha ona Setembro 2011, no só bele hahú implementa iha 2013. Ne’e tamba, iha 2012, iha primeiro semestre, iha kedas ronda rua ba eleisoens presidenciais, no, iha fali segundo semestre, mosu eleisoens legislativas no formasaun ba V Governo, ne’ebé tenki define ninia programa, prepara Plano Asaun ba 2013 no mós Orsamento Jeral Estadu ba 2013.

7. Ajenda 2030 Nasoens Unidas nian, aprovada iha 2015, rekonhese katak, se la iha paz, la iha justisa no la iha instituisoens fortes no efikazes, difísil tebe-tebes ba País ida atu implementa Objetivus sira seluk ba Dezenvolvimentu Sustentável.

8. Kompromisu ida ne'e hetan apoiu boot husi Timor-Leste, tamba VI Governu, iha Maio 2017, organiza Konferensia Global kona-ba 'Roteiro ba implementasaun Ajenda 2030 no Objetivus Dezenvolvimentu Sustentável'. Timor-Leste define klaru tiha ona nia dalan atu la'o ba Objetivus Dezenvolvimentu Sustentável no, haré mós ba kontekstu nasional, alinha objetivus sira ne'e ho Plano Estratéjiku Dezenvolvimentu 2011-2030.

9. Kaer mós ba prinsípiu transparênsia, Timor-Leste hasai medida ida, husi nebé Parseirus Dezenvolvimentu la ós deit tenki respeita sistema nebé ita estabese, maibé mós tenki, tinan-tinan, apresenta relatório kona-ba oin-sá sira uza osan nebé sira-nia Governus fó liu-husi sira. Ho nune'e, aprova tiha Polítika Jestaun kona-ba Efikasias husi Ajuda Esterna, nebé define oinsá apoiu internasional ba dezenvolvimentu bele fó mai Timor-Leste, hodi garante katak, atu hala'o apoiu ne'e, tenki alinha ho programas Governu nian no atu garante promove responsabilidade husi parte rua (doador no benifisiário), sempre ho hanoin kona-ba hetan rezultadus nebé bele hadi'a povu nia moris.

10. La ós deit husi susesus nebé ita alkansa iha paz, estabilidade no kresimentu ekonomiku, iha tempu nebé badak, maibé liu mós husi asaun nebé hala'o iha grupo g7+ no partisipasaun iha foruns internacionais oioin – hodi fahe esperiensia husi konflitu ba reziliensia no promove agenda paz iha mundu no rekonsaliasaun – Timor-Leste, iha nivel mundial, konsideradu kazu susesu ida, no ho nune'e kapitaliza ninia prezensa iha palko internasional.

11. Ho kompreensaun ida realista katak "Roma ho Pavia la halo iha um dia", ita labele husik liu atu rekonhese katak, maski la la konsegue halo buat hotuhptu atu, lalais kedas, hadi'a totalmente aspetus hotu-hotu iha Povo-nia vida, buat balun halo duni ona, nebé hatudu afirmasaun nebé dehan katak vida ekonomika povu nian hatudu onestamente sinais pozitivus.

12. Ita buka no esforsa-an atu konsolida hela ita-nia demokrasia, tinan ba trinan. Timor-Leste, konsideradu País mais demokrátiku iha Sudeste Asiátiku, tuir avaliasaun independente husi 'The Economist', kona-ba 'Índice Demokrasia'. Estudu ida ne'e publika iha 2017, hodi haré ba prosessos eleitorais, pluralismu, liberdades no garantias, partisipasaun polítika, kultura politika no funsionamentu instituisoens Timor-Leste nian.

1.2 Senáriu Atual

1. Husi dadus nebé iha, bele hare katak populasaun Timor, agora, to'o 1.268.671 abitantes, ho kresimentu annual ida 2.37% no katak 51,24% habitantes ho idade menus de 20 anos. Iha Timor-Leste, husi total ida neba, Feto to'o 49.2% , no mos 78% populasaun mak hela iha Munisipius sira seluk no la hela iha Dili, nebe iha kedas 22%.

2. Ekonomia sa'e, husi 2008 ba 2011, ho taxas medias 11% kada tinan. Iha 2016, PIB naun-petroliferu hetan valor 1.702 milhoens dolares (katak, 1 Biliaun, 702 milhoens), nebe sai hanesan kresimentu 5,3%, no PIB Per Kapita sa'e ba 1.338,00 dolares, signifika katak, iha tinan 14 nia laran, triplika husi 480,60 dolares, nebe rejista iha 2002. Maibe, tenki dehan katak 46% husi kresimentu entre 2010 ho 2015, depende liu ba asaun husi Administrasaun Publika, no 24% mak husi setor konstrusaun, nebe investimentu privado promove.

3. Resultado husi kresimentu ne'e mak redusaun pobreza iha Timor-Leste. Iha 2007 persentajem kiak to'o 50%. Persentajem ida ne'e, iha 2014, tun ba 42% ona. Maibe, karik ita uza Indikador Internacional kona-ba Pobreza (1,9 dolares amerikanus loron ida), husi nebe bele hetan ka hare pobreza extrema (ka mukit), iha 2007, Timor-Leste hetan 47% kona-ba pobreza extrema no, iha 2014, tun tiha ba 30%, no iha redusaun ida ne'e ita bele hare melhoria padroens moris nian, hanesan asessu nebe boot ba eletrisidade, qualidade iha habitasaun (ka uma) no kbit hetan osan.

4. Niveis konsumu privadu mos influensia maka'as iha kresimentu ekonomia no redusaun pobreza, no, tuir Banku Mundial, entre 2004 no 2014, familias timorenses mak sai motivador ba aumentu konsumu privadu to'o kedas 160%. Iha 2016, konsumu privadu sa'e 4,2%, ho rejistu veikulus aumenta 8% no numero ema estranjeirus mai Timor aumenta 6,6%. Nune'e ba, maski entre 2007 no 2014, iha redusaun ba kiak, dezigualdade iha konsumu la muda iha tempu nebe hanesan, konforme sai ida mak bele hare husi Indise GINI, 0,28 iha 2007 no 0,29 iha 2014. Ne'e hatudu nesiedade atu kontinua esforsus hodi reduz kiak no dezigualdades no haforte kresimentu ekonómiku jeral.

5. Konstrusaun, nudar indikador ida ba dinamika ekonomia, iha 2016, área total ba konstrusaun nebe halo okupa 92.814 m², nebe korresponde ba 46 lisensas nebe fó, ho valor osan 37.716 milhoes de dolares. Kompara ho 2008, area ba konstrusaun 40.453 m², ho lisensas 22 nebe fó, ho deit valor osan 11.319 milhoes de dolares.

6. Kona-ba akizisaun kareta rasik, iha 2016, rejista kompra (ka sosa) 19.498 veikulus, no husi total ne'e, 83,6% ba motorizadas, 9% ba lijeirus , 5,8% lijeirus atu tula karga (ka sasan) no 1.5% ba veikulus pesados (kareta boot).

7. Nudar indikator importante ba dezenvolvimentu sosial no teknolojiku populasaun nian, konsumu iha nível telekomunikasoens no Internet hatudu alterasoens boot iha kuadru atual. Nune'e, iha 2015, rejista total 3.965 subskritores ba rede fixa komunikasoens, enkuantu ba servisu móvel hetan total 827.685 subskritores. Iha nível Internet, iha 2015, rejista total de 190.444 subskritores. Ita bele harée diferença, tamba iha tinan 2012, ba servisu telefóniku fixu, rejista deit 11.700 no ba rede móvel sei iha deit 687.682 subskritores. Ba fali Internet, iha 2012, iha deit 64.733 subskritores.

8. Timor-Leste sei mosu nudar País ida menus dezvoltidu, hamutuk ho Países 46, nebé identifikadus iha Relatório Konferensia Nasoens Unidas nian kona-ba Komersio no Dezenvolvimentu, ba tinan 2017. Ho ekonomia nebé depende tebe-tebes ba politikas no programas ba despesa pública, no tamba la iha diversifikasaun nebé konsistente ba ekonomia, hodi dudu kresimentu ekonomiku ida nebé lidera husi setor privadu, mak sai nudar obstáculos ba dezenvolvimentu sustentável no ba menor dependensia ba reseitas petróleo.

9. Tuir dadus husi Estratégia Nasional Empregu 2017-2030, iha 2013, 60% populasaun timorense iha idade ativa (katak, bele servisu) maibé 31% maka integra iha forsa trabalho, nebé la ós agrikultura subsistensia. Husi sira nebé integra iha forsa trabalho, la to'o 25% mak hetan empregu formal, no sira seluk iha empregu naun-formal no nudar trabalhadores independentes (ka servisu ba an rasik).

10. Iha estimasaun katak kresimentu 18% husi populasaun ativa, entre 2013 e 2018, hasa'e numeru 630.000 ba 742.000, no haré katak, iha 2030, populasaun ekonomikamente ativa bele to'o 914.000. Nune'e mós, iha 2030, besik 37% husi populasaun ekonomikamente ativa, sei komposta husi mane no feto, ho idade menus de 25 anos, enkuantu menu 35 anos maka halo 60% husi total iha leten.

11. Crédito ba setor privadu, estagna (la la'o) tiha iha 2015 no 2016, hodi hetan rekuo ida to'o 1,8% iha 2016, mas consegue recupera fali ho aumentu 25% iha tinan 2017. Estagnasaun nebé verifika ne'e tamba crédito mal paradu (katak, kredores sira la selu), nebé consegue hadia'a fali hodi, husi 23% iha 2015, tun duni ba 15% iha primeiro trimestre 2017.

12. Indise Presus ba Konsumidor (IPC), nebé tun beibeik husi 2011, hodi atinje desvalorizasaun 1,3%, iha 2016, rejista inflasaun nebé positiva ho 0,6% iha 2017, no Banku Mundial prevê katak tendensia ida ne'e se mantein iha 2018, iha 1,5% no, iha 2019, bele atinje 2,5%.

13 Timor-Leste investe hela ninia reseitas, nebé mai husi rekursus naturais ba fundu soberanu ba rikeza, Fundu Petrolíferu, konsistente ho prinsipius transparensia no boa governasaun, tamba ne'e mak obrigadu hasai deit montantes limitadus, atu finansia prioridades estratégikas nasionais iha Orsamentu Jeral Estadu, hanesan infraestruturas, edukasaun no saúde.

14. Fundu ida ne'e, estabelecidu iha 2005, ho saldo loka nian 205 milhoens de dólares, sai nudar instrumentu id aba política fiscal nebé diak, hodi haré no sukat didiak interesses timoroan hotu nian, ba longo prazu, tamba montante nebé bele hasai, reguladu husi Rendimentu Sustentável Estimadu (RSE), nebé to'o deit 3% husi total rikeza petrolífera. Objetivu RSE nian mak atu kontrola

gastus ba rendimentus petrolíferus, nebé por enkuantu ás hela, no tahan impact husi presu mina-rai nebé volátil (ka sa'e-tun) no salvaguarda uzu sustentável iha finansas públicas.

15. Depois de prosesu rigorozu no partisipativu ida, altera duni, iha 2011, Lei Fundo Petróleo, hodi halo alokasaun to'o 50%, iha Titulos Públicos, no 50% iha mekanismu Rendimentu Fixu no to'o 5% iha mekanismus alternativus. Estratéjia diversifikasaun Fundu Petrolíferu ne'e, prova duni katak forte no positiva, hodi proporsiona retornus nebé maka'as. Tuir Banku Mundial, Fundu ne'e, nebé simu reseitas (nebé dala ruma sa'e, dala ruma tun) husi petróleo, ho retornus nebé hetan no mós ho levantamentus (osan nebé hasai, tuir orsamentu Estadu), sei konta, to'o 2018 remata, valor merkadu ho 16.922 milhoens dolares amerikanus (ka, bilioens 16, milhoens 922 dolares amerikanus).

16. Kona-ba dezvoltimentu setor petrolíferu, importante atu relembra katak, iha 2007, Timor-Leste tama iha Inisiativa da Transparencia Indústrias Extrativas (ITIE), no katak, iha deit tinan 10 Ukun-An, desenvolve keda Sistema ho klasse mundial atu jere reseitas, no sai, iha Julhu 2010, primeiro País iha Ásia-Pasífiku no terseiru iha Mundu tomak, nebé hetan estatutu katak hala'o tuir duni ITIE, iha divulgasaun no transparencia reseitas petróleo no gás.

17. Iha 2002, primeiro Orsamentu Jeral do Estadu hetam 75,6 milhoens dólares, husi ajuda internacional. Iha 2017, OGE sa'e ba 1.414,4 milhoens de dolares (ka, 1 biliaun, 414 milhoens, 400 mil dolares). Cresimentu nebé significativu (ka boot) iha despesa pública eziye ba Governu atu desenvolve sistema de jestaun id aba finansas publikas, nebé efisiente, responsável no transparente. Nune'e, hala'o mós iha Ministériu Finansas no iha ministerius seluk, reformas lubuk ida, hodi bele hetan profisionalimsu diak liu ho hadi'a jestaun no ezelesaun finanseira no prestasaun servisus.

18. Hodi bele assegura diak liu-tan jestaun ba rekursus, Governu, iha 2008, kria Autoridade Nasional Petróleo (ANP), nebé pasa, iha 2016, ba Autoridade Nasional Petróleo no Minerais (ANPM), nudar instituisaun pública responsável ba jestaun no regulasaun ba atividades petrolífera no explorasau mineira iha Timor-Leste laran, tanto iha tasi komu iha rai-laran, no iha Área Konjunta Dezenvolvimentu Petrolíferu. Atu maximiza partisipasaun Timor-Leste nian iha dezvoltimentu setor petrolíferu, Governu kria mós, iha 2011, companhia nasional petróleo, ho naran TIMOR GAP E.P. (GAP, katak: Gas and Petroleum).

19. Kriasaun Institutu Petroleu no Geolojia (IPG), iha 2012, no empreza nasional mineira Murak-Rai Timor-Leste S.A., iha 2017, atu desenvolve estudus jeolójikus no defende interesses Estadu iha atividades explorasau ba rekursus minerais iha País.

20. Ho senário nebé real kona-ba situasaun sosio-ekonomika País nian, VIII Governo Konstitusional assume, hanesan prioridade número um, mak kriasaun de empregu. Ba ne'e, Governu compromete atu kria kondisoens hotu-hotu nebé bele atu hatúr no haburas diversifikasaun ekonómika, iha áreas

produtivas, hanesan agrikultura, pekuária, peskas no turismu, para além de setor indústria. Ba ne'e, kriaun Banku Dezenvolvimentu, no sei loke-an ba investimentu estranjeiru, ho objetivu atu fó linha de krédito ba empresas internacionais, atu bele inisia (ka hahú), ho konfiansa, partisipasaun nebé ativa no efetiva iha kresimentu ekonomiku Pais nian.

21. Banku Dezenvolvimentu Nasional (BDN) sei iha mós knar boot ba iha jestaun Fundu dos Veteranus no Fundu da Seguransa Sosial atu bele garante sustentabilidade iha futuro ba Fundus ne'e, kona-ba uza didiak Fundu dos Veteranus no mós atu imprime (ka kuda metin) serteza nebé boot iha jestaun ba reformas, hodi liberta Estadu husi obrigasaun finanseira tinan-tinan.

2. Kontinua ho Dezenvolvimentu Kapitál Sosial

“Rikeza ka rikusoin Nasaun ida nian mak povu nia forsa ka kbiit rasik. Dezenvolvimentu máximu iha Saúde, Edukasaun ho kualidade moris povu timor tomak nian, ne'e esensial tebes atu bele harii metin Nasaun ida ne'ebé justa no dezvoltada”.

Dezenvolvimentu ekonómiku Timor-Leste nian hanesan objetivu nasional ida ne'ebé depende maka'as tebes ba kapasitasaun, saúde ho kualifikasaun husi nia forsa de trabalhu. Investe iha kapital umanu, ne'e hanesan estratéjia fundamental ida, hodi permite dezvoltamentu ne'ebé sustentável no mos kria kondisoens ba inklusaun ne'ebé boot liu, bein-estar ka moris di'ak no ho dignidade iha sociedade timor laran.

Sosiedade ne'ebé kulturalmente demokrátika no dezvoltada, mak ida ne'ebé la husik hela ema ida ba kotuk, hodi buka no investe maka'as iha grupus sira ne'ebé frájeis no vulneráveis liu, no asume (ka simu) papél fundamental feto, jovens ho idozus sira-nian ba dezvoltamentu sustentável, hodi rekoñese mos, la'os de'it sira-nia direitos tuir Konstituisaun, maibé hanesan iha kazu kona-ba feto-nia direitos, promove igualdade no transversalidade jéneru iha momentus polítikus, sosiais no ekonómikus País nian tomak no iha nia instituisoens hotu-hotu.

2.1 Edukasaun no Formasaun

Halakon obstáculos iha asesu ba edukasaun no asegura atu labarik no foin sa'e sira bele hetan asesu ba edukasaun ida ho kualidade, la haré ba kondisaun ekonomika no sosial no mos fatin iha ne'ebe sira horik ba, sai nudar estratéjia prioritária ba Governu. Asesu ba Edukasaun, ho kualidade, labele sai deit privilejio ba ema balun, maibé, pelu kontrariu, edukasaun presiza sai nudar instrumentu inkluzivu ida ne'ebé bele hamenus diferensas, iha oportunidades socioekonomikas, hodi promove dezvoltamentu ekuitativu iha ita-nia Nasaun.

Edukasaun sai nudar direitu fundamental ida ba sidadauns no sai instrumentu importante ba dezvoltamentu sosial no ekonomiku, nune'e mos atu kria sosiedade ida ne'ebe saudavel no prospera.

Iha tinan 2023, Timor Leste hakarak atu atinje edukasaun ida ne'ebe ho kualidade diak liu, ho oportunidade boot iha asesu ba ema hotu, hodi sai edukasaun ida ne'ebe bele hatan lols ba nesidades merkadu-de-trabahu nian, kontribui hodi hamenus dezempregu, liu husi aprendizajen iha moris tomak (*aprendizagem ao longo da vida*), no, liu-liu, atu hakotu tiha siklu visiozu husi/iha kiak interjerasional. Edukasaun ida ne'ebe atu atinji, mak sei promove aprendizajen ida ne'ebe serve hanesan baze, atu sidadauns sira bele ativu iha partisipasaun ba dezvoltamentu sustentavel, iha konsolidasaun ba Nasaun no, nune'e mos, atu sidadauns sira bele aplika sira-nia potensialidade no sira-nia kreatividade umana ne'ebe favorese ba inovasaun.

Atu atinji rezultadus ne'e, programa VIII Governu Konstitusional iha area Edukasaun, refleto (ka hatudu) programa ida koerente no integradu. Liu husi programa ida ne'e, hakarak afirma katak dalan lols atu alkansa rezultadus ne'ebe ita hein ho forma sustentavel, maka liu husi partisipasaun permanente husi comunidade edukativa no kontribuisaun ativa husi entidades oi-oin, publikas no privadas (inklui mos sosiedade sivil no sektor privadu) ho baze iha sistema kordenasaun ida ne'ebe firme. No mos, liu husi programa ida ne'e, sei promove definisaun no implementasaun ba intervensoens edukativas, nebe bazeia ba evidensias sientifikas no konkretas nune'e mos ba estudus rigurozus, ho kualidade.

Nune'e, Governu sei hadi'a kualidade Edukasaun no formasaun profisional, hodi asegura asesu ne'ebe hanesan ba populasaun timor-oan tomak, iha areas Ensinu hotu-hotu.

Ba ne'e, Governu sei:

- i) Reforma jestaun no administrasaun iha Sistema Edukativu, iha nivel Ministeriu Edukasaun, Munisipal no mos iha eskolas, inklui definisaun ba prosedimentus ne'ebe adekuadus no ba sistemas monotorizasaun no avaliasaun;
- ii) Haforsa kondisoens atu labarik sira, ho tinan entre tolu to'o lima, bele hetan asesu ba preparasaun ba ensinu baziku obrigatoriu, inklui edukasaun pre-eskolar, ne'ebe besik sira-nia hela fatin. Asegura mos, partisipasaun konkreta husi comunidade edukativa;
- iii) Haforsa (ka hametin) kondisoens ba Ensinu Baziku ne'ebe universal, obrigatoriu no gratuitu, ho kualidade ne'ebe diak duni. Ensinu Baziku sei sai nudar sentru hodi aprende atu konhese, aprende atu halo, aprende atu moris ho ema seluk no mos aprende atu forma nia a'an rasik. Iha idade ho tinan nen, labarik hotu-hotu sei hetan asesu ba Ensinu Baziku ida ho kualidade, ho akizisaun ba kompetensias nebe maka'as iha matemátika no iha literasia, iha lian (ka linguas) oficiais, ho mos kompetensia bazika iha lian ingles,

- hanesan lian estrangeiru, nune'e mos kompetênsia iha valores fundamentais husi identidade nasional, husi historia no mos husi kultura timor-nian;
- iv) Reforsa kondisoens ba Ensinu Sekundáriu ida, iha ne'ebe estudantes sira bele hetan asesu ba koñesimentus sientifikus, umanístikus no mos téknikus. Alunos sira sei aprende atu aplika koñesimentus hirak ne'e, iha sektore produtivus País-nian, hodi prepara sira atu tama ba merkadu de trabalhu ou atu kontinua sira-nia estudus superiores, universitarius ka politéknikus. Governu sei kontinua fo opsaun rua: Ensinu Sekundariu Jeral ka Ensinu Sekundariu Tekniku-Vokasional;
 - v) Asegura atu estudantes sira ne'ebé tama iha Ensinu Superior, bele prontu atu fo resposta ne'ebé los liu, iha merkadu de trabalhu, hodi asegura asesu ne'ebé hanesan ba ema hotu no haforsa mekanizmus akreditasaun nian no avaliasaun ba kualidade iha nível ensinu ida ne'e;
 - vi) Reforsa oportunidade ba hirak ne'ebe hakarak estuda no hakléan sira-nia koñesimentus, liu-liu sira ne'ebe vulneráveis liu, no sira ne'ebé hasoru dezafius boot, liu-husi programa edukativu ne'ebe atraente no flexível, bazeia ba metodolojia ne'ebé ho kualidade ba ensinu ba ema adultus;
 - vii) Moderniza no hodi assegura importansia nebé boot, iha esforsus ba formasaun profesional kontínua, hodi haforsa padroens efetividade nebé tenki diak, hanesan mentoría no akompañamentu, no uza informátika no teknolojia ba informasaun, material multimédia no aprendizajen 'à distância' (ka husi dok) atu assegura dosentes ho kualidade, preparadus atu forma futuru Timor-Leste nian;
 - viii) Kontinua dezenvolve rekursus umanus nasionais, liu husi programas, estratéjias no investmentus plurianuais. Fundu Dezenvolvimentu Kapital Umanu sei kontinua kontribui ba dezenvolvimento iha Edukasaun no Formasaun Profisional ba foin-sa'e no adultus sira, ho forma ne'ebé transparente no kordenadu, no ho baze iha identifikasaun ba áreas koñesimentu no habilidades ne'ebe sei falta liu;
 - ix) Konsolida Komisaun Nasional Edukasaun (CNE), nudar mekanizmu ba promosaun diálogu inkluzivu no partisipativu, entre partes interessadas iha sektor edukativu, no koordenaun nebé diak entre Ministeriu Edukasaun ho sosiedade sivil no setor privadu no mos ho parseirus dezenvolvimentu nasionais no internacionais;
 - x) Hakléan programa iha edukasaun inkluziva, hodi promove kultura kona-ba respeito ba diversidade, hodi rekoñese talentus oi-oin no mos kapasidades oi-oin, husi ema hotu, atu nune'e bele promove susesu ba alunos sira no, efetivamente, possibilita sira atu hetan futuru hanesan sidadauns ne'ebé hetan respeito husi comunidade tomak, no asegura edukasaun ne'ebé orienta liu ba alunu, nudar realidade loro-loron, ne'e hotu núdar prinsípiu-xave ba politika edukativa;
 - xi) konsolida lían Tetun hodi garante padraun ida ba nia uzu, no promove nia uzu iha estabelesimentu ensinu sira, iha áreas oin-oin governu nian, iha média no ba populasaun hotu.

Nune'e, Governu kompromete atu haka'as liu-tan iha implementasaun Planu Estratejiku Nasional Edukasaun (2011-2030), atu nune'e bele alkansa metas hirak tuir mai, iha tinan lima oin mai:

2.1.1 Ensinu Pré-Eskolar

- Pelu menus 50% husi labarik, ho tinan entre 3 to 5, sei benefisia ba Edukasaun Pré-Eskolar ka programa preparasaun ba Ensinu Báziku obrigatóriu, ho atensaun espesial ba comunidades rurais;
- Implementa ho kompletu, Kurrikulu Nasional de Baze no programas ba orientasaun pedagójika, relasiona ho edukasaun pré-eskolar;
- Define sistema administrasaun no jestaun ba estabesimentus pré-eskolares, adekuaudu ba realidade nasional, ne'ebé bele asegura efetividade iha prosesu ensino-aprendizajen no maximiza rekursus humanus no finanseirus, hodi loke liu-tan asesu ba pré-eskolas no ba insentivus finaseirus publikus;
- Assegura konstrusaun ka rehabilitasaun, iha minimu, facilidades 100, hodi uza ba edukasaun pre-eskolar, nebé kompletas ho rekursus umanus, ekipamentus no material didátiku.

2.1.2 Ensinu Báziku

- Aumenta ba 95%, taxa likida iha matrikula;
- Aumenta taxa aprovasaun, iha etapa final ensin u báziku, ba pelu menus 85%;
- Hamenus rasiu husi alunu iha sala laran, ba média nasional, profesor 1 ba alunu 35, liu-husi konstrusaun, pelu menus, salas foun 1.050;
- Asegura iha mínimu, aumentu ba 30% ba kapasidade literasia alunu sira, iha 2º anu eskolar besik atu hotu, nebé sei sukat ho baze husi avaliasaun, tuir padraun internasional;
- Asegura katak 100% Eskolas Bazikas Sentrais Públicas sei hetan instalasaun bé no saneamentu, no bibliotekas ho kondisoens atu uza, no mos aumenta ba 50% número eskolas ne'ebé hetan ona asesu ba facilidades laboratóriu nian;
- Kria fundu infraestruturas ida, atu fo resposta ba situasoens emerjensia, ne'ebe bele tau-em-risku seguransa no saúde alunu no profesores sira nian;
- Implementa, ho kompletu, Kurrikulu Nasional de Baze, ne'ebe hetan ona aprovasaun iha tinan 2015, no ninia programas ba orientasaun pedagójika;
- Dezenvolve no implementa medidas pedagójikas, ne'ebe adekuadas, hodi asegura ensin ida ho qualidade, iha áreas rurais;
- Halo revizaun ba Kurrikulu Nasional ba 3º siklu do Ensinu Baziku, hodi aprova lejislasaun relevante no orientasoens pedagójikas nebé presiza;

- Konsolida atividades ne'ebé hariku kuríkulu, inklui programa “*Horta Pedagógica*”, no kria programas foun ne'ebe estimula kompetensias kulturalis, artistikas no desportivas, iha eskolas tomak iha ensinu báziku;
- Garante atu alunos no Profesores sira tomak bele iha asesu ba livrus no materiais eskolares, ne'ebé relevantes no ho qualidade, hodi promove mos uzu ba Teknolojia husi Informasaun no Komunikaun (TIC);
- Hamosu programas televisivus lubuk ida no vídeus, hodi apoia prosesu ensinu-aprendizajen;
- Define no implementa programas de excelênsia, liu-husi prosesu partilha (ka fahe ba malu) padroens-modelu atu potencializa asesu ba práttikas ho qualidade iha estabelesimentus eskolares publikus, ne'ebé prezisa liu, liu-husi utiliza Centro de Aprendizagem e Formação Escolar (CAFE), hanesan dalan ida;
- Aprofunda jestaun demokrátika iha eskolas, liu-husi medidas ne'ebé haforsa partisipasaun inan-aman no alunos sira.
- Reforsa implementasaun konteúdu kuríkulu nian iha matéria formasaun kona-ba valores síviku sira, igualdade jéneru no respeito diversidade.

2.1.3 Ensину Sekundariu Jeral no Tekniku Vokasional

- Atinji to'o 85%, taxa bruta ba matrikula, hodi loke tan numeru vagas ne'ebé nesesarias, iha eskolas foun no eskolas ne'ebé iha ona;
- Konstrui ka rehabilita, iha mínimu 300 salas de aula, liu-husi programa konstrusaun no rehabilitasaun eskolas foun no sala de aulas ba Ensину Sekundariu;
- Asegura katak 100%, husi eskolas sekundarias públicas, bele hetan kondisoens tomak nebé diak no prontas atu sai hanesan fatin ida ba aprendizajen ne'ebé adekuada, ho facilidades hanesan laboratoriu no biblioteca, iha ambiente ida ne'ebe seguru no respeitozu;
- Hahú implementa medidas atu halo avaliasaun, tuir padraun internacional, atu sukat rezultadus husi aprendizajen (ex. PISA), ne'ebé serve nudar baze ba reforsu ba qualidade iha nível ensinu ida ne'e, no sai mos nudar mekanizmu hodi sukat progresu nebé iha;
- Haré hikas fali Kurrikulu Nasional ba Ensину Sekundariu Tekniku-Vokasional, atu promove adaptasaun nebé diak-liu ba padroens rejionais no internacionais ba ensinu, no asegura adkire (ka hetan) kompetênsias pratikas no ba laboratoriu, kompetênsias kulturalis, artistikas no desportivas, habilidades ba moris no kompetênsias transversais ba empreendedorismu;
- Haré hikas fali Kurrikulu Nasional ba Ensину Sekundariu Tekniku-Vokasional, atu promove ajustamentu diak-liu ba nesesidades husi merkadu, hanesan: agrikultura, industria, mekanika, eletrônica, konstrusaun sivil, no prestasaun servisu nebé vokasionadus (ka halai) ba artes, empresas, turizmu no restaurasaun, ho foku ba desenvolvimentu iha áreas rurais;
- Asegura asesu Professores sira-nian ba materiais pedagójikus, ne'ebé bele apoia implemntasaun ba kurrikulu;

- Garante katak 100% husi Profesores, iha Ensinu Sekundariu Jeral, iha kualifikasaun minima ne'ebé lei exige, liu-husi formasaun kontínua ba Profesores iha kurríkulus no iha programas orientasaun pedagójika nian;
- Uza informátika no teknolojias komunikaun, hanesan instrumentu atu promove ensinua ida ne'ebé modernu no ho kualidade;
- Implementa programa akonselhamentu profesional ida, hodi apoia alunas sira atu hili kursus nebé sira hakarak hasai, iha Ensinu Superior;
- Promove parcerias fortes ho entidades relevantes, inklui sektor privadu, atu garante Ensinu Sekundariu nebé asesível no ho kualidade, inklui apoiu finanseiru no realizaun estájius ba alunas sira, nebé ajusta ho nesesidades merkadu nian;
- Defini no implementa programas de excelência, liu-husi prosesu partilha kona-ba padroens-modelu, atu potencializa asesu ba práttikas nebé ho kualidade, ba estabelesimentus eskolares públikus ne'ebé presiza liu;

2.1.4 Ensinu Rekorrente

- Uza metodolojias atrativas no flexíveis, hodi aumenta taxa de aprovasaun no graduaun ba programas Ensinu Rekorrente nian;
- Avalia no reforsa Sentrus Komunitarius ba Aprendizajen, hodi promove liu-liu katak Sentrus sira né hetan partisipasaun, nebé efetiva, husi sosiedade sivil no comunidade lokal, atu maximiza utilizaun Sentrus sira né ba atividades edukativas oi-oin iha comunidades nia let;
- Haforsa kualidade Ensinu Rekorrente, liu-husi asesu ba materiais didátikus ho konteúdos nebé konkretus no fásil atu kompriende.
- Habelar Programa Ekivalensia nian to'o Ensinu Sekundáriu, bazeia ba estudu viabilidade ida.

2.1.5 Reforsu ba Koezaun Sosial liuhosi Edukasaun

- Promove integrasaun ba modifikasoens físikas nebé nesesárias, iha instalasoens hotu-hotu nebé foun ba Eskolas Públikas;
- Implementa sistema edukativu ida nudar reforsu, ho formasaun kle'an liu ba Professores, hamutuk ho programa ba apoiu espesifiku iha eskolas públicas no privadas, ne'ebe oferese servisu edukativu espesializadu ida ba alunas sira ne'ebe ho necessidade educativa espesializada, ba alunas sira nebé iha nesesidades edukativas espesiais, hodi permite katak eskolas sira né bele servi populaun di'ak liu-tan;
- Assegura reforsu institucional no tekniku ba Sentrus Rekursus ba Edukasaun Inkluziva, liu-husi análise rigoroza kona-ba nesesidades;

- Promove alimentasaun nebé nutritiva ba alunas sira, inklui hadia implementasaun programa Merenda Eskolar, hodi haforsa nia jestaun no efikásia, liu-husi mekanismus kordenasaun inter-ministerial;
- Estabelese ligasaun ho Programa Saúde iha Família no ho programas relevantes seluk, hodi kordena apoiu ligadu ba saúde física no mental labarik sira, iha eskola ka iha lar (uma mahon), inklui sira ne'ebe iha problema psikolójiku, trauma no problemas saúde seluk-tan;
- Reforsa kordenasaun ho programa “*Bolsa da Mãe*”, hodi oferese mos asesu ba bolsas estudo ba alunas sira, ho nesesidades edukativas espesiais;
- Promove medidas apoiu ba labarik sira ne'ebe laiha koñesimentu lian ofisial ida, bain-hira sira integra ba sistema edukativu, liu-husi kontinuasaun programa-pilotu EMBLI to'o 6.º ano eskolar remata, hodi asegura reforsu ba formasaun espesifika kona-ba uza primeira lingua hanesan ponte aprendizajen ba lian ofisial sira;
- Dezenvolve programa atividades rekreativas no programas animasaun nian no inovasoens seluk-tan, hodi promove koñesimentu lian ofisial ba labarik sira ne'ebe ho idade kiik;
- Elabora no implementa programa espesifiku ida, atu asegura inan-foin-sa'e sira kontinua hetan asesu ba edukasaun, iha kondisoens hanesan ema seluk;
- Dezenvolve programa ne'ebe enkoraja ema ho defisiênsia atu sira partisipa iha atividades profissionais, ne'ebe iha relevânsia boot ba desenvolvimentu nasional, inklui mos hanesan Profesores;
- Hahú implementa programa transporte eskolar, ho métodos nebé adekuadus ba realidade nasional no partisipasaun ativa husi comunidade educativa;
- Aumenta persentajen Dosentes Feto no ba ba kargus Diresaun no Xefia, iha entidades relevantes ba edukasaun, ho aumentu minimu 15%.

2.1.6 Jestaun no Kualidade Ensinu

- Promove sistema ida rigoroza ba avalisaun ensinun no jestaun no akreditasaun ba Eskolas no implementa programas ba kapasitasaun ne'ebe bele halakon frakezas ne'ebe identifika ona;
- Promove no haforsa mekanizmu kontrolu ba número oras ensinun formal ba alunun ida-idak;
- Haforsa sistema rekursus umanus, iha establesimentus edukasaun no ensinun no bazeia ba méritu, profesionalizmu no kompetensia, nune'e mos oferese insentivu, formasaun no kapasitasaun, no mós implementa avaliasaun ba dezenpeñu ho baze ba kualidade no progresaun iha karreira, hodi bele asegura valorizasaun profisaun nian;
- Implementa medidas ne'ebe bele liga Profesores sira-nia kualifikasaun ho sira-nia funsaun ne'ebe atu hala'o, no asegura katak sira kolokadus tuir nesesidade real;
- Asegura katak prosesu tomak ba planeamentu, nia finansiamentu no nia aprovizionamentu iha kualidade, no implementa asoens atu monitoriza nia efektividade, hodi utiliza dadus Edukasaun nian no dadus kona-ba populasan, hanesan feramenta baze ba planeamentu, monitorizasaun no avaliasaun;

- Moderniza nívéis de Ensinu nebé iha, liu-husi utilizaun teknolojia informática iha administrasaun no jestaun eskolar no iha sistema informátiku ba jestaun eskolar;
- Haforsa kapasidade servisu munisipais nian, inklui mos, liu husi kordenasaun efetiva ho prosesu desentralizasaun administrativa, formasaun ba jestaun no administrasaun no iha áreas sira seluk;
- Asegura jestaun eskolar efesiente, liu-husi definisaun no implementasaun regulamentus kona-ba disiplina Profesores no alunas sira nian, no ba finansimentu eskolar;
- Hadi'a relasaun eskolas ho inan-aman sira, inklui promosaun ba asosiasaun inan-aman nian no realizaun kampañas sensibilizasaun ba envolvimentu inan-aman sira, iha edukasaun labarik sira-nian;
- Implementa programas ne'ebe hariku alunas sira, liu-liu atividades desportivas, eskuteirus, atividades sivika, artístika no kultural;
- Reestrutura INFORDEPE atu bele oferece desenvolvimentu profisional progresivu no ho qualidade ba rekursus umanus iha edukasaun no asegura formasaun nebé efetiva liu ba Jestores no Profesores;
- Prepara Professores, tuir áreas relevantes ba especializasaun, hodi asegura kolokasaun nebé efetivu, antes hahú anu letivu;
- Promove qualidade no relevánsia iha Institutu Nasional Linguístika, no asegura tan rekursus hodi fortalese lian ofisial Tétun no lían nasional seluk.

2.1.7 Ensinu Superiór

- Asegura sistema ida ba Ensinu Superior, nebé abranjente no luan, reguladu ho padroens rigurozus kona-ba qualidade, no bele responde ba nesesidade País-nian no respeita Sistema Nasional de Kualifikasaun iha Timor-Leste;
- Implementa tomak kuadrus reguladores no ba finansimentu instituisoens públikas no privadas, inklui definisaun ba áreas relevantes ba ensin u no número máximu ba vagas;
- Reforsa kapasidade Ajensia Nasional ba Avaliasaun no Akreditasaun Akademika (ANAAA), hodi promove avaliasaun ho qualidade no akreditasaun ba estabelesimentus Ensinu Superior nian;
- Kontinua no reforsa programa bolsas-de-estudu, liu husi Fundu Desenvolvimentu Kapital Humanu (FDCH), hodi asegura katak sei fó resposta ba áreas estratéjikas iha desenvolvimentu País-nian, ne'ebé identifika liuhosi mapeamentu rekursus humanos ne'ebé elabora hosi FDCH, no garante asesu ho baze iha mérit u no iha programas espesifikus sosiais;
- Kontinua reforsa qualidade ensin u iha Universidade Nasional Timor Lorosa'e, inkuli kriaun kursus foun, nebé ajustadus ba nesesidade desenvolvimentu sosioekonomiku País nian, hodi hadi'a kondisaun infraestruturas, inklui harí kompleksu moderno ba Faculdade Engenharia, iha Hera, no halo reforsu ba Faculdade de Edukasaun, Arte no Humanidade liu-liu iha formasaun ba docentes foun sira;

- Hahú pasus dahuluk ba kriaun Sidade Universitária, iha Munsiu Aileu;
- Reforsa Ensinu Tekniku Superior, liu-husi expansaun iha áreas estratéjikas ba ekonomia nasional, liu-liu Instituto Superior Politekniku ba Hotelaria no Turismo iha Lospalos no Akademia Peskas no Estudus Mariñu iha Manatuto, no hadi'a kondisaun infraestruturas, jestaun no ba ensinu iha Instituto Politekniku Betano;
- Promove ligasaun entre Ensinu Sekundáriu Tékniku-Vokasional ho Ensinu Superior Tékniku;
- Haforsa Institutu Nasional ba Siensias no Teknolojia, liuhosi funsionamentu órgaun hirak ne'ebé previstu iha nia estatutu, hodi desenvolve estudus investigasaun no análise ba siensias aplikadas, nune mos nia rejistu no nia divulgasaun;
- Implementa programas ne'ebe bele favorese asesu ida boot (ka luan) ba materiais akadémikus ba Dosentes no Estudantes sira, liu-husi bibliotekas fizikas no dijitalis;
- Promove ligasaun entre Instituisaun Ensino Superior akreditada sira, públiku no Privadu, ho empresas nacionais kualifikadas, ho objetivu atu aseguara alinhamentu entre oferta edukativa no nesesidades sira;
- Elabora no aprova política jestaun ida no organizaun ba ensino superior ne'ebé estabelese diretrizes kona-ba diversifikasaun ba oferta edukativa, hodi kumpru kurikulu ba padraun mínimu no ba língua oficial sira ne'ebé promove identidade, patriotismu no koezaun sosial comunidade edukativa nian;
- Regula implementasaun ba kareira dosentes universitários sira, inklui halo análise ba atual modalidade ba formasaun kontínua no pós graduada ba dosentes ensinu superior sira;
- Garante uzu efektivu ba língua oficial iha ensinu superior no halo estudu kona-ba kriaun ba "ano zero", hodi reforsa kompetências linguística ne'ebé serve hanesan reforsu ida ba konhesimentu sientífiku báziku;
- Hatama ba aprovasaun leis estruturante sira no espesífiku ensinu superior nian, liu-liu aprovasaun ba sistema bináriu kona-ba créditos no rejime juridiku ba kurikulu padraun mínimu iha ensinu superior no formalizasaun ba kriaun Konsehu Reitor;
- Promove atu estabeleimentu iha ensinu superior hotu uza língua oficial núdar língua eskluзивa iha formasaun no ensinu;
- Hatama fundu infraestruturas id aba estudante sira, ho objetivu atu promove ekivalénsia no igualdade jéneru iha asesu ba ensinu superior hosi estudante sira iha País tomak;
- Kria mekanismu no prosedimentu ne'ebé garante mapeamentu, monitorizasaun, inspesaun no akompanhamentu regular ba instituisaun ensinu superior sira, ho objetivu atu aseguara qualidade ensinu;
- Desenvolve programa kona-ba kapasitasaun iha Ensino Superior, hodi fo'o servisu signifikativus iha apoiu administrativu, koordinativu no regulamentar ba sistema;
- Promove kooperasaun iha área Ensino Superior, ne'ebé regula no enkuadra ho prioridades iha Timor-Leste, ho Instituisaun Ensino Superior estranjeira ne'ebé akreditadu;
- Aprova no implementa programa kombate ba plájiu akadémiku iha instituisaun Ensino Superior.

2.1.8 Fundu Dezenvolvimentu Kapital Umanu

Fundu Dezenvolvimentu Kapital Umanu, nebé estabesele iha tinan 2011, ho misaun atu kontribui ba dezenvolvimentu rekursus umanus nasionais, iha áreas estratéjikas dezenvolvimentu, liu- husi finansiamentu ba programas no projetus formasaun plurianuais, ne'ebe destinadu atu aumenta kapasidade ba profissionais timoroan sira. Fundu ida ne'e inklui programas ba formasaun profisional, ne'ebe foka liu ba jovens sira, formasaun profisional téknika ba funsionarius publikus, nune'e mos ba professores foin-sa'e sira, forsas Polísia no Defesa nian no programas bolsas-de-estudu ba funsionarius Estadu-nian no públiku ein jeral, ho objetivu atu sira bele hetan grau akadémiku insial ka avansadu.

Governu sei kontinua:

- Investe iha FDCH atu, ho forma kordenada no estratéjika, fornese edukasaun no formasaun profisional ida ne'ebe alargada;
- Monitoriza no avalia programas FDCH nian;
- Analiza no halo mapeamentu kona-ba rekursus umanus iha setor públiku iha Timor Leste;
- Produz no divulga guiaun ba bolsas-de-estudu no asesu ba formasaun;
- Hadi'a regulamentus no manuais rekursus umanus nian, ba funsionários FDCH nian.

2.2 Saúde

Sidadauns hotu-hotu iha direitu ba saúde no assistênsia médika ho sanitária no mós iha devér atu defende no promove saúde. Tuir Konstituisaun Repúblika, Estadu tenke promove kriaun servisu nasional ida kona-ba saúde universal, jeral no, karik bele, sei gratuitu (ka la selu).

Governu sei kontinua implementa Polítika Nasionál kona-ba Saúde ho Planu Estratéjiku Nasionál Saúde iha setor saúde 2011-2030 (PENSS 2011-2030), hodi mantein vizaun kona-ba “Timor-Leste saudável”, ne'ebé timoroan hotu-hotu bele iha asesu ba saúde no, ne'ebé, saúde sai hanesan fatór dezenvolvimentu global, ba luta hasoru pobreza ka moris-kiak.

Inisiativas Governu nian kona-ba Setor Saúde sei kontinua orienta ba oinsá maksimiza esforsu tomak, hodi garante prestasaun servisu ne'ebé di'ak liu, iha setor ida ne'e, no mos jeneraliza (ka habelar) asesu ba kuidadus saúde ho qualidade, no halo avaliasaun beibeik kona-ba efisiênsia, transparênsia ho profisionalismu, iha jestaun rekursus finanseirus, umanus, materiais no lojístikus, infraestruturas ho ekipamentus.

Tanba ne'e, sei hametin Sistema Nasional Saúde – ne'ebé representa hosi elementus independentes ne'ebé kontribui ba saúde ho bein-estar famílias hotu nian, nomós iha estabelesimentus ensinu, iha fatin servisu no iha fatin públiku no iha comunidades-nia leet - liuhusi kapasitasaun ba instituisoens ne'ebé presta kudadu Saúde, ba profissionais saúde, ba sistemas fornimentu no distribuisaun medikamentus ho sistemas emergjênsia médika.

2.2.1 Objetivus jerais iha área Saúde, mak hanesan:

- i) Hadi'a prestasaun kudadus Saúde iha País tomak, ho atensaun espesial ba áreas remotas no kamadas populasaun ne'ebé desfavorecidas liu, haktuir prinsípius hanesan inklusaun, ekuidade, efisiênsia no qualidade.
- ii) Hadi'a sistemas finansiamentu no jestaun rekursus finanseirus, umanus, lojístikus, materiais no ekipamentus ho infraestruturas setor Saúde nian;
- iii) Kontinua dezenvolve esforsus kona-ba descentralizasaun servisu Saúde, hodi hadi'a koordinasaun entre Ministériu Administrasaun Estatal no instituisoens relevantes;
- iv) Hadi'a koordinasaun intersektorial Governu tomak nian, kona-ba oinsá konkretiza "Timor-Leste saudável", inklui hadi'a nutrisaun ho kondisoens sanitárias, liuhusi estratéjias ne'ebé konsertadas, hodi hadi'a agrikultura no autosufisiênsia alimentar, aumentu iha produsaun animal no hadi'a setór peskas, no mos liuhusi fornimentu eletrisidade, bee moos no saneamentu báziku;
- v) Haré di'ak fali (ka revê) no hadi'a estrutura Sistema Nasional Saúde, nia organizasaun, rekursus ho kapasidade téknika hodi hadi'a prestasaun servisu integradus, iha kuantidade no qualidade suficiente, hodi hadi'a mos sistemas planeamentu, monitorizasaun, avaliasaun no rekolha (ka halibur) indikadores;
- vi) Kontinua investe hodi garante seguransa no hadia qualidade prestasaun servisu saúde nian;
- vii) Asegura funsionamentu ne'ebé di'ak, liuhusi Servisu Autónomu Medikamentus ho Ekipamentus Saúde (SAMES, I.P), no Laboratóriu Nasional Saúde nian atu bele garante disponibilidade no distribuisaun ai-moruk, reagentes no konsumíveis médikus (utensílius médikus) ho efisiênsia, lailais no ho qualidade;
- viii) Asegura funsionamentu ne'ebé di'ak liu, husi Servisu Emerjênsia no transferênsia pasientes;

- ix) Estabelese parserias ho Sociedade Sivil, Setor Privadu ho Parseirus Dezenvolvimentu, atu bele dezenvolve kampañas sensibilizasaun, iha País tomak, hodi hadi'a Saúde pública, hanesan liuhusi prevensaun no hadi'a kuidadus iha área nutrisaun, imunizasaun, saúde reprodutiva, saúde mental no saúde ambiental.

Ba prosekusaun (ka atu alkansa) objetivus hirak ne'e, Governu sei halo asoens hanesan tuir mai no buka atinji metas hanesan:

2.2.2 Prestasaun Servisus Saúde Primária

1. Garante katak suku hotu-hotu, ne'ebé ho populasau entre 1500 to'o 2000 pesoas, liu-liu ne'ebé hela iha áreas remotas, bele iha asesu ba Postu Saúde ida ho pakote servisus nebé abranjente;
2. Asegura katak Sentrus Saúde Komunitáriu, iha Postus Administrativus, bele garante atendimentu ba ema entre 5000 to'o 15000 no iha kapasidade atu jere 4 Postus Saúde iha área jeográfika ida-idak nian;
3. Aumenta ba 70% taxa feto isin-rua ne'ebé simu kuidadus pré-natais, pelu menus dala-haat durante período isin-rua;
4. Aumenta ba 80%, taxa partus ne'ebé hetan assistênsia husi profesional Saúde ida;
5. Aumenta taxa kobertura ba kuidadus pós-natais ba 90% durante semana rua dahuluk hafoin partu;
6. Kontinua promove esforsu atu hadi'a estadu nutrisaun populasau nian, ne'ebé foka liu ba bebés ho labarik sira, inklui prevensaun no tratamentu kona-ba falta nutrisaun, no mos liuhusi kampañas atu halo mudansa ba komportamentu kona-ba nutrisaun – né'e núdar objetivu ne'ebé bele rezulta hodi reduz taxa desnutrisaun (malnutrisaun no obesidade), inklui persentajen labarik sira ne'ebé hetan akompanhamentu no monitorizasaun iha kresimentu;
7. Garante 90% imunizasaun hasoru poliomelite (ka moras polio), sarampu, tuberkuloze, difteria (ka moras respirasaun) no epatite B;
8. Kontinua prepara no implementa planu kona-ba prevensaun ba moras kardíaka (ka fuan nian), reumátika (ka isin-sin) ho febre reumátika;
9. Reduz impaktu no aumenta konsiensializasaun ho prevensaun kona-ba moras hanesan: HIV-SIDA, tuberkuloze, asma (ka dada-iis susar tanba alerjia), malária, dengue, lepra (ka rate);
10. Kontinua hadi'a asesu ba tratamentu ne'ebé relasiona ho moras iha foru ka kampu psikolójiku no mental;

11. Reforsa asoens kona-ba promosaun saúde orál no hadi'a servisu odontológiku (katak kona-ba moras nehan);
12. Reforsa asoens promosaun saúde okular no hadi'a servisu oftalmológiku (katak tratamentu moras matan);
13. Reforsa asoens kona-ba promosaun saúde ho baze iha ábitus alimentares no hadi'a prestasaun servisu ba moras kardiovaskulares (ka fuan nian), diabetes (ka mi-midar) ho ipertensaun;
14. Promove kampañas kona-ba saúde jeral ho envolvimentu famílias, comunidades no eskolas, liuliu kona-ba prevensaun moras relasiona ho konsumu drogas, tabaku, álcool, moras ne'ebé bele tranzmite seksualmente ho komportamentus seluk-tán ho risku hetan moras kontajiozas (ka ne'ebé da'et).

2.2.3 Prestasaun Servisu Saúde Ospitalar

1. Kontinua halo planu, finansia no hala'o prestasaun kuidadus kardíakus no paliativus iha Ospital Nasional Guido Valadares;
2. Halo planu, finansia no hala'o prestasaun kuidadus onkológiku (ka kona-ba kankru) no renais (ka kona-ba rins), no mos kuidadus saúde espesializadus seluk-tán iha Ospital Nasional Guido Valadares;
3. Estabelese servisu ba neurosirurjia iha HNGV;
4. Aumenta númeru no kualidade ba Médikus no Téknikus espesializadus, iha HNGVs no Hospitais referénsia sira, ho konsiderasaun ba pakote komprensivu iha kuidadus saúde sekundáriu no tersiáriu saúde nian;
5. Reforsa kondisoens no disponibilidade iha Ospital Nasional no iha Hospitais Referénsia, atu bele kontinua sai hanesan sentrus estájiu, ho kualidade ne'ebé di'ak liu, ba profisionais saúde hotu-hotu;
6. Prepara estudu detalhadu hodi avalia nesesidades País nian no kondisoens finansiamentu, atu bele alkansa meta atu hari Ospital ida, iha kada munisípiu, to'o tinan 2030;
7. Redúz transferénsia pasientes ba tratamentu médiku iha estranjeiru, liuhusi oferta servisu, ekipamentus, meius diagnóstiku no médikus espesializadus ne'ebé di'ak liu, iha HNGV.
8. Implementa politika atu deskonjestiona Hospitais ka hamenus númeru pasientes, husi mekanismu 'haruka fila fali' ou halo "kontrareferénsia" pasientes primáriu ba Sentrus Saúde Komunitáriu;
9. Desentraliza kompeténsias administrasaun no jestaun finanseira Ospital referénsia nian, hodi asegura fortesimentu institucional no autonomia diak ida kona-ba jestaun no rekursus ne'ebé afeta ba Ospital sira;

10. Reforma Laboratóriu Nasional Saúde hodi hadia asesu no jestaun servisu laboratóriu nian iha teritóriu tomak;
11. Reforma ba Bankus de Sangué hodi halo diak liu jestaun ba sistema forneshimentu raan no troka raan.

2.2.4 Infraestruturas iha Setór Saúde

1. Kontinua harii no reabilita Postus Saúde, hodi alkansa meta hanesan Postu Saúde ida(1) ba kada suku no ba kada lokalidade ho abitantes 1000 to'o 5000;
2. Kontinua reabilita no hasa'e kapasidade (ekipamentus, rekursus umanus) iha Sentrus de Saúde Komunitáriu;
3. Garante katak Postus de Saúde no Sentrus de Saúde Komunitáriu bele hetan ekipamentus no sai operasionais, inklui ekipamentu médiku ho ona asesu ba teknolojias informasaun;
4. Expande ekipamentu médiku nian no mos fo'o apoiu no asesu ba teknolojia informasaun nian;
5. Garante katak 100% edifísius ne'ebé integra iha Sistema Nasional Saúde hetan asesu ba eletrisidade, bee moos no saneamentu báziku;
6. Garante katak profisionais Saúde ne'ebé hala'o funsoens dook husi sira-nia área rezidênsia, liu-liu iha áreas remotas, tenke iha alojamentu ne'ebé di'ak;
7. Kontinua reabilita no hasa'e kapasidade técnica Ospitais de Referência sira, atu bele oferese servisu espezializadus seluk;
8. Kontinua aumenta edifísiu servisu sentrais Ministériu Saúde nian atu bele akomoda ho diak ema hirak ne'ebé iha.

2.2.5 Jestaun no Distribuisaun Medikamentus no Ekipamentus Médikus

1. Kapasita Servisu Autónomu Medikamentus no Ekipamentus Saúde (SAMES, I.P), atu bele hala'o prestasaun servisu ne'ebé di'ak liu no aseguza efisiênsia iha aprovizionamentu no lojística ba produsu farmasêutikus no ekipamentus médikus ba Servisu Nasional Saúde;
2. Hamenus Stock menus to'o besik 20% iha armazén SAMES nian no menus 10% iha Unidade Saúde sira;
3. Hadi'a provizaun no distribuisaun medikamentus ho produsu ne'ebé asosiadus (ka ligadus) iha Servisu Nasional Saúde tomak, hodi destaka liu mak seleridade, efisiênsia, transparênsia no kualidade servisu, liuhusi koordinasaun no komunikaun ne'ebé di'ak liu entre SAMES ho entidades relevantes;
4. Reforma ba laboratóriu Nasional Saúde hodi hadia jestaun no kontrolu ba kualidade análise klínika nian no sistema forneshimentu raan;

5. Implementa regulamentasaun no fiskalizasaun ba Farmásias no fatin seluk ne'ebé la espesializadus atu fa'an medikamentus (ka ai-moruk).
6. Regula uzu de medisina alternativa no komplementa no promove medisina tradisional timorensa.

2.2.6 Emerjênsias Médikas

1. Garante qualidade ho efisiênsia iha Servisus Emerjênsia, hahú husi liña atendimentu ba to'o seleridade resposta ho meius no profisionais ne'ebé adekuadus, ba kada kazu emerjênsia, Servisus nebé funsiona 24 oras loron ida;
2. Asegura ezistênsia frota transportes emerjênsia ne'ebé suficiente no apropriada, hanesan ambulânsias ho veículus multifuncionais, ho kapasidade atu dezloka (ka la'o) iha país tomak;
3. Reforsa kapasidade evakuasaun urgente liuhusi meius aéreus, liu-liu husi fatin sira nebé dok tebes no difísil atu hetan asesu husi rai.

2.2.7 Jestaun ho Administrasaun Setor Saúde

1. Implementa Planu Estratéjiku kona-ba Saúde Nasional 2011-2030;
2. Haré di'ak fali no hadi'a estrutura Sistema Nasional Saúde nian, inklui nia organizasaun, rekursus ho kapasidade téknika, hodi hadi'a prestasaun servisus integradus, no hadi'a mos sistemas planeamentu, monitorizasaun, avaliasaun no rekolha de indicadores;
3. Hadi'a sistemas finansiamentu ho jestaun kona-ba rekursus finanseirus, lojístikus, materiais ho ekipamentus no infraestruturas setór Saúde;
4. Desenvolve no operacionaliza planu ida kona-ba otimizasaun rekursus materiais no umanus, inklui formasaun, kapasitasaun ho avaliasaun kona-ba dezempeñu, hodi hadi'a kondisoens ijiene no aseptizasaun (ka esterilizasaun) edifísíus hotu-hotu ne'ebé halo prestasaun servisus saúde primária no ospitalar;
5. Implementa levantamentu kona-ba kondisoens, no tuir mai melhoria iha Unidades Sanitárias, iha edifísíus nebé hala'o prestasaun servisus Saúde primária no ospitalar;
6. Kontinua desenvolve esforsus kona-ba descentralizasaun servisus Saúde, hodi hadi'a koordenaun ho Ministériu Administrasaun Estatal no instituisoens relevantes;
7. Desenvolve no implementa padroens apropiadus saúde ho seguransa trabalhu, iha instituisoens Estadu tomak nian;
8. Implementa tomak regulamentasaun kona-ba prestasaun servisus, husi unidades privadas saúde, tuir sistema públiku saúde;

9. Hadi'a Sistemas Informasaun Saúde, atu bele halibur informasaun klínika kona-ba utente ida-idak, iha rejistu ida de'it, hodi permite halo lailais konsulta no mos preskrisaun eletrónika kona-ba medikamentus ho utilizaun meius komplementares diagnóstiku nian, ho objetivu halo hamutuk Rejistu Saúde Eletróniku ida de'it ba sidadauns hotu-hotu.

2.2.8 Rekursus Umanus

1. Kontinua kria kondisoens atu Postus Saúde hotu-hotu bele iha médiku ida (1), enfermeirus rua no parteiras rua;
2. Kontinua kria kondisoens atu aldeias hotu-hotu, iha fatin sira ne'ebé la'o liu oras ida hodi to'o iha Postu Saúde, bele iha asesu ba profesional Saúde ida ne'ebé competente;
3. Kontinua kapasita Institutu Nasional Saúde, hodi garante qualidade ensinu, investigasaun no peskiza iha saúde, no hadi'a supervizaun ba instituisoens formasaun iha setór ne'e;
4. Halo parseria ho instituisaun ensinu superior sira no Ministériu Ensinu Superior, Siénsia no Kultura, hare'e fali kurríkulu ba ensinu superior ne'ebé destina ona ba formasaun profesional saúde nian;
5. Implementa polítikas atu garante formasaun akadémika, kualifikasaun profesional no formasaun kontínua ba profissionais saúde sira;
6. Kontinua investe atu hadia kompeténsias profissionais no kapasidade téknika rekursus umanus no profissionais iha setór Saúde, hodi fó formasaun ne'ebé adekuada ba kuadrus superiores, médius no bázikus;
7. Estimula parserias ho kooperasaun internasionál, hodi forma no kapasita profissionais saúde, hahú husi profissionais Saúde espesializadus to'o téknikus ho rekursus umanus seluk, iha setór saúde (nune'e mos iha área administrasaun, jestaun, finansas, aprovizionamentu no kontabilidade);
8. Implementa planus kona-ba forsa laboral, kuadrus de pesoal, regulamentus no padroens ho kódigus konduta ba profissionais setor Saúde.

2.3 Inkluzan Sosial, Protesaun Sosial no Solidariedade

Dezdeke País ne'e sai independente, Governus, nebé tuituir malu to'o ohin, fó prioridade ba assistênsia ba sidadauns ne'ebé kiak no vulneráveis liu, iha sosiedade timor-nian. Maski ita hatene katak, ba longu prazu (ka tempu naruk), prestasaun edukasaun no formasaun ne'ebé ho qualidade no kriaun oportunidades ba empregu, mak sei sai nafatin hanesan instrumentus fundamentais atu bele sai husi moris-kiak, atu to'o iha ne'ebá, Estado nia devér mak atu aseguara katak Kombatentes Libertasaun Nasional sira (ne'ebé simu sakrifísius barak tebetebes ba Pátria), feto ho labarik sira (iha

sira ne'e mak rezide fórmula susesu ba dezvoltimentu sustentável), nune'e mos ho famílias kiak no kbiit-laek sira, idozus ho sidadauns vulneráveis seluktán (hanesan kazu kona-ba ema defisientes sira), hotu-hotu bele iha asesu hodi satisfáz sira-nia nesesidades básicas ba bein-estár, no mos asesu ba oportunidades atu bele sai husi sira-nia kondisaun frajilidade.

Portantu, Governu sei kontinua fó tulun ba kamada populasaun ida ne'e, no mos dezvoltolve políticas no kria estratégias ne'ebé bele redúz dependênsia ba apoiu husi Estadu. Iha ne'e inklui mos:

- Aprova no konsolida Estratégia Nasionál kona-ba Protesaun Sosiál;
- Implementa Lei kona-ba Rejime Jeral Seguransa Sosial no garante protesaun ba trabalhadores ho sira-nia famílias, no mos iha situasoens hanesan maternidade, paternidade, adosaun, idade ferik-katuas, invalidez no mate;
- Konsolida Institutu Nasionál de Seguransa Sosial atu nune'e bele jere, ho independênsia, transparênsia, efikásia no efisiênsia, sistema seguransa sosial, inklui rejimes kontributivos no naun-kontributivos;
- Aprova Lei de Bazes ba Protesaun Sosial;
- Haré di'ak fali (ka halo revizaun) no avalia dokumentus lejislativos no operacionais kona-ba Subsídium Apoiu ba Idozus ho Inválidos (SAII);
- Haré di'ak fali no avalia programa Bolsa ba Inan, subsídium apoiu kondisional, ne'ebé sei reajusta ho apoios sociais pekuniários (ka fó osan) ba famílias ne'ebé presiza liu, no foka liu-liu iha investmentus iha Saúde ho Edukasaun labarik sira-nian;
- Alarga konstrusaun Centrus de Solidariedade Sosial (CSS), nebé iha ona Munisípius hotu-hotu, to'o Postos Administrativos;
- Hadi'a Servisus Atendimentu Sosiál (SAS) nebé hakbesik-an ba comunidades, liuhusi Centrus Solidariedade Sosiál (CSS);
- Hadi'a Programa Apoiu ba Instituisoens Solidariedade Sosiál, ho prioridade ba hirak ne'ebé ho impaktu boot liu hanesan, tulun ne'ebé fó ba labarik ho jovens sira, ba feto ho sidadauns portadores de defisiências, no mos hanesan iha área integrasaun sosial, dezvoltimentu umanitáriu ho apoiu iha situasoens emergênsia ba kazus hanesan dezastres naturais, prevensaun ho reparasaun ba situasoens karênsia no dependênsia;
- Promove asoens koezaun sosiál, ne'ebé promove diálogo, seguransa komunitária ho rezolusaun konflitus no problemas sociais iha nível comunidades.

2.3.1 Kombatentes Libertasaun Nasionál

Konstituisaun determina katak Estadu tenke asegura protesaun espesial ba mutiladus funu, oan-kiak ho sira ne'ebé dependente hela ba ema sira ne'ebé dedika sira-nia moris tomak iha Luta ba

Independênsia no soberania nasional no proteje ema hotu-hotu ne'ebé partisipa iha rezistênsia hasoru okupasaun estranjeira, bazeia ba Lei. Lei mos define tiha ona mekanismus hodi fó omenajen ba Eróis Nasionais.

Nune'e, Governu sei kontinua rekoñese valór ne'ebé ás tebes husi Eróis Nasionais, sei prezerva no celebra memória kona-ba Luta no sei halo buat hotu (ka providensia) atu sira hotu ne'ebé simu sakrifísius tomak hodi alkansa bein-komún (ka hotu-hotu nia di'ak), bele moris, agora, ho kondisoens nebé dignas, tanba País nia dignidade rasik mos depende ba ida ne'e.

Governu sei kontinua dezenvolve asoens hanesan ne'e:

- Promove rekoñesimentu oficial ba Veteranus no Kombatentes Libertasaun Nasional, liuhusi atribuisaun ka fó kondekorasoens no husi atus rekoñesimentu oficial seluktán, hodi fó atensaun espesial ba CLN sira nebé hetan tinan 3 iha Base de Apoio tamba, tuir Lei nebé vigora, sira seidak hetan (ka sai benefisiariu ba) pensaun ruma;
- Atribui Diplomas de Honra ba Veteranus no CLN sira nebe iha registo no sira-nia prosesus validadus hotu ona;
- Promove nafatin Serimonias de Kondekorasaun ba Veteranus, Mártires no CLN sira, nebé to'o agora seidak simu medalhas de onra husi Estadu;
- Atribui pensaun Prestasaun Pecuniaria Unika ba CLN sira ho tinan 3 iha Base de Apoio, hanesan ho CLN sira nebé hetan 'dedikasaun eksklusiva 4-7 anos', hodi halo revizaun ba Lei kona-ba Estatuto CLN;
- Revê estatutu ba familiares, husi Kombatentes nebé mate ho 'dedikasaun eksklusiva '4-7 anos', atu bele hetan direitu ba prestasaun pekuniária únika;
- Revê Estatutu atu bele atribui 'dedikasaun eksklusiva' ba kombatentes nebé mate, iha funu laran maibé la konsidera hanesan mártires;
- Hakotu prosesus nebé sai reklamadus no pendent, husi kedas rejistu 2003-2005 nian;
- Hala'o lalais prosesu verifikasaun no validasaun ba rejistos husi tinan 2009;
- Loke rejistu foun ba Veteranus no CLN sira nebé seidak rejista-an, husi tinan 2003 to'o 2009;
- Asegura protesaun sosial ho pensoens ba Veteranus ho Kombatentes Libertasaun Nasional sira, no mos ba famílias mártires no sira ne'ebé lutu;
- Implementa sistema atribuisaun bolsas estudu ba mártires ho Kombatentes Libertasaun Nasionál sira-nia oan, hodi abranje ka kobre níveis eskolaridade tomak, hahú husi ensinu báziku to'o ensinu universitáriu;
- Integra Veteranus ho Kombatentes Libertasaun Nasionál iha vida ekonómika no sosiál, inklui asesu ba kualifikasoens ho oportunidades empregu;

- Estimula kriaun negósius autosustentáveis ba Veteranus ho Kombaterentes Libertasaun Nasional;
- Haré ba viabilidade atu kria Fundo de Investimentu ba Pensaun Espesial de Reforma no Pensaun de Subsistencia;
- Akonselha Veteranus no CLN sira hodi halibur iha asosiasoens ka kooperativas no estimula investimentu iha mikro, empresas kiik ka médiu, husi sira-nia osan pensaun rasik;
- Implementa programas prezervasaun ho valorizasaun ba Istória Luta nian, no mos harii Monumentus istórikus no seluktán (semitérius ka rate, jardins eróis, etc.);
- Halo konstrusaun Semiterius Espesiais foun (Ainaro, Natarbora, Covalima, Kelikai, Iliomar, Uatulari, Ermera, Maliana) no halo remata semiterius nebé to’o agora seidak hotu (Laga no seluk-tan) no kontinua ho konstrusaun Jardim dos Herois iha Metinaro;
- Hakoi restus mortais ne’ebé rekolha tiha ona no tau hela iha ‘Uma Mahon’, iha Munisipius lubuk ida;
- Insentiva Veteranos no KLN hodi kontinua hala’o nafatin rekolha ba restus mortais;
- Implementa programas prezervasaun no valorizasaun Istória Luta, hanesan mos kona-ba celebraun ba momentus ho dias istórikus;
- Konklui investigasaun rigoroza ida kona-ba Istória Luta ba libertasaun nasional, hodi bele fahe ba eskolas no comunidades, atu futuras jerasoens koñese pasadu, onra presente no valoriza futuro;
- Implementa Dekretu-lei nebé aprova Estatuto Orgânico ba Konsehu Nasionál Kombaterentes Libertasaun Nasionál nian no apoia sira-nia programas no inisiativas, inklui sira-nia partisipasaun iha programas dezvoltamentu nasional, liuliu iha estabelesimentu Komisaun Instaladora ba KNKLN.

2.3.2. Feto

Feto ho mane iha direitu no obrigasaun ne’ebé hanesan iha aspetu hotu-hotu, iha moris familia nian, kulturál, sosiál, ekonómika no polítika. Atu direitu hirak ne’e bele konkretiza ho diak liután, hodi Feto timoroan sira bele kontribui barak liu no diak liu ba ita-nia sosiedade no ba kresimentu ka dezvoltamentu rai nian, mak Governu sei:

- Estimula kriaun negósiu auto-sustentável ba feto sira inklui sira ne’ebé sai xefi familia no sira ne’ebé sai vítima ba violénsia doméstika no violénsia bazeia ba jéneru hodi asegura independénsia ekonómika;
- Garante katak 60% husi feto sira bele hetan asesu ne’ebé hanesan ba pozisaun foti desizaun no mós hetan asesu ba justisa no seguransa (PED 2022);

- Koopera ho Ministériu Edukasaun, Juventude no Desportu atu revé, no kontinua asegura implementasaun kurríkulu ne'ebé sensível ba jéneru ho efetivu no efikásia iha sistema ensinu;
- Kontinua promove asaun sira kona-ba formasaun profisionál iha área sira ne'ebé bele hamosu empreza ki'ik no natón no mós cooperativa sira ne'ebé lídera husi feto;
- Koopera ho Ministériu Edukasaun, Juventude no Desportu no mós Komisaun Nasionál ba Direitu Labarik atu asegura katak 75% husi labarik feto sira ho idade ekolár, bele remata ensinu báziku (PED 2022);
- Kontinua implementa Planu Asaun Nasionál kona-ba Violénsia Bazeia ba Jéneru 2017-2021;
- Kontinua implementa Planu Asaun Nasionál kona-ba Feto, Paz no Seguransa;
- Kontinua implementa kampaña sira atu luta hasoru violénsia doméstika;
- Kontinua implementa polítika orsamentu sensível ba kestaun Jéneru sira nian;
- halo advokasia atu asegura orsamentu jerál estadu nian sensível ba jéneru;
- Koordena ho SEFOPE atu asegura kondisaun servisu ne'ebé diak liu ba feto, ne'ebé mós hanesan mães edukadoras, liuhusi revizaun ba lejislasaun, regulamentu ho estatutu laborál sira;
- Apoia ba organizasaun no asosiasaun feto sira ne'ebé defende ba feto sira nia direitu no interese.

2.3.3 Labarik

Labarik iha direitu ba protesaun espesial husi parte família, husi comunidade no Estadu, liu-liu hasoru formas abandonu (katak soe no husik hela), diskriminasaun, violênsia, opresaun, abuzu seksual ho explorasaun. Labarik sira goza direitus tomak ne'ebé rekoñese universalmente, no mos direitus ne'ebé konsagra iha konvensoens internasionais ne'ebé Estadu ratifika ou aprova regularmente. Labarik sira hotu, ne'ebé moris husi matrimóniu ka lae, goza direitus no hetan protesaun sosiál ne'ebé hanesan ho sira-seluk.

Nune'e, Governu sei kontinua foti medidas hodi:

- Implementa Rejime Jurídiku kona-ba Protesaun ba Maternidade, Paternidade ho Adosaun, hamutuk ho medidas seluk hodi apoia Labarik vulneráveis) sira;
- Aprova no implementa Lei kona-ba Protesaun ba Labarik sira ne'ebé iha perigu;
- Implementa Rede kona-ba Protesaun Labarik sira iha Postus Administrativus hotu-hotu iha País;

- Kapasita ka hakbiit Komisaun Nasional Direitus Labarik nian no implementa Planu Asaun Nasional ba Labarik;
- Kria no dinamiza programas okupasionais no tempus livres ne'ebé espesífikus ba Labarik sira, ne'ebé hela iha orfanatus, ho akompañamentu pedagójiku no psikolójiku ne'ebé di'ak;
- Promove kampañas ho asoens sensibilizasaun kona-ba direitus ho deveres Labarik sira-nian no kona-ba lejislasaun relevante ne'ebé afeta labarik sira;
- Inkrementa ka dezenvolve programas kona-ba inklusaun sosial ba Labarik sira, ne'ebé konsidera hanesan marjinalizadas ou iha konfliktu ho lei;
- Kria programas ne'ebé prevene marjinalidade ho delinkuênsia ka atus krime Labarik sira-nian;
- Kontinua implementa programas kona-ba prevensaun, protesaun ho assistênsia ba Labarik sira, ne'ebé sai vítimas violênsia, abandonu, incestu (katak relasaun iha uma laran - aman ho oan, maun ka alin mane ho feton rasik), no abuzu seksuál, liuhusi liña atendimentu ida ne'ebé segura ba denúnsia kona-ba kazus hanesan ne'e;
- Hadi'a monitorizasaun ho tratamentu husi Polísia, Ministériu Públiku no Tribunais kona-ba kazus violênsia ho abuzu ba Labarik sira.

2.3.4 Idozus

Sidadauns hotu-hotu, husi terseira idade, iha direitu ba protesaun espesial husi parte Estadu. Polítika kona-ba terseira idade engloba medidas ho karáter ekonómiku, sosiál no kulturál, hodi proporsiona ba ema Idozus sira oportunidades ba realizasaun pesoal, liuhusi partisipasaun ida ne'ebé digna no ativa, iha vida comunidade. Tamba tenki fó atensaun mos ba kamada ida ne'e husi ita-nia populasan, mak Governu sei:

- Kontinua fó subsídios pekuniáriu (ka osan) ba Idozus sira, liuhusi Subsídium de Apoio ba Idozus ho Inválidos (SAII);
- Kria Sentrus Atendimentu ba Idozus, iha Munisípius hotu-hotu;
- Dezenvolve kampañas kona-ba ema Idozus sira-nia direitus no promove sira-nia integrasaun ho kuidadus espesiais iha famílias no iha comunidades;
- Kria programas kona-ba Tempus Livres/Espasus Konvíviu/Terapia Okupasionál ba ema Idozu sira, hodi promove nia bein-estár ho integrasaun iha sosiedade (bele inklui atividades desportivas, artes, teknolojias tradicionais hanesan olaria ho artezenatu, pintura, paseius, ou hanesan de'it espasus ba konvíviu).

2.3.5 Grupus Vulneráveis seluk

Sidadaun ne'ebé ho Defisiênsia goza direitus ne'ebé hanesan no mos sujeita ba deveres ne'ebé hanesan ho sidadauns seluk, exetu kona-ba ezersísiu ou kumprimentu deveres ne'ebé nia labele hala'o tanba razaun defisiênsia.

Hanesan medidas apoiu ba grupus sidadauns sira ne'e, Governu sei:

- Estimula kriaun negósios autosustentáveis ba sidadauns ne'ebé ho Defisiênsia;
- Hadi'a kapasidade iha país tomak atu presta servisu ho qualidade ba ema vulneráveis, inklui konstrusaun ekipamentus ho asesibilidade ba ekipamentus instituisoens públicas nian;
- Desenvolve programas de apoiu ba famílias ho comunidades ne'ebé tau-matan ba ema sira ho Defisiênsia;
- Continua desenvolve Programas Reabilitasaun ho prestasaun servisu no divulgasaun, hodi hadi'a qualidade moris ema sira ne'ebé ho Defisiênsia, liuhusi reabilitasaun ne'ebé especializada no integrada;
- Halo levantamentou kona-ba ema sira ne'ebé ho moras krónika no kria pogramas de apoiu, no mos promove kampañas sensibilizasaun kona-ba moras krónikas;
- Implementa Deklarasaun Maubisse ne'ebé foka liu ba fó oportunidades ne'ebé hanesan ba Feto, hanesan kona-ba edukasaun ho formasaun profesionál, asesu ba merkadu trabalhu no ba vida sosial ho polítika;
- Implementa programas reabilitasaun ba reklusos ka prezus ho ex-reklusos ka ex-prezus ba sira-nia integrasaun iha sociedade;
- Investe iha programas assistênsia alimentár, hodi apoia vítimas dezastres naturais no indivíduos ho famílias vulneráveis;
- Hadi'a mekanismos sokorru ho assistênsia ba vítimas dezastres naturais, inklui konstrusaun infraestruturas, ho distribuissau materiais konstrusaun no materiais ba armazenamentu;
- Realiza asoens formasaun ho kapasitasaun ba prevensaun, mitigasaun no asaun ba kazus dezastres naturais, iha comunidades iha País tomak;
- Halo levantamentou kona-ba ezistênsia toksikodependentes iha país no kria kondisoens ba sira-nia rekuperasaun ho aconselhamentu, no mos reforsa kampañas sensibilizasaun kona-ba konsumu drogas no combate tráfico ilegal;
- Apoia Komisaun Nasionál Kombate ba HIV-SIDA no continua realiza kampañas prevensaun kona-ba tranzmisaun HIV-SIDA, fó apoiu ba pasientes sira iha Casa de Rekuperasaun Saúde, iha Tibar, no mos hadi'a assistênsia kona-ba alimentasaun, kuidadus saúde no tratamentu ba pasientes ho moras HIV-SIDA no desenvolve kampañas integrasaun no terapia okupasional.

2.4 Kultura no Patrimóniu

Tuir Konstituisaun Repúblika, Estadu rekoñese no garante, ba sidadaun, direitu ba Kultura no determina katak ema hotu-hotu iha direitu ba fruisaun (ka aproveita, goza) no kriaaun kultural, no mós dever atu prezerva, defende no valoriza patrimóniu kultural. Kultura hanesan mós forma pasífika no konstrutiva ida, atu dezenvolve personalidade no expresa emosoens, hodi potensia (ka aumenta) konsiênsia kona-ba sidadania no valoriza sensibilidade ema ida-ida nian no nia empatia ba maluk seluk. Nune'e, Kultura iha papel ne'ebé fundamental no insubstituível (ka la iha atu substitute ka troka) iha konstrusaun sosiedade ida ne'ebé pasifikada no moderna.

Nune'e, sei kontinua dezenvolve esforsus kona-ba promosaun ho valorizasaun espresoens artístikas oioin, aleinde salvaguarda no promove Patrimóniu Istóriu no Kultural, material no imaterial, inklui Patrimóniu arkeolójiku no edifikadu, múzika, línguas (ka lian) no dialetus no istória oral, arkitetura tradisional, artezanatu ho kualker forma expresaun artístika, tradisional ou moderna.

Governu sei uza Kultura no Patrimóniu kultural, hodi promove konsiênsia partiótika ho sentidu pertensa no identidade nasional, hodi bele, ho nune'e, kontribui atu kria otimizmu no bein-estar iha populasaun no estimula nia partisipasaun iha desenvolvimentu sustentável País nian.

Ne'e mak, Governu sei promove objetivus jerais tuir mai iha área Kultura no Patrimóniu:

- Fomenta Identidade Nasional no Kultura timor-nian, hodi kontribui ba konstrusaun nasaun ida, ne'ebé pasífika, tolerante no kriativa;
- Asegura katak populasaun tomak iha asesu ba diversidade saberes (ka konhesimentus), expresoens artístikas no elementus kulturaes, kona-ba espesifisidades istórikas no jeográfikas País nian;
- Aumenta kooperasaun, parserias ho interkâmbius artístikus no kulturaes ho Nasoens seluk no mos Organizmus Internasionais, atu bele promove Kultura ho Patrimóniu timor-nian iha estranjeiru, nune'e mós hanesan estratéjia aprendizagem no formasaun ba ita-nia instituisoens kulturaes no ita-nia produtores kulturaes ho artistas nacionais;
- Dezenvolve turizmu kultural no apoia inisiativas, públicas ou privadas, ba desenvolvimentu patrimóniu kultural nasional;
- Hadi'a no reforsa koordenasaun intersektorial hodi promove kultura ho forma transversal, inklui asoens formasaun profisional ho ensinu kultural no artístiku iha eskolas;
- Promove investigasaun, prezervasaun no divulgasaun iha área Patrimóniu Kultural (inklui estudus antropolójikus, arkeolójikus, etnolójikus, linguístikus no sosiolójikus);
- Insentiva konsumu ne'ebé boot liu iha Arte no Kultura, iha ita-nia País, no insentiva konservasaun patrimóniu kultural;

- Kontinua promove manifestasoens kulturalis nasionais hotu-hotu, inklui feiras, konkursus no serimónias tradicionais, ho seluk-seluk tan;
- Kontinua apoia “Centro Nasional Chega!” ho nia programas no inisiativas, atu nune’e bele prezerva memória kona-ba pasadu no promove rekonsiliaun ho paz, iha nível nasional no internasional;
- Dezenvolve kuadru legal ida ba prezervasaun (katak kuidadu no bali didi’ak) lokais ka fatin istórikus País nian, tuir nia regras reabilitasaun ho konservasaun rasik (halo artikulasaun ho entidades governamentais relevantes, hanesan Ministériu Justisa);
- Dezenvolve programa mapeamentu ba fatin istórikus hotu-hotu, liu husi artikulasaun (ka koordinasaun) ho entidades governamentais relevantes, hanesan Ministériu Turizmu;
- Dezenvolve dilijênsias (ka esforsus) nesesáriu, liuliu ho Ministériu Edukasaun, hodi hatama materiais no konteúdus “Sentru Nasional Xega!” nian, iha kurríkulus de Ensinu;
- Kria lejislasaun ne’ebé adekuada, hodi proteje propriedade intelektual no direitos autor nian.

Atu konkretiza objetivus jerais, ne’ebé deskreve iha leten, Governu sei dezenvolve asoens tuir mai no konkretiza metas hanesan:

- Harii Muzeu ida ho Sentru Kultural iha Díli (PED 2015);
- Harii Biblioteca Nasional;
- Estabelese Akademia Arte, Kultura no Indústrias Kriativas;
- Estabelese Sentrus Kulturalis Rejonais iha Oe-Cusse, Liquiçá, Ermera, Maliana, Ainaro ho Suai (PED 2020);
- Kria Kompañia Nasional ba Teatru no Dansa no promove realizaun eventus no vizitas regulares, iha nível munisipal;
- Estabelese parserias ho parseirus nasionais no internacionais, atu bele dezenvolve programas, konteúdus, kurríkulus, formasaun ho disponibilizasaun profesores no téknikus espesialistas, ne’ebé presiza ba programas ne’ebé temi iha leten;
- Implementa Lei kona-ba Patrimóniu Kultural no Lei de Bazes ba Biblioteca;
- Kontinua halo levantamento kona-ba bens kulturalis, iha País tomak, no divulga (ka publika) liuhusi baze dados ‘online’ ida;
- Investe iha formasaun ba kuadrus no apoia investigasaun iha áreas kulturalis, liuhusi parserias ho instituisoens akadémikas nasionais no internacionais;
- Impulsiona (ka dudu) kriaun asosiasoens nasionais ne’ebé defende, promove ho conserva patrimóniu kultural, liu mos husi kooperasaun ho instituisoens no organismos internacionais;
- Hadi’a koordinasaun entre Entidades Governamentais responsáveis ba área Kultura ho Entidades Governamentais responsáveis ba Edukasaun, atu bele dezenvolve programas ho kurríkulus iha área patrimóniu kultural, asaun kultural no artístika;

- Hadi'a koordenasun entre entidades governamentais responsáveis ba área Kultura ho entidades governamentais responsáveis ba Turizmu, hodi desenvolve programas iha âmbito patrimóniu kultural ho asaun kultural ne'ebé atrativos ba setor turístiku;
- Reforsa lasus istórikus, kultura, linguístikus no artístikus ho paízes CPLP, liuhusi promosaun programas, eventos ho interkâmbius iha área kultural no artístika;
- Estreita (ka hametin) lasus kooperaun no amizade ho paízes ASEAN no iha Pasífiku, liuhusi programas, eventos no interkâmbius iha área kultural no artístika;
- Reforsa kooperaun ho UNESCO;
- Haree di'ak fali lejislasaun ne'ebé iha ba Kultura no korrije (ka hadi'a) lakunas (ka faltas) ne'ebé presiza, hodi disponibiliza (ka prepara) kadru legal ida ne'ebé efetivamente bele apoia, promove no armoniza inisiativas iha área kultural ho ninia intervenientes;
- Kria lejislasaun ba promosaun mesenatu kultural (ka halo doasens, fó ajuda ba kultura);
- Lansa (ka fó-sai), iha formatu oioin, Istória Kontemporânea Timor-Leste nian, inklui dadus kona-ba investigasaun história ho levantamento ne'ebé halo iha País tomak, kona-ba período Rezistênsia ho Luta ba Independênsia;
- Disponibiliza expozisoens, espasus muzeulójikus ho instalasens, nebé iha relasaun ho período Rezistênsia no história kona-ba luta nasional, inklui espasus muzeulójikus "Abrigos subterrâneos Rezistênsia nian", fatin sira ne'ebé marka ho eventos importantes, expozisoens permanentes, temporárias ho itinerantes, liuhusi apoiu ho promosaun ba Arkivu ho Museu Rezistênsia Timor nian (AMRT);
- Promove atividades kultura ho artístikas, liu-liu iha área expresoens artístikas, hanesan kriaun prémios nacionais, hodi motiva partisipasaun ne'ebé boot, liuhusi patrosínios ka mesenatu.

2.5 Juventude

Estadu promove no enkoraja inisiativas kona-ba Juventude, iha konsolidasaun ba Unidade Nasional, iha rekonstrusaun, iha defeza no iha desenvolvimentu País. Estadu promove, tuir nia possibilidades, edukasaun, saúde ho formasaun profesional ba Jovens sira.

Jovens timoroan sira mak hanesan futuros líderes Nasaun nian no iha sira-nia liman responsabilidade atu transforma País ne'e, iha futuro, no kontribui ba nia desenvolvimentu sustentável. Timor-Leste, Nasaun ida ne'ebé liu 50% husi populasaun tomak, mak iha hela idade tinan 20 nia ókos, no maioria husi jovens sira né presiza hetan kualifikasens ne'ebé di'ak liu, ho mos asesu di'ak liu ba oportunidades empregu ba sira-nia realizasaun pesoal no profesional.

Esforsu husi Governu ne'e maka atu kria oportunidades ne'ebé posibilita Jovens sira kronketiza sira-nia potenciál. Kona-ba ida ne'e, no atu alkansa metas nebé iha, Governu hakarak implementa asoens tuir mai, hanesan:

- Implementa Política Nacional kona-ba Juventude ho planus asaun nasionais ne'ebé bele promove dezvoltimentu ho autonomia ba Juventude;
- Implementa Konsehu Nasional Dezenvolvimentu Juventude, hodi kria kondisoens ba koordenasaun ne'ebé di'ak liu entre entidades públicas no privadas, hodi assegura dinamizasaun inisiativas ba jovens sira no atu sira tama iha merkadu trabalhu, no mos garante preparasaun kona-ba políticas ho aplicaun planus de asaun nasionais, ne'ebé relaciona ho estratégias ne'ebé aprova tiha ona iha Política Nacional kona-ba Juventude;
- Estabelese Fundu ida ba Jovens sira, hodi finansia projetus ho programas ne'ebé bele apoia jovens sira iha sira-nia dezvoltimentu rasik (PED 2015);
- Apoia estabesimentu Asosiasaun Jovens;
- Kontinua promove Parlamentu Jovens nian ka "Parlamentu Foin Sa'e", inklui kapasitasaun iha área lideransa, pensamentu krítiku, kapasidade debate ho análise social;
- Harii Sentru Nasional Juventude nian iha Díli (PED 2020);
- Dezenvolve kbit atu loke no hala'o Kampus de Formasaun iha Lideransa, hodi promove kondisaun fízika ne'ebé di'ak, kualifikasoens administrativas, rezolusaun konflitu ho valores sívikus;
- Hadi'a Sentrus Juventude ne'ebé iha ho konstrusaun Sentrus Multifunsoens ba Juventude, iha Munisípius, atu bele fó formasaun iha áreas hanesan línguas ka lian, teknolojias, arte, música, desportu ho edukasaun sívika;

2.6 Desportu

Forma ida mós ne'ebé di'ak liu, atu oinsá bele hadi'a jovens sira-nia karáter no fomenta valores kooperasaun, amizade no ekipa, no mos hadi'a jovens sira-nia kondisaun fízika, mak aposta iha dezvoltimentu Desportu.

Desportu hanesan parte ne'ebé krusiál ka desizivu tebes, iha jovens sira-nia vida, hodi envolve sira barak no di'ak liu iha relasionamentus sosiais no promove diálogo, tolerância, ética, democracia, kompetisaun saudável no, mezmú kapasidade lideransa. Jeralmente, Desportu iha kapasidade atu halibur ema no halo sira servisu hamutuk ba ideal komun ida, hodi promove mos identidade nasional ida ne'ebé forte, buat ne'ebé ita hein no bele dehan husi sidadauns hotu-hotu, iha konstrusaun no dezvoltimentu País nian.

Finalmente, atividade física ne'e hanesan fatór importante ida ba qualidade moris ema hotuhotu nian, hodi asegura ita ema nia produtividade ne'ebé boot liu ho sensasaun bein-estár.

Atu bele promove no insentiva prátika atividades desportivas, husi ita-nia jovens timoroan sira, feto ho mane, Governu sei kontinua dezenvolve metas ho asoens hanesan tuir mai:

- Haré di'ak fali ka revê no implementa Planu Estratéjiku kona-ba Desportu Timor-Leste;
- Finansia, promove no apoia atividades desportu iha comunidades tomak iha País, atu bele promove kompetisoens ka konkursus kona-ba modalidades oioin, iha nível nasional;
- Apoia no dezenvolve rekursus umanus, iha áreas jestaun instalasoens desportivas, treinu no desenvolvimentu atletas, jestaun ekipas ho jestaun eventos;
- Apoia partisipasaun comunidades ho alunas iha atividades desportivas, liuhusi klubas ho eventos desportivos komunitários no eskolares, hodi hadi'a mos koordenaun entre entidades governamentais responsáveis ba área Desportu no entidades governamentais ne'ebé responsáveis ba Edukasaun, ho objetivu promove Desportu Eskolar no entidades governamentais sira ne'ebé responsáveis ba área Desportu ho entidades Municipais, atu bele dezenvolve Desportu Municipal;
- Asegura partisipasaun iha Jogos Universitários CPLP no ASEAN;
- Insentiva no dezenvolve talentus, atu bele promove Desportu alta kompetisaun nian;
- Enkoraja no promove Turizmu desportivu, inklui desportus radikais no desportus marítimus;
- Inside ka foka liu ba desenvolvimentu Desportus populares iha Timor-Leste, hanesan ezemplu, artes marsiais ho futebol;
- Dezenvolve futebol, voleibol ho basketbol, inklui desenvolvimentu ligas, halo parseria ho entidades nacionais no internacionais;
- Apoia Komisaun Reguladora Artes Marsiais nian, atu bele dezenvolve modalidade ida ne'e, ho forma pasífika no gratifikante ba ninia participantes sira, hodi kumpri Lei Artes Marsiais nian iha nível nasional;
- Promove realizaun kompetisaun saudável entre grupu artes marsiais, ho objetivu atu promove amizade no solidariedade entre grupu sira ne'e;
- Reabilita infraestruturas desportivas no harii instalasoens foun, inklui Jinázio multiuzus iha kada Munisípiu (PED 2020) no reabilita Estádio Díli ho kompleksu Jimnodesportivu.

2.7 Teknolojias Informasaun no Komunikasaun (TIC)

Ita moris iha era globalizaun no teknolojia ne'ebé, sidadauns husi kualkér país bele hetan koñesimentu ne'ebé lailais no luan tebetebes. Maibé presiza kria kondisoens atu hetan asesu ba teknolojias informasaun no komunikasaun, hodi inkuti (ka haburas) iha ema no iha instituisoens, sira-nia partisipasaun ativa iha produsaun, disseminasaun no uzu ba koñesimentu ne'e.

Domíniu kona-ba Teknolojias Informasaun no Komunikasaun sei kontribui hodi hadi'a kualidade ensinu no formasaun, ba jestaun ho administrasaun públikas ne'e di'ak liu no ba dezvoltamentu setor privadu, fatores ne'ebé nesesáriu ba kompetitividade ho dezvoltamentu sustentável país nian.

Nune'e, Governu sei kontinua ho asoens hanesan tuir mai:

- Implementa Polítika kona-ba Teknolojias Informasaun ho Komunikasaun;
- Dezenvolve no implementa kuadru legal kona-ba fó apoiu ba uzu Teknolojias Informasaun no Komunikasaun, hodi propoin ba Parlamentu Nasional kona-ba aprovasaun lejislasaun iha matéria kriminalidade informática no jestaun, asesu no protesaun baze de dados pessoal eletrónica sira;
- Kapasita Institutu Teknolojia Informasaun no Komunikasaun, ne'ebé foin mak harii, ne'ebé nia misaun mak atu jere rede informática Governu nian ho entidades públicas seluk-tán, ba modernizasaun Estadu no hadi'a funksionamentu ho prestasaun servisu instituisoens públicas nian;
- Reforsa kapasidades iha instituisoens, no iha infraestruturas no rekursus umanus iha setor ida ne'e;
- Implementa estratégia kona-ba modernizasaun administrativa, hodi dezenvolve valor adisional husi Governu Eletróniku, inklui estabelesimentu plataformas konetividade ho asesu ba internet, iha instituisoens Estadu no Governu nian tomak;
- Proporsiona asoens formasaun iha Teknolojias Informasaun no Komunikasaun ba líderes, administradores, diretores ho funsionários públicos sira hotu;
- Kria infraestruturas ne'ebé prezisa, ba asesu jeneralizadu ba internet iha País tomak, inklui iha áreas rurais, liuhusi kriaun Espasus Internet ou Sentrus Teknolojias Informasaun no Komunikasaun;
- Kontinua realiza akampamentus Teknolojias Informasaun no Komunikasaun nian iha País tomak;
- Promove kriaun konteúdu ne'ebé adapta ba sirkunstânsias ho nesesidades lokais;
- Promove no fasilita asesu Feto sira-nian ba Teknolojias Informasaun no Komunikasaun foun;
- Promove investigasaun científica, inovasaun ho kompetitividade ne'ebé uza teknolojias informasaun no komunikasaun;
- Kria parcerias ho setor privadu nasional no internacional, atu bele dezenvolve Teknolojias Informasaun no Komunikasaun, nudar instrumentu ne'ebé útil ka di'ak ba akizisaun, produsaun no difuzaun koñesimentus;
- Kontinua oferece formasaun gratuita, iha área informática, husi ótica utilizador nian, dezeńu gráfico no uzu teknolojias informasaun foun ba peskiza ho investigasaun no kriaun negócios.

2.8 Komunikasaun Sosial

Konstituísan Repúblika determina katak sei garante liberdade ba imprensa no ba meius komunikasaun sosial seluktán, inklui liberdade expresaun ho kriaun husi jornalistas, asesu ba fontes informasaun, liberdade editorial, protesun ba independênsia no ba sijilu (ka segredu) profisional no direitu kona-ba estabelese jornais, publikasoens no meius difuzaun seluktán.

Estadu tenke asegura liberdade no independênsia husi Órgauns Públikus komunikasaun sosiál nian hasoru Poder Polítiku no Poder Ekonómiku, no garante labele iha monopóliu kona-ba meius komunikasaun sosial.

Sei kompete mos (ka sai responsabilidade) ba Estadu atu asegura ezistênsia Servisu Públiku ba Rádiu no Televizaun, ne'ebé tenke izentu, hodi haré mos, entre objetivos sira-seluk, kona-ba protesun no divulgasaun kultura no tradisoens Timor-Leste nian, no mos garantia kona-ba expresaun tuir pluralizmu opiniaun.

Tanba ne'e, mak Governu sei kontinua:

- Apoia no reforsa Ajênsia Notícias Timor-Leste nian, TATOLI;
- Apoia no reforsa Konsehu de Imprensa, núdar órgaun independente regulador ba setor komunikasaun sosial;
- Kontinua apoia programas diseminaun kona-ba Asaun Governativa, hodi promove koñesimentu públiku nian ba asaun governativa ho transparênsia ne'ebé boot liu kona-ba governasaun;
- Kontinua apoia RTTL, E.P. inklui hadi'a infraestruturas físicas ho atualizasaun ekipamentus téknikus, no mós iha implementasaun Planu Estratéjiku ida ba Imprensa, atu nune'e bele hadi'a qualidade ho kuantidade informasaun ne'ebé divulga;
- Propoin ba Parlamentu Nasional atu aprova leislasaun hodi regula setor komunikasaun audiovisual iha Timor-Leste;
- Estabelese Institutu ba Formasaun de Jornalistas no kontinua aposta iha formasaun jornalistas ba dezvoltamentu no diversifikasaun setor ida ne'e;
- Dezenvolve mekanismus ba kooperasaun intersetorial, ne'ebé bele potencia (ka optimiza) uzu ne'ebé korretu kona-ba línguas ofisiais husi jornalistas sira;
- Dezenvolve mekanismus ba kooperasaun intersetorial, hodi fomenta no divulga lian ofisiais ba populaun tomak;
- Apoia Konsehu de Rádios Komunitárias no estabeleimentu estasoens rádios komunitárias foun;
- Apoia Asosiasoens Jornalistas Nasionais;

- Insentiva asesu no partisipasaun Feto, iha órgauns de komunikasaun sosial;
- Inkrementa ka dezenvolve perspetiva kona-ba Jéneru iha Órgauns Komunikasaun Sosial no insentiva kampañas no programas ne'ebé bele promove uza lian oficial sira, identidade nasional, edukasaun ba sidadania, knar feto nian iha sosiedade no konhesimentu tékniku no sientífiku;
- Promove diversifikasaun Órgauns Komunikasaun Sosial, no mos iha nível Munisipal.

2.9 Relijiaun

Konstituisaun Timor-Leste asegura, ba ema hotu-hotu, liberdade de konsiênsia, relijiaun no kultu, maibé iha separasaun konfisoens relijiozas husi Estadu. Ema ida sei la hetan persegisaun ka diskriminasaun, tanba ninia konviksoens relijiozas, hodi mós iha garantia ba liberdade hanorin ba kualkér relijiaun, tuir ida-idak nia fiar.

Governu sei kontinua apoia no kolabora ho instituisoens no konfisoens relijiozas nebé eziste, hodi insentiva sira hala'o inisiativas ne'ebé bele promove valores morais no étikus iha sosiedade laran no mos promove paz, armonia familiar no sosial ho mós tolerânsia.

2.10 Sosiedade Sivil

Sosiedade Sivil hanesan parte determinante iha prosesu konstrusaun Estadu, iha dezvoltimentu no konsolidasaun demokrátika iha Timor-Leste.

Parseria entre Governu ho organizasoens Sosiedade Sivil tenke reforsa, hodi bele iha partisipasaun ne'ebé ativa no responsável liután, iha implementasaun agenda estratéjika ba dezvoltimentu País nian.

Apoia Sosiedade Sivil atu kumpri nia papel, sai hanesan parte integrante husi estratéjia Ezekutivu nian, atu asegura boa governasaun no promove inklusaun sosial.

Konstrusaun Nasaun ida ne'ebé saudável, implika (ka husu) dezvoltimentu Sosiedade Sivil ida ne'ebé mos saudável no independente.

Governu sei, ho ida ne'e, kontribui hodi hadi'a kapasidades, inisiativas ho asoens Sosiedade Sivil nian, promove mos tolerânsia, paz ho dignidade umana no mantein Estadu responsável, ba nia asoens no fó solusoens alternativas no progresistas ba País.

- Desenvolve quadro legal ida, ne'ebé viabiliza possibilidades atuasaun organizasoens Sociedade Sivil, iha vida ekonómika, sosial no política país nian, inklui definisaun kona-ba áreas prioritárias ba intervensaun;
- Halo estudu ida no averigua (katak buka hatene didi'ak) iha ka la iha sustentabilidade financeira kona-ba atribuisaun (ka fó deit) fundus no kona-ba insentivos fiskais ne'ebé organizasoens sociedade sivil hetan ka simu, atu nune'e Estadu bele hasai desizaun nebé lós;
- Hadi'a apoiu ba implementasaun atividades Sociedade Sivil nian, inklui koordenaun no diálogo ne'ebé di'ak liu ho Governu;
- Promove no dinamiza kooperasaun entre Sociedades Sivils husi países ou grupos países (hanesan liuhusi CPLP ho ASEAN) ho objetivu atu explora oportunidades desenvolvimentu ekonómiku, kultural, sosial no polítiku, no mos asoens solidariedade no defeza direitos humanos;

2.11 Abitasaun

Ema hotu-hotu iha direitu, ba nia an rasik no ba nia família, ba abitasaun (ka uma) di'ak ida ho luan ne'ebé natón, ho kondisoens ijiene no konfortu, ne'ebé bele prezerva intimidade pesoal ho privacidade familia nian.

Atu proporsiona abitasaun ne'ebé kondigna ba ita-nia sidadauns sira, Governu sei:

- Revê Política Nacional ba Abitasaun, tinan 2007 nian, hodi desenvolve Programa Nacional Abitasaun, iha nebé inklui kestoens sustentabilidade, hodi garante, tuir prazu, abitasaun ne'ebé kondigna ba timoroan hotu-hotu, ho asesu ba bee moos no rezervatóriu, instalasoens saneamentu individuál (hari'is fatin), koziña ka dapur, eletrisidade ho nível konfortu ne'ebé tuir padroens modernus;
- Kria regulamentus hodi estabelese rekeзитus mínimus, atu bele hari'l no asegura konstrusaun uma ne'ebé dignu, ne'ebé promove habitabilidade ho kondisaun seguransa no mós no ho hijiene;
- Haré di'ak fali no reforma Programa kona-ba Objetivus Desenvolvimentu Milénio (MDG Sukus – PED 2015);
- Kria no implementa programa apoiu ba rehabilitasaun no konstrusaun uma, hodi hadia qualidade núdar hela fatin;
- Introduz técnicas modernas ho materiais konstrusaun ne'ebé di'ak no haree tuir kultura, tradisaun ho klima Timor-Leste, envolve partisipasaun comunidades lokais durante prosesu tomak;

- Estuda no implementa programa kona-ba promosaun atu hari'l uma hosi investidores privadu sira, iha fatin foun, liuhosi Planu Urbanizasaun ne'ebé planeadu no ho infraestruturas hotu ne'ebé aprovaadu ona;
- Asegura akompañamentu permanente ba comunidades, relaciona ho forma oinsá nia abitasoens bele simu animais hakiak, hodi forma no sensibiliza líderes komunitáriu ho xefes família kona-ba kestoens Saúde Pública, ne'ebé asosia ho konvíviu (ka moris hamutuk) ho animais.

3. KONTINUA HO DEZENVOLVIMENTU INFRAESTRUTURAS

“Pilar sentral ida hosi Plano Estratéjiku ba Dezenvolvimentu maka konstrusaun no manutensaun iha infraestuturas oioin ne'ebé produtivas”.

Infraestuturas, importante tebes ba dezenvolvimentu ekonómiku no sosial, maibé sai duni dezafiu bot, tamba infrastrutura ne'e nia eskala no kustus asociadus ba implementasaun rede infraestrutural ida, maka permite atu sustenta produtividade, kriaun servisu no dezenvolvimentu ba sektor privadu, iha nível nasional.

Ho razaun ida ne'e, planeamentu, orsamentasaun, monitorizasaun no avaliasaun halo parte importante iha estratéjia ida ne'e. Nune'e, iha tempu badak, Governu propoin halo levantamentu ida klean, hosi infraestruturas hotu no projetu ne'ebé la'o hela, hodi halo avaliasaun foun, korresaun no restruturasaun iha planu infraestruturas nian, hodi hadi'a no hamenus tiha falhas hirak ne'ebé eziste, kona-ba infraestruturas bázikas iha País laran.

Prioridade prinsipal hosi Governu, kona-ba setor infraestruturas nian maka, sei eziye profesionalismu bot liu hosi rekursus humanus no empresas nebé hetan kontratu iha sektor ida ne'e, hodi implementa reforma institucional ida ne'ebé inklui ona planeamentu ne'ebé diak, monitorizasaun, inspesaun no fiskalizasaun ba projetus no obras hirak ne'ebé la'o hela.

Ho hanoin katak, atu konstrói ekonomia produtiva no moderna, maka presiza kontinua hala'o investimentu iha infraestruturas ho eskala bot, nesesáriu tebes garante konstrusaun ho qualidade no asegura ninia kustu-benefísiu, hodi mos loke dalan ba investimentus ne'ebé nesesáriu iha futuru, kona-ba operasaun no manutensaun, no hodi haré ba rekursus ne'ebé disponível no ninia sustentabilidade iha loron ikus.

Iha hakarak katak, ho planu infraestruturas ida ne'e, bele kombate pobreza bot iha rai laran. Iha ámbitu ida ne'e, maka liuhosi konstrusaun infraestruturas bázikas, Governu hakarak mós:

- Kria kondisoens ba Saúde diak liu, nune'e mós bem-estar fíziku, mental no sosial ba sidadauns sira, ida ne'e inklui: fasilita asesu ba prestasaun kuidadus saúde primáriu, sekundáriu no tersiáriu; hadi'a ambiente fíziku, inklui estradas, pontes ne'ebé seguru no hanoin ba konstrusaun ekilibrada iha, infraestruturas, hodi hamenus risku poluisaun no degradasaun ambiental, nomós investe iha limpeza urbana; fasilita no promove asesu ba uma-mós ho kondisaun ne'ebé diak ba saúde pública; kria kondisaun ba saneamentu báziku no asesu ba eletrisidade, iha 24 oras nia laran, iha teritóriu tomak;
- Kria kondisoens ba Edukasaun ne'ebé diak, liuhosi asesu barak no diak liu-tan ba fatin hanorin, ba formasaun profisional no ba konsumu kultural. Ne'e inklui mós atu fornese Bé, Saneamentu báziku, eletrisidade no asesu ba internet no mós ba teknolojia foun iha informasaun no komunikasaun nian;
- Kria kondisoens ba investimentu privadu no ba kresimentu ekonómiku, tanba liuhosi prestasaun kondisoens diak iha transporte, komunikasaun no forneseimentu enerjia, maka bele dinamiza no diversifika ekonomia. Maibé, tenki planeia tuir potencialidade Rejiaun ida-idak nian no tenki haré kona-ba nia efeito multiplikador iha sektore sira seluk, hodi fó benefísius ekonómikus ba populusaun tomak;
- Kria kondisoens ba empregu, hodi fasilita mobilidade no asesu ba oportunidade servisu nian, nune'e mos oportunidades hirak ne'ebé sei mosu husi kresimentu ekonómiku no husi investimentu privadu, nebé sei buras tan iha Rai laran. Maibé, liu-liu, prosesu konstrusaun ba infraestruturas ne'ebé naturalmente presiza kuantidade bot no variedade hosi maun-de-obra, hodi nune'e mosu tan oportunidades atu hadi'a kualifikasaun no espesializasaun ba itania emar, liuhosi negosiasaun iha kontratus, entre Governu ho empresas kontratadas, nebé halo konstrusaun ba grandes projetus iha infraestrutur.

3.1 Governasaun iha Sektor Infraestruturas

Sei halo levantamentu kléan ka detalhadu ida, ne'ebé bele hamosu atualizasaun ba infraestruturas bázikas hirak ne'ebé iha ona no ba projetus infraestrutur hirak ne'ebé la'o hela, hodi halo reavaliasaun, korresaun no re-estruturasaun ba planu infraestruturas, nune'e bele aseguara konstrusaun ho kualidade ho ninia kustu-benefísiu, no bele projeta investimentus ne'ebé presiza iha futuru, haré husi operasaun no manutensaun, hodi hatene lolós kona-ba rekursus ne'ebé iha no sustentabilidade iha futuru.

Ba hanoin ida né, Governu hakarak mós, iha termus espesifikus, atu:

- Investe, racionalmente no ho forma sustentável, reseitas husi Fundu Petrolíferu ba infraestruturas bázikas modernas no produtivas, no sei halo koordinasaun ne'ebé estratéjika ba planeamentu ne'e rasik ho dezvoltimentu sektore sira seluk no ba politikas dezvoltimentu;
- Hadi'a jestaun Fundu Infraestrutura nian, ne'ebé harí iha tinan 2011, hodi kontinua implementa projetus ho dimensaun boot, plurianuais, ho prioridade ba projetus hirak ne'ebé atu promove dezvoltimentu sosioekonómiku Rai laran nian, nune'e bele kontribui ba halakon kiak no hadi'a moris sidadauns sira-nian. Fundu Infraestuturas sei kontinua finansia, aleinde projetus de infraestruturas bázikas, edifísius públikus no projetus iha área Edukasaun, Juventude no Desportu, Saúde, Defeza no Seguransa, habitasaun sosial no seluk tan, hanesan móa iha sistemas finanseirus no infraestuturas de apoiu;
- Reforsa no kapasita Komisaun Nasional Aprovezimentu, atu sai efikaz, eficiente no transparente liu tan, iha prosesu provezimentu ne'ebé relasiona ho infraestruturas, inklui mós funsaun núdar apoiu ba linhas ministeriais sira hotu, iha prosesu provezimentu iha teritóriu nasional tomak;
- Reforsa no kapasita Ajénsia Dezvoltimentu Nasional, sai efikaz, eficiente no transparente liu, iha prosesus no propostas ba sektor infraestruturas, inklui fiskalizaun prévia no planeamentu ba projetus, nune'e mós iha ninia funsaun kona-ba jestaun ba implementasaun, monitorizasaun, fiskalizaun no avaliaun;
- Asegura efisiénsia, efikásia no transparénsia, iha sistema investimentu ba infraestruturas no projetus boot nian, inklui prosesu provezimentu, jestaun ba kontratus no sistema de pagamentus;
- Haforsa sistema monitorizasaun, inspesaun, fiskalizaun no avaliaun ba projetus infraestruturas sira no projetus boot, iha nia realizaun ka implementasaun fízika no finanseira;
- Estabelese parseria ida entre Ministériu Obras Públikas no Universidade Nasional Timor Lorosa'e hodi reforsa meius kontrolu ba kualidade konstrusaun infraestruturas sira;
- Kontinua halo avaliaun, hodi halo (ka fó) sertifikadu ba Emprezas konstrusaun sivil nian, hanesan mós ba Konsultoria Téknika sivil;
- Dezenvolve no atualiza padroens no kritérius ba konstrusaun infraestruturas bázikas;
- Kontinua superviziona, monitoriza no avalia kualidade materiais ne'ebé uza iha konstrusaun projetus infraestruturas;
- Halo estudu no análise ba kualidade, hodi haré daudauk ona ba utilizaun matérias-primas lokais, nune'e mós iha utilizaun bens no materiais seluk, hodi hamenus importasaun, nebé sustenta hela kresimentu sektor infraestruturas;
- Aumenta kapasidade 'mão-de-obra' (ka badaen) timor-oan nian, iha nível nasional, munisipal no rural;

- Asegura, iha kontratos nebé sei halo iha futuru, partisipasaun bot badaen (ka mao-de-obra) timor-oan, inklui hadi'a kondisoens servisu nebé dia liu no oportunidade ba formasaun no estájius profisionais;
- Insentiva partisipasaun sektor privadu nasional iha desenvolvimentu infraestruturas;
- Haforsa kooperasaun bilateral ho nasoens sira seluk, hodi halo kooperasaun iha infraestruturas ba obras públicas.

3.2 Rede Rodoviária

Governu sei kontinua implementa planu infraestrutura ba rede rodoviária iha Rai laran, inklui konstrusaun, reabilitasaun no manutensaun ba estradas nasionais, munisipais no rurais tuir kritériu internasionál ba nia qualidade no iha seguransa.

Iha biban ida ne'e, destaka mós asaun no metas prinsipais hanesan tuir mai:

- Hadi'a estradas rurais, hodi uza kontratores lokais (PED 2015 - 1270 km), hodi implementa Programa ba Dezenvolvimentu Estradas Rurais no Planu Mestre no Investimentu Estratéjiku kona-ba Estradas Rurais;
- Halo reabilitasaun ba estradas nasionais ho rejionais no urbanas (iha capital distritos), tuir padroens internasionais (PED 2022);
- Realiza estudus anuais iha monitorizasaun kondisaun estradas iha estradas hotu-hotu ne'ebé reabilita, atu nune'e bele determina nesesidade ba halo manutensaun (PED 2015);
- Kompleta planu ba autoestrada nasional sirkunvalasaun nian (PED 2015) – hahú ona konstrusaun ba Faze I autoestrada hosi Suai ba Zumalai no bele hotu iha tempo badak. Ba II to'o IV fase, mak Governu tenki revê didiak desenhú ho nia detalhes hotu, antes de loke konkursu aprovizionamentu;
- Halo estudu kona-ba monitorizasaun ba pontes ne'ebé eziste (ka iha ona) iha rai laran no asegura nia reabilitasaun no manutensaun ne'e rasik, hanesan mos konstrusaun ba pontes foun, iha áreas nevrálgicas iha Rai laran;
- Hala'o estudu kona-ba monitorizasaun ba kontrolu xeias no kontinua asegura konstrusaun bronjong no gabiaun iha teritóriu nasional tomak;
- Halo hotu koneksaun rodoviária Dili-Manatutu-Baucau tuir padraun internasionál (PED 2015) – trosu ida ne'e, fahe ba Seksaun 2, I Seksaun Hera-Manatuto, no progresso físiku to'o 30,45%, no II Seksaun Manatuto-Baukau, ninia progresu to'o 39%;
- Halo hotu koneksaun rodoviária Baucau-Lospalos-Com (PED 2015) – La'o hela, nia progresu foin 5.61%; Ba fali Lautém-Lospalos no Lautém-Kom, sei iha faze verifikasaun ba dezenhu;

- Halo hotu koneksaun rodoviária Manatuto-Natarbora tuir padraun internasionál (PED 2015) – Hala’o hela rehabilitasaun ho Seksaun 2: I Seksaun Manatuto-Laklubar (kruzamentu) ho ninia progresu fiziku 85% no, iha II Seksaun, Laklubar (kruzamentu)-Natarbora ho ninia progresu nebé neineik to’o ona 55%;
- Halo hotu projetu rodoviária Dili-Aileu-Maubisse-Aituto-Ainaro-Cassa (PED 2015) – Projetu ida ne’e fahe ba Seksaun 5: I Seksaun Dili (Halilaran)-Laulara, hotu ona; II Seksaun, Laulara-Solerema iha faze tenderizasaun iha CNA; III Seksaun, Solerema-Bandudato, hotu ona. IV Seksaun Bandudatu-Aitutu, la’o hela ho progresu fiziku 67.36% no V Seksaun Aituto-Ainaru, progresu fiziku 51.71%. Seksaun Ainaro-Kasa, fahe fali ba rua – I Seksaun mak atu loke Estrada foun alternativa ida, tamba ‘Jakarta Dua’; II Seksaun ba Ainaro-Kasa rasik no progresu fiziku 60% ona;
- Kompleta projetu rodoviáriu Suai-Beaço (PED 2015) – projetu ida ne’e fahe ba seksoens 4. Seksaun I Suai-Zumalai (Fatukai), progresu fiziku to’o ona 80%. Ba seksoens seluk, sei halo revizaun ba dezenho, inklui estudu rai. Iha Costa Sul, reabilita hela mós Salele-Zumalai (Harekain) no Zumalai-Bobonaro;
- Sei hare didiak ba projetu rehabilitasaun Suai-Cassa-HatuUdo-Betano-Natarbora-Viqueque-Beaço (PED 2022);
- Estradas seluk ne’ebé iha hela prosesu konstrusaun: 1 - Maliana–Cailaco –Hatolia–Ermera; 2 -Tutuala-Valu;3 Manatuto-Laclo; 4 - Com–Cruzamento Fuiloro; 5 -Cruzamento Metinaro–Laclo; 6 - Tilomar–Cruzamento Fatumean; 7 - Ainaro–Bobonaro; 8 - Baucau–Venilale– Ossu–Viqueque (fase de concurso publico); 9 - Aituto–Hatubulico– Letefoho–Gleno (faze de estudo de viabilidade e desenho detalhado);
- Estradas ne’ebé seidak no prezisa atu halo: 1 - Iliomar–Uato Carbau; 2 - UatoCarbau–UatoLari-Viqueque; 3-Viqueque–Lacluta; 4-Dilor–Natarbora–Betano–Same; 5-Manatuto–Laclo; 6 - Aileu–Liquidoe; 7 - Cruzamento Remexio–Remexio; 8 -Suai – Fatululik; 9 - Lospalos–Lore–Iliomar; 10 -Cruzamento Lolotoe – Lolotoe; 11 - Ainaro – Hatu Udo, no sst.

3.3 Bé-mós no Saneamentu Báziku

Investimentu iha asesu ba Bé-mós no Saneamentu báziku labele adia (ka dada) tan. Laiha infraestrutura ida ne’e maka sei afeta ba saúde pública, inklui hadaet moras, mate, no desenvolvimentu ladiak ba labarik sira.

Investe iha Bé-mós no Saneamentu, ne’e investe iha Saúde, Edukasaun, iha meu ambiente no iha kresimentu ekonómiku, inklui hadia oportunidade ba empregu no produtividade Nasaun nian. Investimentu estratéjiku ba área hirak ne’e, importante tebes ba kresimentu ekonómiku no ba moris diak populasau nian. Iha biban ida ne’e, Governu rekonhese katak, laiha (ka seidak iha)

investimentu substansial ida ba setor ida ne'e to'o agora, no hatene katak investimentu iha Saneamentu Báziku hanesan prioridade ida, nomós hanesan forma ida hodi halakon kiak.

Objetivus husi Governu, ba iha área ida ne'e, maka:

- Fo'o asesu Bé-mós ho Abastesimentu nebé seguru no sustentável, ba konsumu privadu sidadauns hotu-hotu, nune'e mos ba agrikultura, komérsiu no indústriia;
- Hadi'a indikadores iha área Saúde, Edukasaun no iha dezvoltamentu sosial no ekonómiku, liuhosi facilidades de asesu ba Bé-mós no Saneamentu Báziku, iha teritóriu tomak;
- Asegura katak timor-oan hotu hetan asesu ba Saneamentu Báziku ne'ebé diak, iha teritóriu tomak, liuhosi sistema esgotos nebé autosufisientes no ho qualidade, inklui konstrusaun Sentrus de tratamentu, no sei fó asesu ba instalasoens sanitárias públicas, iha Kapital no iha Munisípius;
- Asegura sistemas drenajen ho qualidade, iha Dili no iha Munisipius tomak;
- Investe iha reabilitasaun, hadi'a no loke tan sistemas irigasaun, liu-liu iha áreas rurais, liu husi kordenasaun nebé diak ho sektor Agrikultura, hodi asegura autosufisiensia hahán no halakon malnutrisaun iha País;
- Asegura formasaun técnica ba timor-oan sira, iha setor Bé no Saneamentu Báziku no assegura kapasitasaun institucional ba entidades no organismos ne'ebé jere, implementa, monitoriza no fiskaliza setor ne'e;
- Kria mekanismus nebé diak atu hasoru mudansas klimáticas no atu prevene efeitos nebé ladi'ak ba infraestruturas bé-mós no saneamentu ninan.

Atu konkretiza objetivus hirak ne'e, Governu sei dezvoltave aksoens hirak tuir mai, hodi alkansa metas nebé trasa:

- Asegura katak 75% populasaun rural, iha Timor-Leste, hetan asesu, ne'ebé diak no sustentável, ba Bé-mós (PED 2015);
- Asegura katak Eskolas Públicas hotu-hotu sei hetan kanalizasaun ba Bé-mós (PED 2020);
- Kria mekanismus koordinasaun intersektorial, hodi dezvoltave planu estratéjiku ida ne'ebé konsistente ba jestaun Bé-mós;
- Aprova no implementa Planu de Investimentu, Políticas no Reforma Institucional 2018-2030, hodi kumpre metas hirak ne'ebé define ona iha PED no iha Objétivu VI husi Objétivus ba Desenvolvementu Sustentável (ODS). Planu ida ne'e, sei identifika investimentus nebé prezisa ba abastesimentu Bé-mós no Saneamentu iha teritóriu tomak, hanesan mós lejislasaun ne'ebé nesesária ba setor ida ne'e, no hodi prevé ona kriaun identidade pública ida, tuir rejime administrasaun indireta Estadu nian, hanesan Institutu Público ka Empresa Pública.

- Dezenvolve estudus, análizes no planus investimentu, ne'ebé orienta ba foti desizaun kona-ba opsoens nebé diak liu atu investe iha sektor Bé;
- Dezenvolve no implementa estudus, análizes no planus investimentu, ne'ebé orienta ba hili opsoens kona-ba sustentabilidade nebé diak liu, ba manutensaun no operasaun sistema abastesimentu Bé-mós;
- Aprova Política Nacional ba Jestaun Rekursus Hídrikus;
- Aprova Política Nacional ba Abastesimentu Bé-mós;
- Aprova kuadru legal ne'ebé presiza, hodi halo implementasaun ba políticas jestaun rekursus hídrikus nian no abasatesimentu Bé-mós;
- Implementa Planu Diretor kona-ba Abastesimentu Água no Saneamentu Dili no iha kapitais munisípais sira seluk;
- Halo revizaun ba política no projetus hirak ne'ebé relasiona ho sistemas irigasaun, tuir técnicas no metodolojia ne'ebé moderna, ba konstrusaun sistemas irigasaun ne'ebé diak liu no resistente hasoru mudansas klimáticas, inklui sistema irigasaun ho baze lori Bé husi rai okos (subterrâneo);
- Identifika fontes foun Bé nian, inklui desalinizasaun, konstrusaun reservatórios no instalasoens ba tratamentu Bé, iha teritóriu nasional tomak no continua loke tan rede abastesimentu Bé iha teritóriu nasional tomak;
- Asegura katak áreas urbanas munisípais iha instalasoens sanitárias ho kondisoens diak (PED 2020);
- Halo koneksaun/ligasaun sistema esgotu ba uma hotu-hotu ne'ebé eziste iha Dili no, wainhira la bele, garante nia ligasaun ba fosa séptica ka asesu ba instalasaun sanitária komunitária nian (PED 2020);
- Hadi'a koordinasaun ho parseirus dezvoltamentu, iha projetus kooperasaun iha âmbito abastesimentu no jestaun Bé no Saneamentu iha áreas rurais, hodi garante investimentus ne'ebé importante iha comunidade rurais;
- Aprova no implementa política tarifária ida ne'ebé inklui tarifa ne'ebé diferente ba consumidores diferentes, husi particulares ba consumidores komersiais no industriais;
- Dezenvolve infraestruturas ne'ebé adekua, inklui sistema operasaun no manutensaun hodi rekolha, tratamentu no hamós esgotus (PED 2020);
- Hadi'a monitorizasaun no sistema kontrolu hodi rekolha no tratamentu ba Bé foer iha instalasoens públicas, komersiais, industriais, sosiais no residenciais;
- Implementa legislasaun no regulamentus, ne'ebé vigora hela, hodi dezenvolve sistemas integradus ba jestaun ba sasán foer tós iha sidade laran;
- Implementa Plano Mestre ba Saneamentu ho Drenagem iha Dili;
- Hadi'a sistema Drenajen iha Munisípius hotu, hodi asegura konstrusaun sistemas drenajen ba bé udan-nian (PED 2020);

- Dezenvelope projetus formasaun profisional no kapasitasaun institucional hodi dezenvelope infraestruturas ba Bé no Saneamentu Báziku, inklui manutensaun no operasionalizasaun ba sistemas hirak né, liuhusi koordinasaun intersektorial ho entidades governamentais relevantes;
- Asegura atu harí mekanismus ba monitorizasaun, prevensaun no aksoens kona-ba alterasaun klima, hodi hamenus ninia efeitu iha infraestruturas Bé no saneamentu báziku, liu husi koordinasaun intersektorial ho entidades Governo nian ne'ebé relevantes.

3.4 Enerjia

Asesu ba forneseimentu eletrisidade, regular no fiável, sai núdar direitu báziku no aliserse ba kresimentu ekonómiku iha Timor-Leste. Ho ida ne'e, kontinua investe iha setór ida ne'e, krusial hodi hadi'a qualidade moris timoroan sira-nian no hodi fó apoiu ba kresimentu Indústrria, Komérsiu no Turizmu, hodi kontribui ba desenvolvimento ekonómiku ho sosiál, iha áreas rurais no urbanas.

Governu hakarak nafatin kontinua aposta iha hadi'a sistema tranzmisaun no distribuisaun enerjia eléktrika, no mos investe iha espansaun sistema enerjia renovável.

3.4.1 Forneseimentu Eletrisidade

Governu sei fó prioridade ba asaun no metas tuir mai:

- Asegura katak populasaun tomak hetan asesu ba eletrisidade, iha 24 oras loron loron, liuhosi espansaun Programa Eletrifikasaun nasionál no mos liuhosi uza fonte enerjia renovável (PED 2015) - Iha capitais Municipios hotu-hotu, populasaun iha asesu ba eletrisidade 24/oras por dia, nuné mós iha Postos Administrativos. Husi 442 sukus, 76% sukus hetan mós asesu ba eletrisidade, hanesan mós 64%, husi total aldeias, iha ona asesu ba eletrisidade. Kona-ba Atauro, seidauk halo duni estudo de viabilidade diak ida, atu bele konkretiza plano sustentável de eletrifikasaun ba ilha ida ne'ebá.
- Analiza pontu situasaun iha zonas rurais, liu-liu iha áreas remotas, no dezenvelope planu konkritu ida kona-ba eletrifikasaun rural, inklui liga redes ki'ikoan ba rede nasionál ka oferece fontes enerjia renovável;
- Hare'e fali Programa Eletrifikasaun Nasionál, liuhosi planu ne'ebé uza ona iha anteriór, hodi hadi'a produsaun no distribuisaun eletrisidade iha teritóriu tomak no kontinua halo instalasaun no manutensaun ba liñas média no baixa tensaun;

- Organiza fali setór Eletridade nian no implementa planu foun ida ba País;
- Reestrutura fali Eletridade Timor-Leste (EDTL), hodi garante prestasaun servisu di'ak no fiskalizaun di'ak, hodi haré ba efisiénsia boot iha operasionál no iha ekonómika;
- Aprova no implementa Polítika Tarifária ida ne'ebé inklui tarifas ne'ebé la hanesan ba konsumidores ketak-ketak, ba partikulares, no mos ba komersiais ho indústriais.

3.4.2 Gás Natural

Timor-Leste iha asesu ba reservas barak hosi gás natural, iha Tasi Timor. Disponibilidade gás natural ba produsaun eletridade iha potencial atu oferese kombustível ida baratu no mós, kompara ho kombustível líkidu. Haré ba ambiente nian, ho kuantidade ne'ebé hanesan hosi eletridade produzida, emisaun carbono eletridade produzida husi gás natural ne'e, konsidera ki'ik liu, hosi eletridade ne'ebé produzida hosi diesel.

Ho ona asinatura tratadu entre Timor-Leste no Austrália konaba Fronteiras Maritimas iha Tasi Timor, Governu sei hahú negosiasaun ho kompanhias petrolíferas kona-ba desenvolvimentu kampu Greater Sunrise no buka atu garante konstrusaun ba instalasaun prosesamentu gás, iha Kosta Sul Timor-Leste nian. Iha âmbito ida ne'e, sei desenvolve estudu viabilidade ida kona-ba utilizaun gás natural hodi produz eletridade, sei halo esforsu hodi utiliza enerjia ne'ebé bele gasta menus no bele tulun iha problema ambiental.

3.4.3 Enerjia Renovável

Fonte Enerjia Renovável bele kontribui ba kresimemtu ekonómiku no hamenus nível kiak iha áreas rurais remotas. No mós kontribui ba ambiente nebé ladun poluídu no bele hamenus impaktu ba alterasaun klimátika. tuir kompromisus ne'ebé asumi iha Konvensaun Internasional.

Iha âmbito ida ne'e, sei halo fali estudu hodi haré ba implementasaun projetu produsaun enerjia renovável ne'ebé la poluente, hanesan mós:

- Enerjia hidroeléktrika ne'ebé produz ho rekursu hosi Bé, tuir estudu viabilidade kona-ba potencial projetus hidroelétrikus.
- Enerjia Eólica: tuir estudus preliminares ne'ebé halo ona, liu-liu iha rejiaun foho, ne'ebé iha potencial hodi instala turbina eólica, hanesan mós parke eólica iha Lariguto no Bobonaro.
- Enerjia solar: kontinua desenvolve estudus no promove inisiativa ne'ebé uza klima favorável Timor-Leste nian no taxa luz solar loron-loron, hodi halo instalasaun ba sistema produsaun enerjia solar.

- **Enerjia Biomasa:** dezenvolve estudus no projetus ba produsaun enerjia liuhosi ai-horis, lixu agríkola no lixu animal nian, hanesan mós lixu domestiku no industrial, ne'ebé bele transforma ba biomasa no konverte ba electrisidade.

Nune'e, Governu sei hala'o asoens hirak hanesan tuir mai:

- Estabelese Gabinete Rekursus Naturais Renováveis, ne'ebé kordena asaun iha nível intersetorial, halo análise no estudus de viabilidade kona-ba setor ida ne'e, no ne'ebé sei responsabiliza ba implementasaun projetus enerjia renovável, inklui jestaun, monitorizasaun no avaliasaun (parte balun, inklui ona iha objetivos PED);
- Kontinua investe iha programa eletrifikasaun rural, liuhosi apoiu tékniku no finanseiru ba comunidade, hodi halo produsaun no utilizaun fonte enerjia renovável;
- Asegura katak metade hosi nesesidade kona-ba enerjia elétrika ne'e sei jere liuhosi fonte enerjia renovável (PED 2020);
- Hala'o fali estudu viabilidade kona-ba potencial Mini-Hídricas iha teritóriu tomak;
- Harí Sentral Larigutu no Bobonaro, hanesan modelu ba desenvolvimentu eólico (PED 2015);
- Garante katak, pelu menus hosi 100.000 familias, bele asesu ba sistema enerjia solar (PED 2020);
- Dezenvolve poténsia enerjia solar, liuhosi Sentru Solar Dili (PED 2015); Dezenvolve estudu viabilidade ida ba konstrusaun sentral termoelétrika hodi jere enerjia hosi lixu doméstiku no industrial iha Dili. (PED 2015).

3.5 Transportes

Kria kondisaun ba kresimentu ekonómiku, hadia no aumenta sirkulasaun ema no sasán, ne'e fundamental hodi implementa vizaun ne'ebé hatúr iha Planu Estratéjiku Desenvolvimentu Nasional 2011-2030. Nune'e, urjente atu hadi'a sistema transportes terrestres, marítimus no aéreo no kria sistema previzaun meteorolójika ida ne'ebé, ho buat seluk tan, bele oferece seguransa liu-liu kona-ba sirkulasaun aérea.

Ho ida ne'e, Governu sei haré fali pontu situaun kona-ba sektor transportes, hodi aprova Planu Mestre Integrado Transportes nian, hadi'a kapasidade institucional iha sektor ida ne'e no fó kapasitasaun, hodi forma rekursus humanus ne'ebé presiza.

Sei kontinua mós atu produz Lei ne'ebé presiza no implementa kuadru legal ne'ebé vigora hela, ho forma integrada, atu garante seguransa transporte, no asegura kordenasaun intersetorial.

Sei hadi'a mos seguransa Sistema Transportes Públikus nian, liu husi implementasaun estrutura ida hodi rejista, analiza no hato'o relatoriu kona ba atividades nebé relasiona ho transportes, tamba bele hakanek, halakon vida, ou halakon ka estraga ema-nia sasán. Estrutura ne'e sei mos investiga asidentes transporte nian no hato'o rekomendasoens kona-ba seguransa rodoviária.

3.5.1 Transporte Terrestre

Governu sei kontinua dezenvolve Transportes Terrestres, inklui dezenvolvimentu infraestrutur no instalasoens de apoiu ba transportes terrestres, públiku no privadu. Ida ne'e inklui sinalizasaun rodoviária, ne'ebé adekuada, no garante ba nia kumprimentu, iha País tomak.

Ba áreas urbanas, sei kontinua hadi'a medidas ba gestaun tráfiku, atu bele responde ba situasoens nebé mosu. Tecnologia trafiku nian hanesan utilizasaun sistema inovador ba transporte (hanesan, interesoens nebé uza sinalizasaun moderna ona hodi halo monitorizasaun ba tráfegu) sei aplika hodi hadi'a gestaun tráfegu atu garante seguransa ba pasajeirus sira. Governu sei halo esforsus hodi dezenvolve, aprova no implementa política nasional id aba prevensaun no seguransa rodoviária.

Nun'e mos sei hadi'a kondisoens ba konfortu no seguransa ba pasajeirus iha transportes publikus. Sei haré mos atu introduz Sistema transportes publikus ho vias ka diresaun nebé propias, hodi aumenta qualidade no fasilita pasajeirus sira bele hetan transporte publiku nebé komfortável, efisiente no mos seguru.

Iha âmbito ida ne'e mós, ho hanoin atu hadi'a servisu transporte públiku, nebé agora iha daudauk, Governu sei halo esforsu hodi loke tan no moderniza instalasoens de apoiu, hanesan terminais no mos fatin atendimentu ba publiku.

Buka mós atu asegura akompanhamentu ne'ebé permanente ba operadores atividade ne'e nian, hodi enkoraja atu hadi'a sira-nia servisu no kumpre leis ne'ebé vigora, ida ne'ebé sei sujeita ba prosesu revizaun hodi hadia diak liu tan.

3.5.2 Transportes Marítimus

Dezenvolvimentu infraestrutur portuária, fundamental tebes atu permite katak Timor-Leste importa sasán no ekipamentus nebé presiza, hodi haforsa no diversifika ekonomia nasional.

Investimentu ba Sistema portuário Nasaun-nian sei haré tuir (ka akompanha) projeto Portu Tibar nian. Sei hadi'a diak liu-tan efisiensia operacional, inklui mos dezenvolvimentu ka konstrusaun portus regionais foun, hodi asegura katak transporte maritimu sei kontinua hanesan opsaun viavel

ida ba transportasaun ema no sasán, hodi fo vantajem ekonómika, liu-liu ba comunidade peskadores sira.

Ho nune'e, Governu sei:

- Harí 'supply base' iha Suai;
- Hadi'a instalasaun portuária iha Com no Ataúro;
- Harí instalasoens portuárias iha Kairabela/Vemasse, hodi fasilita asesu ba Tasi no apoiu iha sektor turismu;
- Implementa Parserias Públiku-Privadas, hodi konstroe Portu Tibar, ne'ebé determinante ba desenvolvimentu komérsiu no indústriia iha teritoriu tomak;
- Asegura funcionamentu Portu Tibar, núdar instalasaun prinsipal portuária Nasaun-nian;
- Hala'o estudu viabilidade ba konstrusaun portu Manatuto no ba kriaun linha maritima nasional ida, hodi fasilita transporte husi portu ida ba portu seluk no ba ligasaun kosteira, nune'e mos hodi presta servisu transporte marítimu ba ema no sasan, iha pontus litorais (ka iha tasi ibun) barak, iha ita-nia País;
- Reestrutura no moderniza Portu Dili no muda ba Sidade Marina no Portu ba Kruzeiru nian;
- Haforsa regulador no Autoridade Maritima nian, inklui hadi'a no halo modernizasaun ba nia kuadru normativu.

3.5.3 Transportes Aéreos

Transporte aéreo sai nudar servisu-xave ida, ba movimentu ema no sasán mai ita-nia Rain no husi ita-nia Rain ba rai-liur. Nune'e, ninia seguransa hetan papel importante atu bele dudu desenvolvimentu industria turistika, komérsiu no negósios seluk. Atu bele hetan konfiansa ba ligasoens entre Timor-Leste no destinos regionais no internacionais, Governu sei esforsa atu kria kondisoens ba aumento voos regulares ho opsoens barak.

Atu atende ba kresimentu numeru pasajeirus nian, konstrusaun/espansaun Aeroportu Presidente Nicolau Lobatu sei hetan implementasaun.

Investe iha transporte aéreo ne'e fundamental, hodi responde ba tráfego aéreo barak iha futuru, nebé asociadu ho kresimentu ekonómiku Nasaun nian, ho ida ne'e, Governu sei:

- Implementa Politika Nasional Aviasaun Sivil;
- Reforma Administrasaun Aeroporto no Navegasaun Aérea Timor-Leste nian (ANATL) hanesan operador aeroportu Timor-Leste nian, inklui desenvolve análise kona-ba opsaun iha reforsu ba kapasidade iha área kontratasaun no jestaun;
- Aumenta kapasidade Autoridade Aviasaun Sivil Timor-Leste (AACTL) hodi regula didiak sektor transportes aéreos;
- Desenvolve Planu Diretor ba Aeroportu Internasional “Prezidente Nicolau Lobato”, iha Dili, no halo hotu ninia espansaun, inklui pista no asegura kondisoens nesesárias, atu nune’e Aeroportu Nicolau Lobato sai Aeroportu ida ho padraun modernu no ho kapasidade ba sirkulasaun pasajeirus besik milhaun ida, iha kada tinan;
- Desenvolve Plano Diretor Aeroportu Baucau, inklui reabilitasaun ba nia pista;
- Desenvolve estudo viabilidade ba aeroportus munisipais, ne’ebé iha artikulasaun ho planu diretor aeroportu internasional nian, ho objetivu atu kompleta rede aeroportus munisipais, ne’ebé totalmente operasionais, inklui iha Suai, Baucau, Oecusse-Ambeno, Lospalos, Maliana, Viqueque, Same no Ataúro;
- Operasionaliza Aeroportu Suai nian.

3.6 Meteorologia

Atu kontinua desenvolve sistema de meteorolojia ida, atu fó apoiu ba nesesidades iha áreas: Aviasaun Civil, Maritima, Agricultura no mos servisu públikus nian.

Nune’e, Governu sei husu (ka arranja) estudo ida, atu haré ba possibilidade atu kria Laboratóriu de Meteorolojia ida, no identifika nesesidades iha rekursus humanus, hodi elabora planu investimentu ida no tau hanoin ba kriaun mekanismus ba kooperasaun bilateral, hodi komesa produz dadus ne’e no kria kondisaun hodi disponibiliza informasaun meteorolójika ba públiku.

3.7 Telekomunikasaun

Teknologia Informasaun no Komunikaun (TIC) sai hanesan meio vital ida, atu bele fasilita Ekonomia Digital, núdar sektor foun ba kresimentu ekonomiku no mos ba promosaun ba boa-governasaun. Governu sei asegura katak ita-nia Nasaun iha rede telekomunikasoens nebé fiável (katak bele fiar ba), ho kualidade no segura, nebé krusial ba desenvolvimentu sócio-ekonómiku ba populasaun Timor.

Infraestrutura TIC iha ita-nia Rain, hetan ona progresus signifikativus, depois de introdusaun ba merkadu telekomunikasaun nebé iha konkorensia, hahú iha 2012. Kobertura ba servisu telefone (rede 2G) hetan ona 96% husi áreas hela fatin populasaun nian, no asesu ba servisu dados 3G nian, disponivel ona iha Munisipius tomak, no mos servisu 4G nian foin hahú dadaun iha Centros Urbanos. Ho resultadu nebé atinji ona, iha servisu telefone nian, dezafiu foun iha sektor Telekomunikasaun mak hanesan desenvolvimentu redes no servisu ba banda larga.

Governu Timor-Leste sei kontinua dezenvolve esforsus, atu kria rede Telekomunikasoens ida ne'ebé moderna, hodi bele ema hotu iha ligasaun (ka koneksaun) ba malu, iha Timor-Leste, no entre Timor-Leste ho mundu, hodi hasai proveitu másimu hosi avansus iha telekomunikasaun global, inklui produsaun, difuzaun no hetan no uza konhesimentus ne'ebé iha.

Nune'e, Governu iha asaun no metas hanesan:

- Implementa sistema kabu submarinu (ka husi tasi-okos) ba fibra óptika, nebé konfiável, hodi liga Timor-Leste ba instalasaun (ka facilidades) aterrajem, liu husi kabu, iha Rejiaun, nebé permite ita-nia País hetan kapasidade no linhas de transmisaun nebé kompetitivu hodi fó koneksaun ba iha Sentru Global distribuisaun IP nian.
- Prepara no implementa planus sira nebe presiza, hanesan Planu Nasional ba Banda Larga, Planu Nasional ba Seguransa Sibernética, Planu kona ba Governu Elektroniku, Planu Infraestrutura ba Ekonomia Digital nian, no mos Planu ba Migrasaun Televizaun Digital Terrestre (DTTB) nian, atu bele sai matadalan ba diresaun jeral politika nian no bele orienta intervensoens kona-ba implantasaun no desenvolvimentu infraestruturas;
- Atu kria estrutura ida ba Seguransa Sibernética no infraestrutura kritika. Orgaun ida ne'e sei funsiona hanesan Agência Nasional atu halo supervisaun ba estratégia kona-ba seguransa sibernética, operasoens no mos desenvolvimentu kapasidade, nune'e mos atu supervizona politika, projetu no programa de desenvolvimentu iha infraestrutura kritika ne'e;

- Atu promove kapasitasaun iha área Siênsia no Enjenharia, nebé presiza atu impulsiona (ka dudu) kresimentu ekonomiku foun, Governu sei haforsa Rede Peskisa no Ensino Nacional (TLREN) inklui aplika bandwidth ka banda larga, ba kedas sistema kabu submarino nian ba TLREN, hodi benefisia ka ajuda institusoens, peskiza nian ka ensinu superior nian, iha País;
- Reforsa no kapasita Autoridade Nasional Komunikasoens (ANC), inklui hadi'a no moderniza ninia kuadru normativu, atu bele responde diak liu ba avansus teknolójikus no ba mudansas iha merkadu, relasiona ho konverjensia (ka tendensia atu ba fatin/hanoin/ida deit), iha teknolojia;
- Buka desenvolve instalasaun ba Internet Exchange neutral (“carrier-neutral Internet exchange point”) ba operadores sira atu bele garante transmisaun dados nebé lais no seguru, entre fornecedores servisu Internet (ISPs) iha rai laran;
- Asegura kobertura ba telemóvel nebé fiável, segura no asesível ba timor-oan hotu, inklui iha áreas rurais;
- Haforsa kapacidade Ekipa Resposta ba Incidentes Seguransa Komputador nian (TL-CSIRT), hodi garante asesu seguru no asesível ba internet, iha teritóriu nasional tomak;
- Promove ligasaun iha internet ba Sistema Nasional Edukasaun nian tomak no mós ba Sistema Nasional de Saúde tomak, núdar sektore nebé primáriu;
- Konstrui servisu Governu Eletróniku, hodi atualiza redes iha governu.

3.8 Servisu Postál

Servisu Postal núdar servisu públiku, importante tebes ida, ne'ebé permite haruka korrespondénsia, livrus, publikasoens no enkomendas selu-seluk, iha teritóriu nasional laran, ho presu ne'ebé asesível, hanesan mós haruka korrespondénsia no sasán ba estranjeiru.

Iha área ida ne'e, Governu iha hanoin atu:

- Reforma no desenvolve Correios de Timor-Leste, ba servisu ne'ebé efisiente liu, lais no asesível, ho hanoin atu kria pólos munisipais ho ligasaun ba Servisu Sentrais;
- Introduz ka hahú tau sistemas foun no modernus iha instalasoens CTL nian, nebé fó kapacidade atu bele haruka no entrega enkomendas to'o iha nivel postu administrativu, iha rai laran tomak;
- Desenvolve Planu Dezenvolvimentu Servisu Postal nian, inklui loke to'o iha Munisípius.

4. KONTINUA HO DEZENVOLVIMENTU EKONOMIKU

“Timor-Leste, sai País ho rendimentus kiik ho sektor privadu nebé emergente, ho diversifikasaun ekonómika limitada no konsentrada deit ba produsaun agríkola. Biar nune’e, ita-nia País iha oportunidades ekonómikas nebé konsideráveis (boot no barak) no potensial ida forte atu sai Nasaun ida ho rendimentus médios”.

Apezarde progresus barak nebé alkansa tiha ona, iha área ida ne’e, Timor-Leste tenke kontinua investe iha Planeamentu Estratéjiku ba Ekonomia ida, moderna no diversifikada. Atu potencia (ka hakbiit) sektore produtivus hale’u indústrias esensiais tolu –agrikultura, turizmu no petróleo – liu-husi estudu no aproveitamentu rekursus naturais nebé tiha, hodi aproveita dadauk mais-valia nebé mai hosi lokalizasaun geográfika no hosi perfil populasaun nian, sai estratéjia simples no asertada ida, atu lori ba diversifikasaun ekonómika, ne’ebé nesesária teb-tebes no reduz dependênsia ba reseitas petrolíferas.

Kriasaun empregu no promosaun empriendedorizmu sai, au mezmu tempu, faktor no rezultadu ba materializa hanoin no vizaun kona-ba desenvolvimento ekonómiku ida ne’e, maske Governu tenke kria kondisoens hodi labele hadok fali jovens sira, hodi mós promove sektor privadu no rekursus hirak ne’e mak fundamental atu aumenta produtividade nasional, hodi kria oportunidade kresimentu ekonómiku nebé sustentável. Ba ida ne’e, Governu sei hatama mekanismu jurídiku no polítiku hodi estimula criatividade, inovasaun no diversifikasaun ba ekonomia nasional.

Nune’e, Governo Timor-Leste sei: transforma ninia rikezas naturais, rikusoin hosi Rain no hosi Tasi, ba iha seguransa ai-hán (seguransa alimentar), iha saúde, iha produtividade no iha oportunidade ba kriasaun empregu. Sei mos transforma hidrokarbonetus ba oportunidade desenvolvimento no moris-diak (bein-estar) ba populasaun tomak, liu-husi desenvolvimento infraestrutura, sektor privadu no kriasaun empregu. Maibé mós, sei transforma rikeza hosi nia emar sira, hosi ninia paizajen natural no hosi ninia kultura ímpar, ba empriendedorizmu no ba aumentu rendimentu iha País tomak.

Ba ne’e, esensiál duni dezenvolve Kuadru Nasional Planeamentu ida, ho vizaun ba implementasaun Polus Desenvolvimento, iha rejioens iha País laran, ne’ebé define karakteristikas própria rejiaun ida-idak nian no potensial kresimentu sektore no subsektore oi-oin, tuir lolós rekursus lokais ne’ebé disponíveis, atu implementa asoens no estratéjia ba kresimentu sustentável no no desenvolvimento ekuitativu (ka hanesan) iha País tomak, ho moto katak “se natureza ne’e rika, povu labele sai kiak”.

4.1 Agrikultura, Pekuária, Peskas no Florestas

Dezenvolvimentu sektor primáriu sai fundamentál ba País, ida ne'ebé besik 75% hosi populasan hela iha áreas rurais no, iha ne'ebé, nível pobreza (situasaun kiak) sei ás tebes, ho debilidades (frakezas) seluk-tan nebé relasiona ho pobreza.

Tanba ne'e, Governu konsidera Agrikultura hanesan baze ba dezenvolvimentu ekonómiku no sosial País nian. Melhoramentu (maneira oinsá hadi'ak) sektor ida ne'e, iha ligasaun ho oinsá hadi'ak sektor peskas no produsaun animal, atu, iha tempu badak nia laran, hadi'a kualidade no moris diak ba timoroan tomak. Nune'e, metas (ka target) Governu nian, mak atu hadi'a seguransa aihán (*seguransa alimentar*) nasional, reduz pobreza rural, apoia tranzisaun hosi kultura (agrikultura) subsistênsia nian ba produsaun empresarial ba produtos agrícolas, pekuárias no peskas nian, hodi promove sustentabilidade ambiental no konservasaun rekursus naturais Timor-Leste nian.

4.1.1 Agrikultura

Atu hodi kumpre objetivu bà nível seguransa aihán (*seguransa alimentar*) nian Governu sei habelar sektór agríkola, hadiak prátika kultivu no produtividade agrarian nian sira, dezenvolve aksaun sira hodi hadiak produsaun kultura agríkola espesífika no sistemátika nian sira, tuir lolo'os ho potenciál hosi rejiaun ida-idak país nian, hodi garante mós objetivu atu dezenvolve nasaun nia sektór produtivu sira.

Metas no asoens, ba área ida ne'e, maka:

- Investe iha kriaun Laboratóriu Públiku ba Investigasaun Agríkola, ho vizaun atu dezenvolve programa investigasaun nian ba produtos agrícolas, nebé konsidera hanesan principais iha Timor-Leste. Hakarak hahú, nudar prioridade, iha produtos nebé oferese potencial bo'ot liu no bele fó apoiu ba vertentes técnicas iha produsaun agríkola, nebé garante no identifika, liu-husi análizes, rai ida-idak nia tipu (ka kompozisaun) no ninia kualidade, nuné mós ba iha bé, ai-horis no fíni (semente), hodi bele haré oin-sá atinje modernidade competitiva;
- Estabelese Institutu de Peskiza no Dezenvolvimentu Agríkola, nebé sei halibur Agrónomus no Téknikus, atu hala'o peskiza, ezekuta no supervizona, iha teritóriu tomak, estratégias ba implementasaun sistema produsaun nian, hamutuk ho agrikultores sira;
- Estabelese mekanismu hodi apoia tranzisaun agrikultura subsistênsia ida ba iha agrikultura moderna ho orientasaun ba merkadu;

- Hadi'a jestaun iha Eskolas Técnicas Agrícolas (ETA) ne'ebé eziste ona (Lautém, Manatuto, Bobonaro no Oé-cusse Ambeno);
- Implementa programas foun kona-ba agrikultura biolójika, inklui apostu ba ninia komersializasaun iha nível internacional, liuhusi kampaña marketing nian;
- Implementa Política Nacional Seguransa Ai-hán (*Seguransa Alimentar*) nian;
- Reabilita, habelar/expande no hadi'ak jestaun ba sistemas irrigasaun no ba armazenamentu bé, fundamental ba kultivu agríkola, no halo revizaun ba inventáriu sistemas irrigasaun nebé iha;
- Hadi'a jestaun ba Sentrus de Manutençaun Tratores hodi garante funsionamentu operacional, iha uzu tratores atu tulun agrikultores sira;
- Halo mapeamentu kona-ba zonas agro-ekolójikas ba utilizaun sustentável, ba máquinas no ekipamentus agrícolas, referênsia ba estrutura física rai-nian;
- Kontinua investe iha akizisaun no manutençaun máquinas no ekipamentus agrícolas au apoia agrikultores sira;
- Hadi'a ka hakbiit servisu husi Extensionistas no Tratoristas sira, hodi tulun agrikultores sira;
- Kontinua implementa sistema Mekanizasaun Agríkola, hodi apoia programas extensifikasaun, intensifikasaun no diversifikasaun, atu aumenta produsaun no produtividade agríkola;
- Kontinua halo estudus kona-ba harí barrajens iha Timor-Leste no implementa projetu-pilotu barrajen no aproveitamentu lensóis freáticos (katak bé-lihun iha rai-okos);
- Hadi'a jestaun no manutençaun rai ba kultivu, hodi hametin-tan formasaun ba agrikultores sira no empresas agrícolas;
- Asegura katak Timor-Leste bele atinji 70%, iha produsaun fós, to'o iha tinan 2023, hodi hetok hadi'a liu-tán técnicas no sistemas ba produsaun hare;
- Kria kondisoens atu aumenta área ba natar ne'ebé hetan irrigasaun, hodi atinji hektares 50.000, iha tinan 2023;
- Reforsa Servisu Estatística, Informasaun no Previzaun agro-klimátika;
- Reforsa facilidades iha servisu kuarentena nian, atu implementa protokolu, padraun, baze dados ba sanitáriu no fitosanitáriu (SPS), hodi facilita importasaun no exportasaun produtos agrícolas;
- Kontinua promove atu uza sistemas espesifikus iha produsaun fós, iha jestaun kolheitas ne'ebé integradas no sistemas ba intensifikasaun fós;
- Kontinua iha esforsu atu reduz lakon ka (perda) iha produsaun liuhosi kontrolu pestes no iha pós-kolheita, liuhosi hadia sistema kolheita, dulas, no jestaun ba armazenamentu fós, batat, sereais no produktu seluk;

- Kontinua fo'ó subsídiu ba produtores fós, batar no produsus bázikus seluk hodi hola sementes, fertilizantes no pestisidas, atu bele aumenta produtividade, nune'e mós atu apoia hadia efisiénsia iha prosesu depois de rekolha ba produktu sira ne'e resik;
- Fo'ó akonselhamentu finanseiru no asisténsia iha komersializasaun fós, batar no sereais no produsus sira seluk, ba produtores ida-idak;
- Asegura área kultivo ba batar atu bele atinje to'ó 76.500 hectares iha tinan 2023, ka aumenta produtividade média batar ba 2,5 toneladas kada hecтар;
- Aumenta ba dobro 'área kultivu ho raíz no tubérlikus, hosi 48.000 hectares ba 80.000 hectares iha 2023, no ba to'ó 105.500 hectares iha tinan 2030;
- Kontinua investe iha peskiza, dezenvolvimentu no divulgasaun kona-ba variedades iha kudahare, ne'ebé espesifika ba Timor-Leste, hanesan mós sereais (fós, batar, trigu, sevada no senteiu), ai-farina, fehuk-midar no koto-nurak;
- Introduz zonas agríkolas, atu identifika áreas ne'ebé adequadas liu ba kultivu no komersializasaun batar no alimentus bázikus seluk, hanesan aifarina, koto-nurak, fehuk-midar no sereais oioin;
- Fó formasaun ba produtores batar no sereais, ka produtores alimentus bázikus seluk, kona-ba uzu makinaria agríkola no téknika jestaun agríkola nian, hodi kontinua fahe tratores manuais no apoia ninia uzu;
- Integra atividades agríkolas ho empresas familiares, hanesan mós prosesamentu produsus agríkolas ka uzu rezíduos agríkolas hanesan fertilizantes orgánikus no alimentu ba animais;
- Dezenvolve no loke tan programas espesiais atu apoiu ba batar, 'shorgum', ai-abut/raízes no tubérlikus, iha comunidades rurais;
- Dezenvolve no promove sistemas alimentasaun ba karau, husi excedentes (ka saá-ida maka resta) husi batar, ai-abut/raízes no tubérlikus sira;
- Investe iha produsaun ai-fuan no produsus hortícolas (ka modo-tahan) hodi substitui importasaun, pelumenus 50%, iha tinan 2023, hodi enkoraja fornimentu ai-fuan ho valór ás (ka folin bo'ot) ba merkadus urbanus;
- Apoia produsaun produsus hortícolas (modo-tahan) ho eskala boot, nebé besik Sentrus urbanu, liu-husi protokolu ba fornimentu iha merkadu, restaurantes no hotéis;
- Elabora peskizas no estudus investimentu, kona-ba atu sukat (afere) potensial ba dezenvolviemntu Hidroponia nian (téknika kuda ai-horis la- ho rai), liu-husi projetu-pilotu ida ne'ebé permite produsaun imediata hosi produsus hortícolas biológikus;
- Kria tán insentivus no kontinua apoia agrikultores sira atu produz kulturas nebé bele fó rendimentu, hanesan kafé, nú, baunilha, kajú, fore-keli, fore-rai, pimenta, açafrao, gengibre (ai-lia), ai-kanela, kolorau no nóz moscada, inklui mós ninia prosesamentu no transformasaun ba iha produsus doméstikus, ho vizaun atu kria merkadu foun;

- Halo levantamentu ida konabá kuantidade no kualidade armazéns ne'ebé disponíveis ba armazenamentu (rai no halot) sereais no produsos agríkolos granulares, koto, favas, ervillas, fore-keli, no seluk-tan;
- Fortalese koordenaun interministerial no koordenaun ho instituisoens relevantes seluk, kona-ba implementasaun no kontrolu servisu iha sektor agríkola;
- Fo'ó no investe, hanesan prioridade, iha kulturis rendimentu nebé iha potensial bot atu hetan promosaun ba eskala komersial.

4.1.1.1 Kultura kona-ba Kafé

- Kontinua apoia produsaun no promosaun Kafé orgániku ho kualidade diak, inklui mos liuhosi promosaun kafé Timor iha nível nasional no internasional;
- Hadia produsaun kafé, liuhosi rehabilitasaun ba plantasaun kafé nian;
- Kontinua dezenvolve estudus no programas kona-ba peskiza kona-ba kafé;
- Kontinua apoia Asosiasaun Kafé Timor Timor-Leste nian (ACTL) no, ho parseria ho sektor privadu no parseirus dezenvolvimentus, kontinua implementa Planu Dezenvolvimentu Sektor Kafé nian;
- Kria Polítika no Estratéjia Nasional ba dezenvolvimentu kafé nian;
- Kria programas founs kona-ba promosaun indústrias doméstikas nian, iha prosesamentu rezíduos iha plantasoens, liu-liu kafé, ba fertilizantes orgánikus no hahán ba animais, no hosi rezíduos iha plantasaun nú ba material no sasán (beins) doméstikus.

4.1.2 Pekuária

Sektor kriaun animais, iha País, iha potensial bot atu kontribui ba melhoria iha nutrisaun ba povu timor, tantu liu-husi asesu no konsumu ba na'an freska, no mós hosi susuben (laktisíniu).

Atu hadi'a sektor ida ne'e, nesesáriu atu investe iha rasoens (animal-nia hahán) ne'ebé asesíveis (ka fásil atu hetan) no ho kualidade, hodi aseguira vasinasun no desparasitasaun animais. Agora dadaun, excedentes no resíduos husi produsaun agríkola, la suficiente atu kria indústria doméstika ba prosesamentu rasaun ba animias, ida ne'e signifika katak, karik iha melhoria iha agrikultura, hanesan aumentu iha kultivu, ka karik iha ona fontes proteina nian, ne'ebé disponíveis, liuhusi rezíduos ikan-nian, sei bele iha melhoria nebé substansial (ka boot), iha área Pekuária.

Governu buka atu Aumenta produsaun animal, ba 20%, to'ó tinan 2023, ho objetivu atu hamenus importasaun produsos animais hosi estranjeiru. Metas no asoens atu alkansa dezenvolvimentu Pekuária nian maka:

- Kontinua investe iha kampañas vasinasaun animal no forneseimentu vasinás gratuitas no habelar programas hirak ne'e, ba teritóriu tomak;
- Implementa sistema jestaun kontrolu ida ba animal nia moras;
- Kontinua investe iha akizisaun no manutensaun mákina no ekipamentu pekuária no veterinária nian hodi apoia ema sira ne'ebé hakiak animál;
- Kontinua kampañas nasionais ba divulgasaun kona-ba kuidadus bázikus saúde animal nian no melhoria iha nutrisaun animal;
- Investe iha edukasaun no formasaun sektor ida ne'e, ba estabelesementu klinikas veterinárias ho profissionais espesializados, hodi kontinua mós desenvolve Sentrus Desenvolvimentu no Treinamentu Pekuáriu;
- Estabelese infraestruturas públicas, ne'ebé nesesárias ba assistênsia veterinária, hodi envolve produtores ba animal sira nian;
- Estabelese Sentru de Investigasaun ba Produsaun Animal, atu hatene lolós espésies, por ezemplu karau, ne'ebé bele adapta diak liu ba kondisoens Timor-Leste nian, hadi'a qualidade jenética nian, técnicas produsaun seletiva nian, no kontribui hodi hadi'a parâmetros (sasukat) seluk ba produsaun, hanesan taxa mortalidade, taxa hahoris no aumenta todan iha loro-loron;
- Apoia estabelesementu Asosiasaun Haki'ak Karau (Asosiasaun Kriadores de Gadu), hodi fasilita ninia atividades no nia polítkas no inisiativas;
- Apoia estabelesementu Matadourus, nebé hetan sertifikadu, iha País tomak, nune'e mós ho ninia prestasaun servisu abate (oho animal nian) no distribuisaun ba talhus no fatin seluk, ho kapasidade técnica no tecnológica, alien de Matadouru Nasionál Tibar nian;
- Desenvolve sistema espesial ba produsaun manu no fahi;
- Promove kriaun empresas ki'ik atu apoi pekuária, inklui infraestrutura refrijersaun nian, triajem, prosesamentu no embalajem (ka falun) na'an, ho vizaun ba desenvolvimentu indústria pekuária ida, nebé segura no ho qualidade;
- Hala'o kampañas hodi hatudu no hanorin oin-sá halo proses aka trnasforma rezíduos animais ba fertilizante orgániku;
- Promove asesu ba Instituisoens financeiras no promove kooperasaun ho investidores sira;
- Asegura estabelesementu parserias ho sektor privadu, nasional no internacional, ba kresimentu sektor Pekuariu iha País;
- Inkrementa (haburas) prosesu transformasaun no exportasaun ba produtos pekuária nian (hanesan, haki'ak karau-timór ba produsaun susu-ben no keiju);
- Kriaun servisu desentralizados hodi fó apoiu ba produtores lokais, kona-ba esklaresimentu dúvidas, sosializasaun ba kampañas veterinárias (vasinasaun, moras, no buat seluk-tan) no kona-ba kontrolu populaun hosi espésie ida-idak;

- Kontinua dezenvolve pastajen (animal hán fatin) no formulasaun rasoens (hahán) ba animal nian;
- Kontinua investe iha sistema kriaun animal, hosi sistema tradisional ba semi-intensivu no intensivu, no kapasitasaun ba téknikus no agrikultores sira;

4.1.3 Peskas

Timor-Leste iha linha kosteira ida, liu Km 700, no Zona Ekonómika Eskluziva ida ho besik Km² 72.000², ne'ebé signifika asesu ba rekursus maritimus (rekursu tasi nian) ho potensial bo'ot ida ba explorasau, iha âmbito sektor peskas nian, tamba Munisípius rua deit, Aileu ho Ermera, mak laiha asesu ba kosta (tasi ninin).

Iha lidun seluk, besik ba tasi-ibun (costa) sei bele tán dezenvolve atividades akuakultura nian, hanesan hasai budu-tasi no hakiak boek, abalone, kadiuk, pérolas no ostras, ne'ebé kontribui ba kriaun rendimentus ba comunidades ne'ebé hela iha tasi-ibun.

Nune'e, importante atu dezenvolve estratéjias, iha sektor ida ne'e, hodi konsidera rekursus oioin ne'ebé eziste no oin-sá bele halo esplorasau, tamba:

i) Tasi, husi kosta Tasifeto nian, apresenta nudar karakterístikas boot mak plataforma kosteira ki'ik, ne'ebé liga ho prezensa hosi ahuruin ho temperaturas nebé ás, nutrientes, nebé to'o ba tasi hosi mota, mós menus ona no la iha nutrientes ne'ebé moris hikas hosi tasi, ne'ebé mos signifika katak possibilidade ba espésies komersiais kiik tebes, ho tan produsaun *fitoplâncton* nebé ki'ik, tanba nível oxijénio reduzidu tebes ho temperatura nebé ás, no, la haluha, redusaun nebé boot ba área maternidade, área ho ai-parapa.

ii) Tasi, husi fali kosta Tasimane nian, hasoru laloran nebé boot no maka'as tebes, expostu liu na anin tamba la hetan protesau husi ilhas indonesias, nebé barak hanesan iha Tasifeto, maibé hetan nutrientes barak liu, nebé bá husi mota no mós husi fenómeno resurjênsia, tanba ninia plataforma kontinental naruk no luan tebes, hodi permite, iha zona nebé exposta ba naroman, bele konsrva nutrientes nebé bele hala'o produsaun primária ba *fitoplâncton*.

Timor-Leste, maski ilha ida, la iha tradisaun boot kona-ba tiha ikan. Ida ne'e, dala barak, bele justifika ho tradisaun kultural, husi kedas bei-ala sira, maibé, liuliu, tanba kondisoens nebé povu hasoru: kapasidade explorasau tasi fraka tebes, iha Tasifeto ka Tasimane, no iha ne'e, tasi perigozu liu ba korakora. Hosi parte seluk, estudus hatudu katak, mezmuke iha dadauk ona aumentu iha

esforsu ba Peskas, iha tinan hirak ikus ne'e, liu-liu aumentu iha númeru peskadores ne'ebé aktivos no númeru de embarkasaun, numeru total iha kaptura (kaer ikan) kiik nafatin tetu ba esforsus iha peska, no ida ne'e bele signifika katak País sei esgota nia kapasidade husi meius, ka kapasidade kresimentu nian sei oitoan, mesmu ke la estraga nia meius. Ne'e duni, iha nesesidade atu estuda no implementa estratéjias aproximasaun, hodi aumenta produsaun peskadu nian, ho forma ida ne'ebé sustentável.

Iha âmbito ida ne'e, Governu sei:

- Haré hikas fali estudus nebé elaboradus ona ba sektor Peskas, atu identifika asoens no estratéjias prioritárias ba kresimentu sektor nian, hodi hare oin-sá supera (ka ultrpassa) tiha obstáculus nebé iha hela, no asoens atu aumenta peskas iha futuru, tuir estudus nebé iha kona-ba kooperasaun internacional, ho artikulasaun ho “Parseria Triângulu Koral /Coral Triangle Partnership” no “Análize ba Situasaun Aktual no Potensial ba Dezenvolvimentu Agrikultura iha Timor-Leste/*Analyses of the Current Situation and Potential for Agriculture Development in TL*”, hosi Diresaun Nasional Peskas no Akuakultura;
- Regula no kontrola Peskas, inklui tamanhu ba rede (kaer ikan), defezus (peskas proibidas), espésies protejidas no formas seluk hodi proteje espésies no oin-sá evita kaptura (kaer) animais antes de bele halo (ka realiza) reproduasaun no, nune'e, bele mós ajuda repovoamentu natural. Sei reforsa liu-tán lejislasaun ne'ebé bele reduz peska ilegal, liu-liu husi ró-ahi estranjeiru no definisaun kona-ba zona vijiada;
- Promove kampañas hamutuk ho peskadores sira no sira-nia comunidade, kona-ba técnicas peska nian, ne'ebé apresenta menus risku ba delapidasaun (ka estraga) kapasidade produsaun peskadu-nian no estraga meu nebé hale'u;
- Promove konsumu ikan iha ita-nia País, ho forma sustentável, liu-husi kampañas sensibilizasaun konabá ninia valor nutritivu, ho objetivu atu aumenta ninia konsumu ba 10kg/ema/tinan;
- Investe iha formasaun rekursus umanus nian, iha área peskas no akuakultura, hodi apoia servisus téknikus, iha tasi no iha akuakultura;
- Investe iha peska tasi-klaran, ho orientasaun ba esportasaun futura nian, hodi kontinua dezenvolve sentru Peskas tuir tasi-ibun, no asesu ba ró nebé di'ak liu, ekipamentu no formasaun;

- Kriasaun rede (ka Sistema) konservasaun peskadu nian, ba aproveitamentu total peskadu nebé kaer, hodi permite mós aumentu esforsus iha kaptura (kaer), tamba garante ona eskoamentu;
- Estabelese ligasaun ba merkadus no ba exportasaun, no mós liu-husi sistema transporte no sentru refrijersaun, entre zonas peska no fatin fa'an no esportasaun nian;
- Estabelese Sentrus demonstrasaun kona-ba oin-sá uza sistema elektróniku ba kontrolu iha peska (ka kaer) no ba korte (ka ko'a), prosesamentu, transporte no armazenamentu ba produktu peskas;
- Dezenvolve prosesus alternativus ba konservasaun peskadu, hanesan salga, fumajrm (tamu) no sekajem (ka hamaran);
- Artikula ho entidades governamentais, ne'ebé relevantes, hodi garante prezervasaun ikan nian no ambiente tasi-nian, hodi define mós lokais, ne'ebé adekuadu ba peska komersial;
- Estabelese Sentru Mariñu ba Investigasaun no Dezenvolvimentu Timor-Leste;
- Operasionaliza Sentru Formasaun Akuakultura, iha Liquiçá, hodi inisia formasaun ba téknikus ba peskas, peskadores, akikultores no jovens sira;
- Kontinua investe iha dezenvolvimentu infraestruturas bázikas, hanesan portus, kais no fatin Ró atraka;
- Dezenvolve estudus no peskizas adisionais ba produsaun iha akuakultura, ba konsumu internu no ba exportasaun;
- Dezenvolve tipus oi-oin ba atividades akuakultura nian, iha bé-midar, bé-foer (salobra) no bé-mer (tasi ben);
- Garante, pelumenu tipu 3, ba atividades akuakultura, hodi apoia atividades kosteiras;
- Elabora estudus, atu bele estabelese Entidade Administrasaun Indireta Estadu, ba área Peskas no Akuakultura, hanesan, Institutu Nasional Peskas no Akuakultura, nebé bele mós sai fonte promosaun no motivasaun ba investimentu privadu;
- Estabelese merkadu exportasaun ikan nian ida, ba produtos peskas no akuakultura;
- Kriasaun fatin fa'an ikan nian ida, ho ekipamentus refrijersaun nian rasik, iha ne'ebé Estadu bele haruka kumpri kritérius kona-ba qualidade no seguransa ai-hán (seguransa alimentar) nian, nune'e mos bele hare ba razoabilidade presu (katak, labele sa'e liu no labele tun liu), hodi fó ba sektór ne'e oin-sá akompaña no organiza, buat ne'ebé seidauk

iha. Ida ne'e, sei sai faktor konfiansa nian, ba konsumidores partikules sira no estabelesimentus restaurasaun nian (ka restaurantes);

- Haré hikas lisensas komersiais ne'ebé iha tiha ona, no define explorasaun rekursus mariñus, iha tempu médiu no tempu naruk, hodi asegura no garante ekonomia País nian;
- Kontinua investe iha akizisaun no manutensaun máquinas no ekipamentus peskas no akuakultura.

4.1.4 Produsaun Florestal

Jestaun florestal sustentável ba rekursus florestais Timor-Leste nian, la sai fundamental ba famílias no comunidades, ne'ebé depende ba rekursu ida ne'e ba hán, kombustível no kriasaun rendimentu, hanesan mós ba agrikultores sira konsidera (ka hanoin) kona-ba efeito deflorestasaun nian iha erozaun ka rai-monu no iha kaptasaun bé nian, se ida ne'e la iha, maka produsaun agríkola sei la iha. Timor-Leste lakon tiha ona ninia floresta nativa (ai rai-nian kedas), hanesan ai-teka, mognu (ka mahoni) no ai-kameli, no, hó ida ne'e, prejudika tiha vida selvajen no hamenus tiha fonte alimentasaun. Tanbá ne'e, sai urjente ba Governu atu atua ho konsistênsia iha protesausn ba áreas floresta nasional, ne'ebé representa besik 50% hosi área terrestre País-nian, protesausn ida ne'ebé bele halo setor ne'e sai rentável ekonómikamente no hetan sustentabilidade.

Nune'e, Governu empenhadu iha asoens tuir mai:

- Kontinua implementa Planus ba Konservasaun Florestal, nebe aprovado ona iha 2012, hodi promove reflorestasaun no agro-florestal ba práticas sustentáveis iha teritóriu tomak, inklui mapeamentu no inventarizasaun ba espésies florestais;
- Kontinua implementa kuadrus legais, inklui Lei de Base Florestal, nebe promulga ona iha 2017, kona-ba jestaun no protesausn ba rekursus florestais;
- Implementa Planus de Investimentu Florestal, inklui identifika merkadus potenciais no vantajens komparativas, ba Timor-Leste, kona-ba produtus florestais ho valor ne'ebé bot;
- Desenvolve no kapasita Instituto de Peskiza no Dezenvolvimentu de Agrikultura, hodi reforsa investimentu no peskiza ba subsektore agríkolas hotu-hotu, inklui produtus florestais;
- Kontinua desenvolve Centros ba Viveiros Permanentes no Viveiros komunitarios, hodi fo apoiu ai-horis ba comunidade (Ai-kameli, cedro-vermelho, Ai-teka, mogno, pau-rosa/Ai-ná, Bambu, nsst) nebé bele desenvolve, hodi fornese materiais primas ba industrias ki'ik no ba karpintarias ba produsaun mobiliarios;
- Kuda ai, milhaun 1 iha tinan-tinan, iha teritóriu tomak;
- Kontinua implementa Politika no Estratéjia Komersializasaun Nasional ba Bambú ka Au;

- Kontinua investe iha produsaun no komersializasaun bambú, material ida nebé versátil tebes no rentável duni, no mós tamba Au kontribui hodi halakon erozaun/rai-monu ka delokamentu/rai-halai no mós estragus seluk ba rai;
- Promove formasaun teknika no administrativa ba profisionais florestais;
- Kontinua haforsa kordenasaun intersetorial, liu-liu jestaun rekursus naturais. ho forma sustentável. no promove Sistema Nasional ba Áreas Protejidas no Parkes Nacionais no Konservasaun Biodiversidade;
- Halo reabilitasaun ba “área mangal” iha linha kosteira Timor-Leste hodi proteje comunidade sira no biodiversidade kosteira;
- Promosaun jestaun ba área basias hidrográficas, liuhosi sistema jestaun rekursus naturais ne’ebé bazeadu iha nesesidades comunidades sira nian;
- Kontinua investe iha akizisaun no manutensaun máquinas ne’ebé destinadu ba jestaun florestal.

** resurjénsia - Bé sa’e’ hosi superfísie okos tasi nian*

** fitoplancton – comunidade mikrorganismu vejetal, ne’ebé sai baze hahán iha Tasi okos no oceano*

4.2 Petróleu ho Rekursus Minerais

Pilar ida mós ba dezvoltimentu ekonómiku futuru Timor-Leste nian, mak setór Petróleu ho Rekursus Minerais, ne’ebé sei garante katak rikeza (ka rikusoin) husi rekursus naturais sei utiliza hodi konstroe (ka harii) Nasaun no proporsiona progresu no bein-estar ba povu timor tomak.

Vizaun nasional, ne’ebé temi iha Planu Estratéjiku Dezvoltimentu (2011-2030), mak ida ne’ebé dehan katak infraestrutura ne’ebé nesesária (ka presiza tebetebes) ba dezvoltimentu petrolíferu, tenki implementa iha Kosta Sul, ne’ebé sei serve hodi kria dividendus ekonómikus, nebé diretus ba populasau tomak, liuhosi atividades indústria petrolífera ho kriaun postus trabalhu koneksus (ka ne’ebé iha ligasaun ba malu), no mos liuhosi dezvoltimentu infraestruturas apoiu ba Kosta Sul Timor-Leste.

Dezvoltimentu ida ne’e, ne’ebé temi ho naran Projetu Tasi Mane, hanesan programa plurianual ida ho vizaun atu kria polus (ka sentrus) industriais tolu, ne’ebé konsidera hanesan espiña dorsal (ka suporte prinsipal) ba indústria petrolífera timor-nian.

Ba kurtu-prazu, atu konkretiza vizaun ida ne’e, Governu sei kontinua haka’as-an iha negosiasoens ho empresas ne’ebé envolve iha prosesu Greater Sunrise nian, hodi konkretiza rejime espesial ba

Kampu Greater Sunrise, ne'ebé prevê tiha ona iha Tratadu kona-ba delimitasaun fronteiras marítimas entre Timor-Leste ho Austrália, ne'ebé asina iha Marsu 2018.

Projetu Tasi Mane ne'e sei kontribui la-ós de'it ba desenvolvimentu kosta sul ein-jerál, no liu-liu ba indústria petrolífera, maibé mos sei abranje (ka kobre) impaktus ekonómikus, diretus no indiretus, lubun boot ida, iha nível nasional, regional no lokal, hodi fó benefísius ne'ebé mai husi exploraun rekursus naturais Timor-Leste nian.

Projetu ida ne'e sei aumenta Produto Internu Brutu (PIB) nasional ho lukrus husi exportasaun, no mos sei kria oportunidades ba empregu durante konstrusaun ho operaun infraestruturas ne'ebé koneksas (ka ligadas), aleinde funsiona hanesan katalizador (ka dinamizador) ida ba desenvolvimentu Kosta Sul. Prevê katak sei hamosu to'ó 10.000 postus de trabalhu diretus, husi projetu Tasi Mane, no liu 50.000 postus de trabalhu indiretus sei bele kria ho transformasaun setor petrolíferu, husi faze atual hanesan halo de'it extrasau, ba faze avansada liu ho ona industrializasaun ho kriaun valór akresentadu (katak sei hamosu tan benefísius seluk no reseitas).

Aleinde ne'e, Projeto Tasi Mane ne'e sei fó benefísius indiretus, hodi influensia dezempeñu ekonómiku ne'ebé boot liu ba País, hanesan rezultadu husi dinamizasaun setóres industriais seluk. Investimentu ne'ebé partisipantes, iha projetu ne'e, halo, no husi trabalhadores sira, husi Governu no husi benefisiários privadus sira, sei produz "efeitus multiplikadores" (ka barak tebes), tanba atividades ekonómicas ne'ebé asosia ho projetu ne'e sei fó impaktu ba ekonomia ein-jerál, ne'ebé sei mai husi akizisaun ba beins no servisu adisionais, husi trabalhadores, no mos husi empresas, ne'ebé direta ka indiretamente, envolve-an iha projetu. Investimentu iha ativu físicos ne'ebé produtivu (hanesan instalasoens ba produsaun enerjia elétrika, estradas ho aeroportus) ho ativu sosiais (hanesan ezemplu, konstrusaun pólus (ka sentrus) foun, tantu urbanus no mos ba ensinu no hadi'a servisu edukasaun ho saúde), sei bele mos benefisia ekonomia liuhosi maksimizasaun iha produtividade husi fatores ekonómikus oioin. Impaktu significativu ida mós, husi projetu ne'e, mak hanesan oportunidades ne'ebé sei mosu ba negósios lokais. Oportunidades hirak ne'e, inklui subkontrataun ba servisu hanesan restaurasaun, enjeñaria, seguransa, fornimentu kombustível, servisu jestaun, profesionais ho téknikus.

TIMOR GAP sei kontinua hala'ó mandatu husi Governu, atu jere no administra projetu Tasi Mane. Empresa Pública ida ne'e sei apoia kriaun indústrias de suporte, no apoia desenvolvimentus rekursus umanus nesesários ba operacionalizasaun ne'ebé efisiente husi setor petrolíferu. Prevê katak konstrusaun infraestruturas básicas hirak ne'e, bele impulsona (ka dudu) no insentiva investimentus komersiais iha projetus seluk no áreas ne'ebé inkorpora (ka tama hotu) iha área ne'ebé hetan impaktu husi Tasi Mane. Realidade ida ne'e transforma caráter atual setor petrolíferu Timor-Leste nian, ne'ebé ho dimensaun (ka karakter) extrativa deit, hodi permite nia evolusaun ba setor petrolíferu ida ne'ebé ho valor akresentadu boot, no ho karíz (ka natureza) industrial no

diversifikadu liu, inklui dezvoltimentu refinaria ida ho pólu indústria petrokímika, no fábrica Gás Natural Likefeitu (“GNL”).

Governu Timor-Leste, núdar proponente no promotor ba projetu integradu Tasi Mane, sei partisipa iha finansimentu ba projetus balun, no mos iha infraestruturas bázikas, hanesan ezemplu, aeroportu ho baze lojístika Suai. Projetus seluk iha Tasi Mane sei konstroe no dezvoltolve ho baze iha rejime ‘project finance’ no ho formas investimentu privadu seluktán no investimentu mistu.

Nune’e, Governu sei kontinua dezvoltolve estudus ho planus investimentu, hodi konsidera envolventes (ka buat) hotu-hotu ne’ebé presiza ba realizasaun projetu ne’e, inklui estudus kona-ba impaktu ambiental, atu bele minimiza impaktus negativus iha meu ambiente no umanu.

Projetu Tasi Mane ne’e konstituídu (ka kompostu) husi pólus dezvoltimentu hanesan tuir mai:

4.2.1 Dezvoltimentu Baze Lojístika ida

Sei konstroe no operacionaliza baze lojístika ida iha Suai, nia fatin mak iha Camanasa, Munisípiu Covalima, ne’ebé sei inklui konstrusaun instalasoens lojístikas no marítimas. Baze ida ne’e sei serve atu apoia atividades petrolíferas tomak, ne’ebé hala’o iha Área Eskluziva Timor-Leste nian no iha áreas adjasentes iha Tasi Timor, no mós atividades ekonómikas jerais, komersiais no industriais seluktán.

Baze Lojístika iha Suai ne’e sei serve mos hanesan pontu entrada ida ba jestaun kadeia (ka rede) abastesimentu (ka forneseimentu) atividades husi agrupamentus industriais rua seluk, hanesan, refinaria ho kompleksu petrokímiku ida ho fábrica GNL ida. Baze lojístika ida ne’e sei abranje mos:

- Instalasoens terrestres – edifísios ba operasoens nian, armazéns kobertus, mini bases terrestres, parke armazenajen kombustível nian, depózitus armazenajen bee nian, sistema jestaun ba rezíduus ka lixu, zonas estasionamentu, instalasoens rekreativas no komunitárias, entre buat seluk;
- Instalasoens marítimas - ponte-kais tolu mak hanesan ponte-kais prinsipál, ponte-kais ba ró-barkasas no rampa (ka fatin) ba embarkasoens desembarke nian, ne’ebé apoia ho postu atrakasaun ba rebokadores, postu akostajen (ka sadere nian) ba embarkasoens pasajeirus ho kebramar (ka muru boot) ne’ebé liga ba Kosta, hosi sátan no fahe laloran, hodi portu ida ne’e bele kalmu (ka hakmatek), seguru no protejidu ba instalasoens iha rai-laran;

Projetu ida ne’e sei iha impaktu sosial boot tebetebes, tamba sei sai hanesan plataforma impulsionadora ida, hodi loke oportunidades trabalhu, jera/kria postus de trabalhu atus-ba-atus, hodi apoia dezvoltimentu ekonómiku nasional, no hadi’a maka’as kompetênsias maun-de-obra

lokal, iha áreas hanesan fabriku besi-asu, konstrusaun sivil, konstrusaun marítima, enjeñaria mekânica no elétrika, entre buat seluk. Prevê mos katak indústrias naun-petrolíferas seluk, hanesan peska komersial, bele mos benefisia ho instalasoens marítimas hirak ne'e.

Halo tiha ona estudus kona-ba impaktu ambiental ho mós hala'o ona konsultas públicas, relasiona ho projetu ne'e, no mos hetan ona lisensa ambiental, iha 2013 no hafoin renova fali iha 2015.

4.2.2 Dezenvolvimentu Refinaria Petrolífera ho Kompleksu Petrokímiku ida

Pólu dezenvolvimentu Daruak ba Projetu Tasi Mane, kompostu husi Refinaria Petróleu no Kompleksu Petrokímiku iha Betano, ne'ebé lokaliza iha kosta Munisípiu Manufahi nian. Instalasoens hirak ne'e mak sei konverte (ka transforma) Mina-rai kondensadu, ne'ebé mai husi Tasi Timor, ba kombustíveis oi-oin no ba produtos petrolíferus refinados seluk. Prevê mos katak projetu ne'e sei halo Timor-Leste sai autosuficiente, relasionadu ho fornecimentu gasolina, ne'ebé la iha xumbu, ho diesel, ho marjen (ka espasu) atu satisfaz (ka responde ba) aumentu iha prokura doméstika, iha futuro.

Kompleksu refinaria ne'e, harí iha área boot ida ho serkade 230 ektares. Instalasaun prinsipal refinaria ne'e nian, konsiste husi unidade prosesamentu ida no unidades apoiu, hanesan unidades ba utilidades, unidade ba tratamentu rezíduos, rezervatóriu ba matéria prima nian no produtos petrolíferus, reservatório bé ba combate insêndius no aterru ba jestaun rezíduos sólidos (ka maran). Kompleksu ne'e sei iha instalasoens apoiu, hanesan armazéns, edifísiu operasoens, edifísiu administrasaun, laboratóriu, gabinete segurança no combate insêndius ho refeitóriu (ka han-fatin). Bé, ne'ebé hodi halo operasoens refinaria, sei kanaliza husi bee-matan ne'ebé dok 10 km husi refinaria.

Iha etapa inisiál faze dezenvolvimentu ida ne'e, sei estabelese refinaria ida ba produsaun kombustíveis, tantu ba konsumu doméstiku (diesel, gasolina, GPL ho Nafta), nune'e mos ba exportasaun. Pólu refinaria iha Betano sei konkretiza, liuhosi parceria komersial, ne'ebé TIMOR GAP mak sei desempenha papel prinsipal, hanesan dinamizadór ba dezenvolvimentu projetu ne'e.

Estudus viabilidade kona-ba projetu ida ne'e desenvolve tiha ona, nune'e mos estudus kona-ba impaktu ambiental, no realiza mos ona konsultas públicas. Oras ne'e daudaun, hein hela lisensa ambiental, atu hahú projetu.

4.2.3 Dezenvolvimentu Fábrica Gás Natural Likefeitu

Governu sei kontinua haka'as-an atu desenvolve gás, ne'ebé mai husi kampu Greater Sunrise, liuhosi konstrusaun gazodutu (ka kadoras gás nian) ne'ebé liuhusi tasi okos to'o iha kosta Sul Timor-Leste, no konstrusaun no operasaun fábrica Gás Natural Likefeitu (GNL) ida, hodi hala'o prosesamentu.

Agrupamentu ida ne'e sei inkorpora kompleksu fábrica GNL nian, inklui instalasoens marítimas ne'ebé asociadas (ka koneksas), nune'e mos ho áreas urbanas foun. Aeroportu iha Viqueque sei reabilita atu bele iha kapasidade atu opera (ka hala'o) dezlokamentus "fly-in-fly-out" (FIFO) ba trabalhadores ne'ebé servisu ba operadores GNL, hodi serve mos hanesan aeroportu rejional ida.

4.2.4 Dezenvolvimentu Zona Kosteira Sul

Sei konstroe no/ou operasionaliza infraestruturas ne'ebé nesesárias, hodi suporta indústria petrolífera, halo ligasaun entre agrupamentus ou pólus petrolíferus tolu né. Ida ne'e sei inklui:

- Sidades foun, hodi aloja ka simu trabalhadores setór nian no hodi realoja rezidentes lokais;
- Autoestrada ida ho propóztu liga agrupamentus tolu ne'ebé refere no apoia kresimentu indústria petrolífera iha kosta sul tomak, hodi permite dezenvolvimentu ekonómiku jerál no hadi'a populasoens tomak nia moris. Autoestrada ida ne'e inklui mos serkade 28 pontes prinsipais lubuk ida;
- Portu multifunsional ida iha Suai, hodi apoia baze lojístika ida nebá;
- Aeroportu iha Suai, ne'ebé halo hotu ona, ba operasoens seguras aeronaves lijeiras (ka ki'ik) ho elikópterus nian, hodi apoia atividades petrolíferas. Aeroportu ida ne'e sei reforsa transporte pasajeirus no merkadorias, inklui terminal ida ho instalasoens alfândegas ho imigrasaun nian, kuartél ba bombeirus, heliportu ida ho mós instalasoens servisus aéreus ba ambulânsia.

Nafatin iha setór ida ne'e, Governu sei:

- Kontinua forma kuadrus profisionais no téknikus no fó bolsas estudu ba áreas especializadas, ne'ebé iha ligasaun ho setor petrolíferu;
- Kontinua kapasita comunidades iha Munisípius, ne'ebé envolvidus diretamente iha Projetu Tasi Mane ne'e;
- Dezenvolve mekanizmu ida kona-ba uzu gás natural iha atividades ekonómikas país nian;
- Estabêltese kompañia nasional mineira Murak-Rai Timor-Leste S.A, ne'ebé sei tau-matan ba intereses Estadu nian, iha atividades explorasaun rekursus minerais país nian;
- Aumenta atividades estudu, peskiza ho promosaun ne'ebé halo nafatin iha rai-laran no rai-li'ur, atu bele maksimiza investimentu iha setor petrolíferu no mos iha setor mineiru;
- Garante konformidade (ka kumprimentu) ba Transparênsia husi Indústrias Extrativas (ITIE), hodi kontinua ható'o relatórius nesesárius;

- Asegura sinerjias ho kooperasaun internasional, iha âmbito setor rekursus enerjéticos;
- Kontinua trabalhus de peskiza no desenvolvimento petróleo no gás nian, iha áreas terrestres no marítimas (ka tasi laran) Timor-Leste nian, liuhosi TIMOR GAP ho ninia parseirus, ou investidores interesadus seluktán;
- Asegura katak reseitas ne'ebé mai husi exploraun petróleo ho gás natural bele kontribui ba industrializasaun país no ba desenvolvimento atividades ekonómicas nacionais seluk, no aumentu iha exportasoens;
- Desenvolve lejislasaun adisional no regulamentasaun kona-ba jestaun ne'ebé eficiente no transparente, iha atividades tomak ne'ebé relasiona ho exploraun rekursus petrolíferus ho minerais iha Timor-Leste, inklui:
 - (a) Revizaun ba Lei kona-ba Atividades Petrolíferas ho lejislasaun komplementar seluk;
 - (b) Aprovasaun ba Kódigu Mineiru no kontratu modelu, hodi hala'o operasoens mineiras, ho lejislasaun no regulamentasaun komplementar;
 - (c) Aprova no implementa lejislasaun nesesária atu asegura implementasaun ba dispozisoens ne'ebé prevê ona iha Tratadu ba Fronteiras Marítimas entre Timor-Leste ho Austrália, hanesan kona-ba tranzisaun husi kampus petrolíferus husi Área Desenvolvimento Konjuntu Petrolíferu ida uluk, ba fali jurisdisaun eksklusiva Timor-Leste nian.
 - (d) Estabelesimentu Fundu Mineral ida, atu asegura administrasaun ne'ebé di'ak liu ba reseitas ne'ebé hetan husi atividades minerais iha País.

4.3 Turizmu

Turizmu, hanesan motór importante ba desenvolvimento atividades ekonómicas, hodi kontribui mos ba salvaguarda ka defeza patrimóniu natural no kultural Timor-Leste nian.

Ho beleza (ka nia furak) natural ne'ebé la kompara ho seluk, ho istória ida ne'ebé rika tebetebes no patrimóniu kultural ida úniku, Timor-Leste iha kondisoens tomak atu desenvolve ninia setor turístiku orijinal duni, ne'ebé envolve liu-liu nia povu rasik no kria empresas ho oportunidades empregu ne'ebé diversifikadas.

Governu sei, ho forma planeada no organizada, desenvolve estratégia ida ba turizmu iha rejiaun, no la buka kompete ho turizmu boot iha Sudeste Asiátiku, mas bele kria sinerjias ho localidades seluk iha

rejiaun, hanesan Flores, Molucas no Kupang, atu dezenvolve pakotes turístikus ne'ebé bele atraí vizitantes husi Indonézia, husi Austrália no husi paízes seluk iha Ázia ho Pasífiku.

Bele mos aposta iha turizmu ne'ebé bazeia ba lasus istórikus no kulturais komuns, inklui denominador komun husi lian portugueza, hodi promove iniciativas iha âmbito paízes CPLP. Maibé, no tanba konsidera mos pozisaun estratéjika Timor-Leste nian iha quadru ASEAN, presiza mos loke dalan ba relasoens istórikas no kulturais sekulares ne'ebé liga povus luzo-aziátikus iha rejiaun, hanesan Melaka, Sri Lanka, Macau, Bangucoque, Goa, entre seluk. Governu, nun'e, sei aposta iha promosaun iniciativas inovadoras, hodi halo Timor-Leste sai sentru kultural ho pontu enkontru entre povus sira ne'e, inkluzive liuhosi realizasaun 2ª Konferênsia Comunidades Luzo-Aziáticas iha Timor-Leste.

Timor-nia turizmu bele konta ho vantajens kompetitivas, hanesan tuir mai:

- i) Hanesan país katóliku ida iha rejiaun, ne'ebe pratika rituais katólikus ne'ebé bele serve hanesan atrativu ba turistas katólikus husi rejiaun;
- ii) Hanesan país ida ho istória únika no resente (ka sei foun hela), ho fatin simbólikus barak atu vizita;
- iii) Iha potensial boot tebes atu dezenvolve turizmu foho nian no proporsiona atividades desportivas no aventura nian, ne'ebé serve hanesan atrativu ba kamada ida importante husi turistas;
- iv) Iha kosta nebé naruk ho praias ne'ebé furak no nakonu ho biodiversidade, nebé iha potensial boot ba dezenvolvimentu desportus, aventura no atividades marítimas, inklui 'snorkeling' ho mergulhu (ka luku);
- v) País ida ne'ebé halo mós parte ba Iniciativa Triângulo Koral, hodi proteje abundansia ho diversidade vida mariña iha bee laran Timor-Leste nian, ho atensaun espesial ba área hale'u ilha Ataúro, ohin-loron rekoñesida hanesan lokal subakuátiku ho biodiversidade boot liuhotu iha mundu;
- vi) Iha ninia gastronomia únika ne'ebé iha expansaun (ka buka aumenta liután) kahur ho tradisoens gastronómicas seluk;
- vii) Mantein comunidades ansestrais (ka husi tempu bei'ala sira), nebé sei iha ninia ambiente natural, ne'ebé ema bele vizita no estuda, husi perspetiva turística, ou antropolójika no académika, buat ne'ebé sei bele kontribui mos ba konsolidasaun identidade nasional, ne'ebé reflete iha propostas no iha produtos turístikus ne'ebé apresenta;

- viii) Nia paizajen, ne'ebe seidaux explora no kondisoens naturais ne'ebé sei prezerva didi'ak ninia meu ambiente, ne'e hanesan katalizador importante ida ba desenvolvimentu turizmu komunitáriu no ekolójiku;
- ix) Timor-Leste sei iha hela nia prosesu adezaun plena ba ASEAN, ne'ebé sei permite aumenta nia esforsus ba promosaun iha merkadus ne'ebé besik;
- x) Lokalizada mos iha pozisaun estratéjika ida (destinu tropikal no iha rejiaun aziátika ne'ebé populasaun barak liu iha mundu);
- xi) Finalmente, Timor-Leste iha índise ki'ik liu, iha mundu, kona-ba kriminalidade.

Nune'e, iha merkadu global ida ne'ebé buka ofertas turístikas ne'ebe foun no autêntikas, Timor-Leste bele hatúr nia-an ho kompetitividade boot, liu-liu iha rejiaun, haré ba nia diferença. Maibé, nesesáriu atu dezenvolve estratéjia efikaz ida ba atrasaun turístika, ne'ebé promosaun ho marketing sai fundamentais hodi hatudu kompetitividade ne'e.

Tanba ne'e, iha abordajen dahuluk, sei bele investe iha promosaun ba tipus turizmu hanesan:

- Turizmu Komunitáriu no Ekolójiku;
- Turizmu Aventura (inklui montañizmu ka sa'e foho, mergulhu ka luku no snorkeling ho tan desportus radikais seluk);
- Turizmu Relijiozu;
- Turizmu Istóriu no Kultural;
- Turizmu Etnográfiku;
- Turizmu Lazer no Balnear ka hari'is tasi.

Iha âmbito ida ne'e, Governu hakarak alkansa metas, hanesan tuir mai, no implementa asoens hanesan:

- Aumenta número turistas iha país, ba potencial máximo ne'ebé sustentável, ba número estimadu 450.000 turistas kada tinan, hodi nune'e aumenta reseitas internas;
- Implementa Política Nacional ba Turizmu, hodi asegura kresimentu ne'ebé efetivu, eficiente no sustentável husi setor turizmu;
- Finaliza no implementa planu asaun ida ne'ebé pormenorizadu ho nia medidas no asoens espesífikas tomak ba promosaun kona-ba desenvolvimentu turizmu;
- Implementasaun rejime jurídiku sobre jogus, no kriaun rejime jurídiku espesífiku kona-ba casinos;

- Kriasaun Marina Dili, liuhosi implementasaun Projetu “Marina Square” iha Bidau Lecidere no Projetu Frente Marítima Dili (Av. Dos Coqueiros), atu nune’e fatin iha tasi ibun sai espasu diak, lazer no diversaun ba populasaun tomak no ba turistas ne’ebé mai vizita Timor-Leste;
- Reabilita orla marítima (Tasi ibun) Dili, entre Avenida Portugal (Av. Dos Coqueiros) to’o iha marina Dili foun;
- Koopera ho Ministériu Administrasaun Estatal no Ministériu Obras Públicas hodi halo requalifikasaun ba jardins no espasu verde iha populasaun sira;
- Kontinua hadi’a no implementa lejislasaun no regulamentus kona-ba setor turizmu;
- Kontinua investe iha infraestruturas bázikas (aeroportus, portus, estradas, telekomunikasoens, etc) no iha infraestruturas turísticas (otelaria, restaurasaun, ekipamentus kulturais no rekreativos);
- Reforma kondisoens ho servisu ne’ebé halo iha Aeroportu Internacional Díli, garante katak simu di’ak duni turistas sira, ho servisu profisionais no ho qualidade, hodi nune’e hadi’a “primeiras impressões” bain-hira ema tama iha país;
- Estabelese Sentru Formasaun Turizmu no Otelaria iha Díli (PED);
- Rekoñese Merkadu Tais, iha sentru Díli, hanesan pontu turístiku prinsipal ida ne’ebé ema vizita barak liu, hodi dignifika espasu fatin ne’e no valoriza komersiantes sira-nia servisu, hodi envolve sira iha projesaun kona-ba edifísiu ida ne’ebé furak hodi simu ema, ne’ebé enkuadra duni iha nia misaun, ho ekipamentus apoiu ne’ebé di’ak, kafetaria, no área muzeológica no interpretaun kona-ba manufatura Tais;
- Kontinua asegura formasaun téknika iha área turizmu iha país tomak, ne’ebé orienta ba tipus atividades turísticas oioin (turizmu relijiozu, turizmu komunitáriu no ecolójiku, turizmu aventura, etc.);
- Hadi’a sinalizasaun no materiais promosaun turística nian, iha país laran, para bele atrai no orienta turista sira;
- Harii no dinamiza Parkes Jestaun ba Lafaek, hodi aumenta seguransa iha praias (ka tasi-ibun) no mos prezerva espésie no promove atrasaun turística husi animal ida ne’ebé sai hanesan reprezentaun formal simbólica identidade timor-nian;
- Kontinua dezenvolve pakotes turístikus abranjentes, tuir Zonas Turísticas Oriental, Sentral no Osidental;
- Fomenta diálogo interministerial permanente, tanba Turizmu sei dependente ba konjuntu kondisoens iha nível seguransa, saúde, obras públicas, ambiente, desportu, kultura, entre buat seluk, ne’ebé konjuga hamutuk hodi buka forma oinsá promove país no ban-hira simu visitantes;
- Hadi’a a koordenaun intersectorial atu dezenvolve áreas nebé liga ba malu, iha promosaun ba setor turístiku;
- Hadi’a koordenaun no reforsa parcerias ho setor privadu iha desenvolvimentu infraestruturas no ofertas turísticas;

- Expande ka habelar Sentrus Informasoens Turístikas, ba Munisípius hotu-hotu (PED 2015);
- Alarga Programa kona-ba Turizmu Komunitáriu ba Munisípius hotu-hotu;
- Haree di'ak fali, hadi'a no dinamiza website 'www.timorleste.tl' ho materiais promosaun nian kona-ba Timor-Leste no garante nia divulgasaun máxima, iha rejiaun no iha mundu;
- Kontinua realiza estudus de viabilidade hodi implementa projetus turizmu históriku nian, inklui formasaun ba guias turísticos;
- Kontinua implementa eventos turístikus anuais, nasionais no internasionais, hanesan desfile Carnaval, regata (ka halai-taru ró) entre Darwin-Díli, Tour de Timor ho Karavana Artístika, Festival Dansas no Muzikas tradicionais no Festival Gastronomia;
- Reforsa mekanismu koordenasaun intersectorial hodi halo promosaun no dezvoltamentu sector turismo nian.

4.4 Komérsiu

Formulasaun polítikas komersiais sei permite eskoamentu produtus husi setor primáriu no sekundáriu nian, iha nível nasional ho internasionais, tanba aumentu iha exportasaun produtus bele jera (ka kria) rikezas ba indústriia no, konsekuentemente (katak, ho ida ne'e), ninia kresimentu.

Governu sei kontinua implementa medidas hodi regula atividades komersiais no aprova polítikas ba expansaun merkadus, inklui divulgasaun produtus ho valor ekonómiku akresentadu, liuhosi estratéjias merkadu-nian ho relasoens públikas ne'ebé bele promove Timor-Leste ho nia produtus iha rejiaun no iha mundu.

Iha âmbito ida ne'e, Governu sei:

- Fortalese ka hametin papel setor privadu komersial;
- Reforsa Sentru Lojístiku Nasional;
- Haré di'ak fali no expande (ka habelar) projetus konstrusaun armazéns ba trânzitu merkadorias iha zona fronteira terrestre;
- Harí merkadus munisipais ho qualidade;
- Dezenvolve mekanismus promosaun, divulgasaun, marketing no distribuisaun física produtus nasionais;
- Finaliza prosesu adezaun, hanesan membru plenu, iha Organizaun Mundial Komérsiu (Timor-Leste agora ne'e iha estatutu hanesan atualmente membru observador OMC);
- Harí sentrus komersiais, ne'ebé bele apoia zonas dezvoltamentu rejional, tuir Kuadru Nasional Planeamentu;

- Investe iha formasaun no kapasitasaun iha setor privadu, atu bele hadi'a kompetitividade nasional e internasional;
- Aumenta asoens iha inspesaun no fiskalizaun atividades komersiais;
- Reforsa kapabilidade Autoridade Inspesaun no Fiskalizaun ba Atividade Ekonómika, Sanitária no Alimentar (AIFESA), ba kontrolu kona-ba qualidade, kondisoens transporte no salubridade jénerus alimentares no fatin produsaun no komersializaun, inklui introdusaun "livru reklamasoens" iha estabelesimentus komersiais, sei hanesan projetu-pilotu, atu bele avalia se iha sentidu atu kesi ho lei no habelar ba estabelesimentus privadus no públikus tomak;
- Reforsa no kapasita servisu Ajênsia ba Promosaun Investimentu no Exportasaun Timor-Leste I.P (TradeInvest);
- Reforsa no kapasita Servisu Rejistu no Verifikasaun Emprezarial (SERVE);
- Implementa no hadi'a kuadru legal, relasiona ho atividades komersiais.

4.5 Indústria

Vizaun kona-ba Timor-Leste ho ekonomia ida ne'ebé moderna no diversifikada sei depende, tuir buat ne'ebé temi uluk ona, ba investimentu ne'ebé halo iha kresimentu indústrias principais: agrikultura, turizmu ho petróleu, tanba iha vantajens boot iha nível indústria sira ne'e, haré ba rekursus naturais nebe iha, lokalizaun jeográfika no perfil ekonómiku.

Maibé, Timor-Leste iha kondisoens tomak atu desenvolve indústrias subsidiárias seluk ba desenvolvimentu setores primários produsaun.

Agroindústria, ne'ebé signifika transformasaun na'an, latisínus (ka produsu husi susu-been), ikan ho produsu agrícolas ba fali subprodus ho exelênsia, ho natureza biolójika, bele hamosu markas referênsia ho potencia exportasaun ba merkadus seletus (ka espesiais) ho presu ne'ebé ás liu.

Timor-Leste bele mos aposta iha transformasaun matéria-prima ba embalamentu produsu, mobiliáriu, konstrusaun sivil, entre buat seluk, hodi multiplika ka aumenta oportunidades transformasaun rekursus naturais oioin, ba abastesimentu lokal, reduz nesesidade husi importasaun, hodi ba ona exportasaun produsu orijinais ho valor akresentadu.

Ho desenvolvimentu setor agrícola, sei mosu mos kondisoens ba produsaun sereais ne'ebé boot liu, ortofrutícola no pekuária, ho tipu hanesan semi-intensiva no, liu-liu, extensiva. Se ita asosia (ka liga) kresimentu ne'e ho promosaun agroindústria, ida ne'e bele lori ita ba desenvolvimentu sustentável país ne'e nian, tanba ita bele potencia (ka loke dalan ba) desenvolvimentu espontâneo iha merkadus komersiais lokais no bele mos halo nia distribuiaun iha nível nasional, hodi otimiza rekursus

endójeneus (ka internus), proteje meu-ambiente hodi respeita kapasidade auto-rejenerasaun ekosistema nian.

Liuhosi kresimentu setor industrial tuir planu ne'ebé iha, Governu bele promove objetivus hirak ne'e:

- Aumenta oferta beins konsumu esensiais ba bein-estar comunidades lokais nian;
- Kria oportunidades ba empregu;
- Impulsiona (ka dudu ba oin) no valoriza dezvoltimentu setor primáriu: agrikultura, peskas, pekuária no florestas;
- Desenvolve pequenas ho médias empresas, aproveita rekursus umanus no materiais lokais;
- Inkrementa (ka desenvolve) papEI setor privadu no dezvoltimentu rural;
- Kontribui ba redusaun beins importadus, liuhosi aumentu produsaun beins nasionais ho kualidade;
- Prezerva meu-ambiente, garante katak áreas industriais bele minimiza impaktus aat iha ambiente no iha abastesimentu ba bee, rekolha rezíduus sólidos ho sistema esgotus ne'ebé adekuadus ba rezíduus industriais.

Nune'e, Governu sei aposta iha indústriá hanesan motor determinante ida, ba dezvoltimentu ekonómiku nasional, nebé iha nia baze iha dezvoltimentu rural, liuhosi prinsipais asoens, hanesan tuir mai:

- Finaliza Política Nasional kona-ba Desenvoltimentu Indústriá ho baze iha Kuadru Nasional Planeamentu, hodi determina prioridades produsaun, tuir rekursus disponíveis (ka nebé iha), inklui selesaun produsus prioritáriu ba konsumu internu no ba exportasaun;
- Halo revizaun ba kuadru legal, iha âmbito propriedade industrial, lisensiamentu industrial, inklui kestoens relasiona ho lokalizasaun unidades no parques industriais, atu garante prezervasaun ambiental;
- Kontinua apoia atribuisaun konsesoens públikas ba pekenas indústrias;
- Apoia instalasaun unidades produsaun industrial, hanesan agroindústrias no promove sentrus ba inkubadoras industriais;
- Promove kriaun no dezvoltimentu parques industriais, tuir Kuadru Nasional ba Planeamentu;

- Estabelese Parke Industrial Tíbar (estudu viabilidade kona-ba Parke Industrial Tíbar, atu garante armazenamentu produsu importasaun/exportasaun no mos produsu lokais hodi substitui produsu importadu, estudu ne'e iha tiha ona);
- Implementa kadastru kona-ba propriedade industrial;
- Presta (ka fó) apoiu tékniku no financeiro, hodi reforsa estabelesimentu mikro, pekenas no médias empresas no indústrias;
- Desenvolve formasun emprezarial no téknika ba mikro, pekenas no médias empresas no indústrias;
- Introdúz teknolojias foun iha setor primáriu no sekundáriu ba desenvolvimentu agroindústria;
- Desenvolve kampañas ba agrikultores no produtores agrícolas kona-ba tranzisaun atividades primárias ba atividades industriais, hodi garante sira-nia envolvimentu no motivasaun;
- Desenvolve parserias ho setor privadu, nasional no internasional, ba kooperasaun iha setor ne'e, no mos ba transferênsia koñesimentus sientífikus no téknikus;
- Koordena ho entidades governamentais relevantes, hanesan Ministériu Edukasaun, kona-ba introdusaun kurríkulos ba produsaun agroindustrial, hanesan iha nível Ensinu Sekundáriu Tékniku-Vokasional;
- Kontinua investe iha projetus industriais ki'ik, hanesan ba produsaun masin, mina-nuu, sabaun, espesiaris ho bee iha botir, entre buat seluk;
- Operasionaliza, reforsa no expande (ka habelar) indústria resiklajen ba plástiku iha Timor-Leste;
- Reforsa produsaun ho implementasaun lejislasaun ne'ebé konsidera protesun ambientál iha âmbito kresimentu setor industrial.

4.6 Setor Privadu

Tuir Sensus 2015, Timor-Leste iha besik 51,24% husi populasun ho idade menus tinan 20. Ida ne'e signifika katak, iha tinan 5 to tinan 10 tuir mai, sei tama iha merkadu trabalhu jovens, rihun ba rihun, ho aspirasaun atu prepara sira-nia moris ida nebé dignu no halo parte iha ekonomia ida justa ne'ebé valoriza sira-nia servisu. Iha konjuntura ida ne'e, setor privadu, independentemente (katak, la haree ba) nia vokasaun no dimensaun, sei sai hanesan motor prinsipal iha ita-nia ekonomia nasional, nebé

garante kriaun empregu, nune'e, sai fator boot hodi halakon kiak no hadia kapital sosial ba nasaun.

Ekonomia privada ida saudável, ne'ebé bele hamrik ho di'ak ho prestasaun kontas ne'ebé rigoroza (ka tenki di'ak), sei fó ba país, la ós deit elementus estatístikus hodi orienta ba jestaun nasional, kontributu boot hosi reseita fiscal, ne'ebé determinante atu sustenta orsamentu jeral Estado, nune'e mós fó solusaun ba problemas sosiais iha Timor-Leste.

Diversifika ekonomia sai objektivu prinsipal ba Governu ida ne'e, ne'ebé nesesáriu atu kria kondisoens fiskais no burokrátikas, ne'ebé permite (ka halo) investidores sira, nasionais ka internacionais, iha vontade atu aposta (ka mai investe) iha ita-nia Rai. Nune'e mós, polítikas transversais hotu-hotu, ne'ebé haree ba dezvoltimentu ba kapital sosial, ba dezvoltimentu infraestruturas no mós ba dezvoltimentu iha setor governasaun nian, polítikas sira ne'e la'o hamutuk mak impulsiona (ka dudu) dezvoltimentu ekonómiku no kria kondisoens ba empriededorismu.

Nafatin iha kontestu ida ne'e, dezvoltimentu ba Kuadru Nasional Planeamentu, ho objetivu atu kria Pólus Dezvoltimentu no Zonas Ekonómikas Espesiais, sai fundamental hodi hari'i "áreas empresariais" ka "zonas industriais" iha País, tuir espesifisidades (ida-idak nian) no potencialidades iha rejiaun ida-idak, no hosi ne'e, bele dada setor privadu no kria empregu ne'ebé sustentável:

- Hadi'a polítikas empriededorismu nasional, ne'ebé inklui valorizasaun no edukasaun ba empriededorismu, reduz tiha obstáculos no fó apoiu ba empreendedorismu, ne'ebé abranje mós asesu ba iha internet no ba "know-how";
- Kria Sentru hodi fó Apoiu ba Empriedorismu, ba prestasaun servisu hodi suporta no apoiu ba negócios foun;
- Dezenvolve estudus ba atribuisaun insentivu ba setor privadu, liu-liu apoiu ba kriaun no kresimentu ba empresas ki'ik;
- Dezenvolve estudus no reforma kuadru legal iha setor finanseiru (revoga lei UNTAET nian ne'ebé sei vigora, hodi previne abuzus finanseirus, nsst);
- Elabora estudus investimentu no planu negócios, ho objetivu hari'i Banku Investimentu ida iha Timor-Leste, hanesan parseiru estratéjiku ba Estadu, iha promosaun ba investimentus públikus, ne'ebé sei aumenta empriededorismu no, husi ne'e, empresas nasionais no internacionais bele mosu tan;
- Halo estudus kona-ba regulaun ba seguros no promove dezvoltimentu iha setor ida ne'e, hodi permite hamosu seguradoras nasionais;

- Reforsa instituisoens ne'ebé responsáveis ba produsaun estatística nasional ne'ebé rigoroza, hodi informa setor privadu nasional no internacional;
- Atualiza, iha tinan rua-rua, "Guia do Investidor";
- Haboot no reforsa kapasidades Institutu de Apoio ba Desenvolvimento Emprezarial (IADE);
- Haboot no reforsa capacidade SERVE nian no Tradeinvest no garante atualizasaun no hadi'a servisus ne'ebé fó liuhosi nia Websites ('www.serve.gov.tl' no 'www.investtimor-leste.com');
- Kontinua reforsa TradelInvest, ne'ebé promove investmentus importantes ba desenvolvimento iha setor privadu, ezemplu liuhosi projetu boot sira hanesan "Heineken", "TL Cement" no "Pelikan Paradise". Investmentos boot sira ne'e kontribui ba objetivu Timor-Leste atu halo kriaun postus de trabalho barak liu tan ba timor-oan, hodi nune'e hasa'e rendimentus ba familia no aumenta reseitas ba Estadu;
- Promove Kriaun no desenvolvimento kooperativas, liu-liu iha áreas rurais, ne'ebé halo parte integrante ba pakote desenvolvimento ekonomia rural, hodi kapasita empriendedorismu no insentiva empresas kiik iha setores produtivos, liu-liu iha áreas agrikultura, peska no pekuária, nune'e atu kria ambiente ne'ebé diak ba kriaun kooperativas no fó apoio ba espansaun kooperativas ne'ebé iha tiha ona, ho forma sustentavel;
- Insentiva no apoia kriaun mikro no médias empresas, ho atensaun espesial ba desenvolvimento iha áreas rurais, liuhosi programas kapasitasaun, assesu ba crédito no kriaun merkadu;
- Reforsa instituisoens sira ne'ebé responsáveis ba estatísticas nacionais, bele sai rigoroza liu, atu bele fó sai ba Setor Privadu, nasional no internacional;
- Kontinua desenvolve programa "Inkubadora de Negócios", hodi nune'e permite assesu ba finansiamentu negócios, tuir kritérius no prioridade ne'ebé define ona husi Governu;
- Hare'e fali no implementa 'Guia de Reforma no Fomentu Ekonómico', tinan 2015 nian, atu fasilta investmentu privadu, promove diversifikasaun ekonómika no kria empregu sustentável;
- Hametin investmentu ne'ebé kontínuo no reforsa iha formasaun profesional, ne'ebé transversal ba atividades estratégikas Nasaun nian, atu nune'e desenvolve karteira nasional ba profissionais kualifikadus ne'ebé suporta insiativa privada;
- Kontinua desenvolve no partisipa iha iniciativas, eventos no konferéncias internacionais ba promosaun parserias estratégikas entre empresas timor-oan no empresas internacionais;

- Hadi'a komunikasaun no hadi'a parserias estratéjikas entre setor públiku no privadu, hodi halo alinhamentu ba prioridades, atu nune'e setor privadu bele sai parseiru estratéjiku ida diak-liu ba Governu;
- Kontinua kapitaliza Banku Nasional de Comercio de Timor Leste;
- Kontinua koopera ho Kámara Komérsiu no Indústria de Timor Leste;
- Kontinua investe iha TIA-GT (Timor-Leste, Indonézia & Austrália Growth Triangle) no fó apoiu atu estabelese plataforma ba desenvolvimentu ekonómiku sub-rejional ne'ebé integradu no ba formalizasaun estratéjia ba kressimentu iha triángulu ne'e, ida ne'ebé sei potencia (ka dudu maka'as) investimentu privadu iha rai laran, liuhosi esforsu no kooperasaun ne'ebé kria ba empresas/indústrias, cooperativa no Kámara Komérsiu no Indústria husi Países tolu ne'e;
- Kontinua revê no produz legislasaun foun, atu bele promove desenvolvimentu iha setor privadu, ne'ebé efisiente, transparente no sustentável;
- Hadi'a sistemas no prosedimentus, nebé armoniza ba malu no simples, inklui mós disponibilizasaun formuláriu no dokumentus, ne'ebé fásil atu lé no iha 'linguas-de-trabalho' oin-oin, ne'ebé hare dehan nesesáriu duni ba relasaun komersial entre ita-nia Estado ho investidores sira;
- Produz Guia ida ne'ebé abranjante ho informasaun tomak no mós legislasaun ne'ebé atualizada no relevante, ba investimentu husi setor privadu;
- Regula no implementa Lei foun ba Migrasaun no Asilo, ne'ebé permite prosesamentu efisiente no efikaz, ba vistus ba investidores no trabalhadores estrangeirus;
- Regula no implementa Lei foun ba Terras no Propriedades, hodi reforsa seguransa jurídika kona-ba propriedade no asegura konfiansa hosi investidores sira;
- Kria kondisoens atu kapasita no hadi'a seksaun komersial iha Tribunais, atu bele garante kumprimentu ba kontratus komersiais no rona no mós resolve disputas komersiais, ho efisiensia, lalais no justu.

4.7 Empregu

Mudansas estruturais ne'ebé hakarak implementa iha ekonomia sei fó oportunidades de empregu ba timor-oan. Wain-hira ekonomia ne'e aumenta daudaun no bain-hira bele transforma daudaun ona setor agríkola no setor privadu, hodi dudu produtividade nebé bot liu ona, hanesan mós wain-hira investimentu iha edukasaun no saúde harí daudauk forsa-de- trabalhu ida ne'ebé kualifikada ona, Timor-oan sira sei kontribui maka'as liu-tan ba kresimentu ekonomia.

Wain-hira ekonomia ne'e dezenvolve, maka setor servisu sei aumenta no aumenta ida ne'e korresponde ba oportunidades boot liu ba kriaunsaun empregu, ho perspetiva (ka hanoin) espesial ba feto sira. No mós, bele prevê katak bain-hira Nasaun ne'e sai ekonomikamente forte liu, maka sei hamenus númeru hosi postus-de-trabalhu prekáriu (katak, la estável, metin). Iha ne'e, inklui mós sira ne'ebé servisu ho konta rasik, sira ne'ebé la-iha salariu mínimu fulan-fulan ne'ebé garantidu ona, nomós sira ne'ebé ezerse sira-nia funsaun ho nível kondisoens seguransa-de-trabalhu, nebé kiik. Governu hakarak hamenus, iha tinan hirak mai ne'e, nível empregu ne'ebé la estável iha Timor-Leste.

Política Governu nian ba setor empregu, bele haree iha ninia programa, tamba investmentus iha setores dezenvolvimentu oi-oin, mak sei kontribui ba forsa-de-trabalhu ne'ebé saudável liu no produtiva, forsa-de- trabalhu ne'ebé edukada liu no kualifikada no, ho diversifikasaun iha produsaun nasional, sei mosu oportunidades barak ba kriaunsaun empregu.

Governu sei:

- Haree fali (ka revê), aprova no implementa Estratéjia Nasional Empregu nian 2017- 2030, ne'ebé hakarak aumenta prokura iha merkadu trabalhu, hadi'a oferta merkadu trabalhu no kontinua hametin instituisoens merkadu-de-trabalhu;
- Promove kriaunsaun empregu ba jovens, ba adultus no ba feto sira, hodi asegura sempre prinsípiu igualdade ba oportunidades, iha kestaun jéneru;
- Kria mekanismus hodi kombate servisu prekáriu (ka la permanente), inklui liu-hosi monitorizasaun ba empresas no entidades empregadoras (ka nebé fó servisu), hanesan mos garante implementasaun ba regulamentus laborais no eskema bas protesasaun sosial;
- Aumenta tan númeru trabalhadores timoroan, nebé bá servisu iha estrangeiru, reforsa tan protokolus koperasaun no hadi'a monitorizasaun ba prosesu sira ne'e no akompanhamentu ba traballadores sira;
- Estabelese Sentru de Empregu no Orientasaun Profisional iha Munisipiu ida-idak (PED 2020);
- Regula Lei do Trabalhador no reforsa mekanismus diálogo hodi aumenta produtividade;
- Hadi'a mekanismus kona-ba rezolusaun konflitus nebé mosu iha servisu, inklui liu-hosi mekanismus ba mediasaun no konsiliaaun;
- Aumenta kualifikasaun trabalhador sira, liu-liu ba jovens sira, ho objetivu atu aumenta kompetividade sira nian iha merkadu trabalhu internacional.

4.8 Kooperativas

Kooperativas, liu-liu kooperativas agrícolas, iha importânsia estratéjika ba desenvolvimentu nasional. Harii kooperativas ne'e hanesan forma ida atu enkoraja kresimentu setor privadu iha zonas rurais no estimula (ka insentiva) partisipasaun ativa iha sistema ekonómiku nasional.

Governu sei kontinua investe iha formasaun rekursus umanus no kapasidade institusional, iha nível kooperativas no providensia ferramentas no ekipamentus, matérias-primas no konsesoens pekuniárias (ka finanseiras) ne'ebé permite hadi'a nia infraestruturas no aumenta qualidade husi nia produs, ho hanoin halo mos expansaun merkadus no aumentu iha atividades komérsiu.

Inkrementa (ka dezenvolve) no socializa ideias ho projetus ne'ebé bele iha, ba famílias ho comunidades, ne'e hanesan mos forma ida hodi kria kondisoens ba sira-nia desenvolvimentu rasik. Buat sira ne'e balun, mak hanesan:

- i) Produsaun Bani-Been: Timor-Leste produz rasik bani-been ho lilin ne'ebé bele aproveita ba desenvolvimentu kooperativas, ne'ebé hadi'a ekonomia familiár. Aposto ida ne'ebé organiza didi'ak iha produsaun bani-been, ho apoiu husi cooperativa, bele hanesan mos kontribuisaun importante ida ba ekonomia familiar.
- ii) Produsaun Paun: investe iha sementeiras sekeiru, katak fini ba rai-maran, liu-liu ba trigu no 'shorgum', no mos ba sevada ho senteiu ba produsaun fariña paun nian, bele hanesan estratéjia importante ida ho benefísiu diretu ba famílias ho comunidades. Apoia produsaun sereais no técnicas moajen (ka dulas nian), ho nia kooperativas panifikasaun (ka halo/tunu paun), (ou, tuir mai, nia industrializasaun), hodi halo mos distribuisaun ba eskolas, ida ne'e hanesan aposta di'ak ida hotu.
- iii) Produsaun laktisínus (katak, husi susu-been): investimentu iha pekuária, liu-liu ba kria saun gadu, bele insentiva produtores sira atu transforma susu-been karau-vaka nian ba 'iogurtes' ka buat seluktán, hodi kontribui hadi'a ekonomia familiar.

Governu, iha área ida ne'e, sei kontinua:

- Presta (ka fó) apoiu no konsesoens públikas ba kooperativas, ne'ebé hala'o atividades setor privadu iha áreas oiain;
- Insentiva movimentus kooperativus, asociativus no mutualistas atu bele garante partisipasaun komunitária no ajuda dinâmika nebé mosu iha terseiru setor (ka setor datolu), iha luta hasoru desigualdades sosiais no ekonómikas;

- Insentiva respostas ne'ebé organizadas, husi sosiedade sivil, ba nesesidades sociais, liuhosi konsesaun beins no prestasaun servisu, no utilizaun sosial ba exedentes ne'ebé hetan;
- Fasilita asesu kréditu ba kooperativas;
- Reforsa sistemas kona-ba asesu ba kréditu, ba kooperativas kréditu, inklui simplifikasaun iha prosesu sira né;
- Promove intercámbiu entre kooperativas;
- Insentiva fornecimentu matérias-primas ne'ebé produz liu hosi kooperativas sira ba indústria setor ida-idak, no ba distribuiaun ka sosa direta ba konsumidor sira;
- Propoin no konstrói no reabilita Sentru Armazenamentu lokal conforme nesesidade produzaun hosi cooperativa sira no tuir nesesidades ne'ebé iha;
- Insentiva fornecimentu bens alimentares no sira seluk ne'ebé produz hosi kooperativas, ba merenda escolar;
- Coordena ho Centro Nacional Logística (CNL) no setor privado ba akizisaun produzaun kooperativas sira;
- Promove kapasitasaun ba kooperativas, liu husi formasaun técnica oi-oín atu kooperativas bele jere rasik ho eficiência no efikaz.

4.9 Ambiente

Tuir Konstituisaun Repúblika, ema hotu-hotu iha direitu ba ambiente vida umana, ne'ebé sadiu no ekolojikamente ekilibradu, no mós iha dever atu proteje no hadi'a ba jerasoens vindouras (ka aban-bainrua nian). Estadu rekoñese katak preziza prezerva no fó valor ba rekursus naturais. Estadu tenke promove asoens ba defeza meu-ambiente no salvaguarda desenvolvimento sustentável ba ekonomia.

Povu timor iha ligasaun ne'ebé forte ho meu-ambiente, ne'ebé hadulas nia, la-ós de'it tanba kestoens relasiona ho sobrevivência (ka tahan moris) maibé mos tanba razões culturais ho antropológicas. Maibé, aleinde kauzas naturais, hanesan udan, exploraun ne'ebé dezekilibrada, ou mezu destruiaun meu-ambiente, nebé, durante ne'e, provoca erozaun beibeik ba rai, inklui hahalok hanesan tá demais ai no sobu ai-laran boot sira, sunu rai no la iha planeamentu ho monitorizaun ba atividades agrícolas no konstrusaun infraestruturas.

Erozaun (ka rai monu) no deslizamentus (ka rai halai), mak kauza degradaun ba rai no estraga mos kaptasaun bé, hodi hamenus kuantidade no qualidade bé husi rai-okos no ameasa vida selvajen ho rekursus alimentares. Husi sikun seluk, ábitus (ka lisan) sosioekonómikus hanesan uza ai-maran hodi te'in no poluisaun (ka hafo'er atmosfera) tanba emisoens (ka suar) husi kareta ho motorizadas

no sunu ai-laran, buat sira ne'e hotu mak kontribui hodi aumenta doensas respiratórias (ka moras dada-iis nian).

Nune'e mos, alterasoens klimátikas ne'ebé halo nível tasi sa'e ás no hamosu kondisoens meteorolójikas ne'ebé aat tebetebes, hodi provoka inundasoens, inseguransa alimentar, alterasaun iha kompozisaun kímika ho temperatura tasi ne'ebé afeta resifes koral (ka fatuk ahu-ruin) iha tasi, buat sira ne'e hotu mak sai hanesan dezafiu ambiental sériu ida, ne'ebé Timor-Leste tenke fó resposta no kria mekanizmus prevensaun.

Bele dehan katak ne'e hanesan dezafiu ida tan ba Timor-Leste, haree ba nia faze embrionária (foin hahú) iha dezvoltamentu, ne'ebé presiza tebes duni kresimentu indústrias de suporte (ka hodi fó apoiu) ba kresimentu ekonómiku. Maibé, bele subliña mos katak kontribuisaun Timor-Leste ba problema alterasoens klimátikas, ne'e ki'ik tebes duni, tanba Timor-Leste país ida ne'ebé ladún hasai 'dióxidu de karbonu', la hanesan ho nasoens emerjentes no dezvoltadas.

Importante mos atu refere iha ne'e katak defeza ho konservasaun meu ambiente, inklui promosaun biodiversidade, sai hanesan kontributu importante ba dezvoltamentu indústria ida ho potenciál maka'as, katak, kresimentu setor turístiku.

Tanba ne'e, Governu sei kontinua ho objetivos prioritáriu ba area ambiental, hanesan tuir mai:

- Haree di'ak fali no reforsa kuadru institusional no legal ambiente nian, kona-ba uzu sustentável rekursus naturais, inklui planeamentu ne'ebé di'ak liu, ho monitorizasaun setores transversais ba dezvoltamentu país-nian, hodi prevene deteriorasaun (ka degradasaun) ambiental no hadi'a jestaun ambiental país ne'e nian;
- Promove kampañas kona-ba kestoens ambientais no desenvolve konteúdos ho asoens, ne'ebe permite edukasaun ambiental ida ne'ebé jeneralizada, ba labarik sira, jovens, adultos ho comunidades, liu-liu kona-ba prezervasaun ambiente;
- Hahú implementa Planu Nasional ba Ordenamentu Territóriu, hanesan mós lejislasaun nebé presiza, hodi inklui realizasaun estudus ho levantamentus kona-ba avaliasaun no impaktu ambiental, antezde konstrusaun projetus boboot;
- Hadi'a koordinasaun intersetórial, atu nune'e bele inklui preokupasoens ambientais iha programas dezvoltamentu País, inklui áreas agrikultura no peskas, dezvoltamentu infraestruturas, turizmu ho explorasaun rekursus enerjéticos;
- Kapasita no hadi'a instituisoens no organizmus ne'ebé responsáveis ba jestaun, monitorizasaun no fiskalizasaun kona-ba kestoens ambientais, ho prioridade ba localidades (ka fatin) no áreas intervensaun, ne'ebé ho risku boot liu ba degradasaun ambiental;
- Reforsa parcerias nacionais no internacionais ba jestaun ambiental ne'ebé di'ak liu.

Tanba ne'e, Governu propoen atu desenvolve asoens, hanesan tuir mai:

- Implementa rejime jurídku kona-ba jestaun, protesaun ho konservasaun ambiental, inklui estratéjias ho planus asaun ne'ebé aprova tiha ona, inklui lejislasaun kona-ba biodiversidade nasional, protesaun animais selvajens ka fuik, nsst;
- Kontinua akompañia no subskreve akordus, programas no mekanizmus internasionais, ne'ebé relasiona ho jestaun no konservasaun ambiente no alterasoens klimátikas, inklui nia tradusaun iha lejislasaun nasional no implementasaun medidas no normas, ne'ebé adota tiha ona (diminuisaun emisaun HCFC, Konvensaun Viena kona-ba ozono, Konvensaun Internasional UNFCCC, UNCCD, UNCBD, Akordu Paris, no sst);
- Kontinua programa reflorestasaun ba áreas degradadas ka ne'ebé estraga ona, liu-liu áreas hanesan foho-lolon sira hadulas Díli no seluktán ne'ebé konsidera prioritárias;
- Implementa 100% viveirus komunitáriu, iha tinan 5 oin mai, ho kontinuasaun ba plantasaun ai, milhaun 1 tinan-tinan, iha país tomak;
- Introduz (ka hatama) programas foun ho kampañas kona-ba redusaun sunu rai no sunu ailaran, durante époka (ka tempu) rai-maran, inklui substitui (ka troka) neineik ábitu uza ailaran hanesan fonte enerjia;
- Realiza estudus kona-ba rekursu ba enerjias renováveis no kontinua implementa projetus-pilotu kona-ba enerjias renováveis, hodi rekorre ba (ka uza fali) fontes eólicas (ka husi anin), solares (ka husi loro-manas), idroelétrikas (ka husi bé) no fontes renováveis seluk;
- Produz dokumentu estratéjiku ida kona-ba enerjias renováveis, halo koordinasaun ho entidade ne'ebé responsável ba setor eletrisidade, ba implementasaun enerjia limpa (ka moos);
- Dezenvolve programa kona-ba rekolha no tratamentu rezíduus sólidos no líquidos (ka maran no bén) iha país tomak, ho prioridade ba área Díli;
- Kontinua asegura implementasaun prémiu Suku Saudável no dezenvolve Prémiu “Habaki Ambiente” ba entidades komersiais, industriais no privadus, atu promove prinsipiu poluidor-pagador, konservasaun ba biodiversidade, redusaun ba emisaun karbonu ka medida ne'ebé ho objetivu hadia ambiente;
- Dezenvolve no Implementa regulamentus kona-ba kontrolu poluisaun ar, ruídu (ka tarutu) no rai, ho mós poluisaun atmosférica (ka lalehan) tanba gases (ka suar fo'er) ne'ebé sai husi veikulus;
- Kontinua investe iha kapasidade rekursus umanus iha área kontrolu ambiental, inklui uzu metodolojias foun ho testes ambientais;
- Estabelese laboratóriu ambiental ida, hodi halo testes ambientais ho ninia inspesaun, monitorizasaun no fiskalizasaun rasik;
- Produz estatísticas ambientais kona-ba Timor-Leste no asegura nia divulgasaun, tantu ba Ezekutivu hodi bele foti desizaun, hanesan mos ba koñesimentu públiku ein-jeral;

- Elabora ka prepara planus kona-ba Plano de Ordenamentu do Territóriu, ho ninia lejislasaun, hodi avalia kona-ba impaktus ambientais;
- Implementa Estratéjia Nasional ba mitigasaun ka redusaun lixu (ka fo'er) husi tasi;
- Implementa Estratéjia ho Planu Asaun kona-ba Biodiversidade Nasional;
- Servisu hamutuk ho CPLP, iha kompromisu atu dezenvolve "Estratéjia CPLP nian kona-ba Oseanus", buat ne'ebé transversal ba áreas hanesan ambiente no ekonomia;
- Kontinua investe iha rede boot id aba parkes nasionais, terrestres no mariñus, ne'ebé bele proteje amostras representativas biodiversidade país nian;
- Insentiva koñesimentu ne'ebé boot liu, kona-ba protesaun ambiental no princípios ambientais, iha kurríkulus iha ensinu formal, no mos promove kampañas ho asoens liuhusi ensinu naun-formal. Kontinua implementa programa "Eskola Verde", ne'ebé introduz konseitu ho prátika kona-ba sustentabilidade ambiental, iha eskolas ensinu primáriu no sekundáriu, iha territóriu nasional, hanesan atividade extrakurrikular ida;
- Dezenvolve Sistema Nasional kona-ba Áreas Protejidas no Parkes Nasionais no Konservasaun Biodiversidade, inklui aprovasaun planus jestaun integrada no sustentável, hanesan ba Parke Nasional "Nino Konis Santana", Parke Nasional "Xanana Gusmão" ho Jardim Botâniku "Francisco Xavier do Amaral";
- Dezenvolve koordenasaun entre entidade governamental ho responsabilidade ba setor ambiental no entidade governamental ne'ebé ho responsabilidade kona-ba setor turizmu, hodi kria programas kona-ba protesaun ekosistemas espesífikus, hanesan tartarugas (ka lenuk), no korais (ka ahu-ruin), etc.;
- Implementa "Política Zero Plástiku" iha territóriu tomak no dezenvolve programas ne'ebe efikazes, hodi kombate plástiku, hodi halo nia substituisaun bain-hira bele, inklui sensibilizasaun kona-ba perigu uza plástiku, liu-liu tanba degradasaun (ka estraga) tasi Timor, no mos oinsá dezenvolve indústria resiklajen ba plástiku;
- Promove sistema de jestaun ida ba Crocodilo ka Lafaek hodi minimiza no kombate atake ka ameasa hosi Lafaek sira;
- Kontinua halo identifikaun no levantamento ba dadus kona-ba rikeza biodiversidade, inklui mapeamentu ekosistema hosi biodiversidade oin-oin iha Rai leten, Tasi Laran, fatin bokon sira no ekosistema seluk ne'ebé iha risku boot;
- Promove no reforsa prátika kultural ne'ebé diak kona-ba protesaun ambiental, halo konservasaun ba natureza, protesaun ba fatin patrimóniu ho biodiversidade ne'ebé relevante.

5. KONTINUA HO KONSOLIDASAUN GOVERNATIVA

“Timor-Leste, nasaun ida nebé sei iha rendimentos kiik, ho setor privado ne’ebé foin hahú desenvolve-an ho mós diversifikasaun ekonómika nebé limitada, ekonomia nebé konsentradu liu iha produsaun agríkola. Maibé ita-nia nasaun iha oportunidades ekonómikas no iha potensial boot, atu sai Nasaun ida ho rendimentus médius”.

Maski progressus barak maka hetan ona iha área ekonomia, Timor-Leste tenki continua investe iha planeamentu estratéjiku hodi la’o ba ekonomia ida moderna no diversifikada. Estratéjia, simples no lós, atu promove diversifikasaun ekonómika no hamenus dependênsia ba reseitas mina-rai, maka atu potencia (ka fó kbit) ba Setores produtivos hanesan indústrias 4 importantes - agrikultura, turismo, petróleo no minerais no manufatureira, liu husi estudus atu aproveita rekursos naturais nebé iha, mais-valias husi pozisaun geográfika no husi perfil populasaun nian.

Nudar fator no resultadu husi hanoin no buka atu desenvolve objetivu ne’e, mak kriaun empregu no promosaun empreendedorismo, ne’e duni Governu tenki kria kondisoens ba jovens, enkuantu promove mos setor privado, tamba rekursus rua ne’e mak sei aumenta produtividade nasional no kria oportunidades ba krescimento ekonómiko ne’ebé sustentável.

Tan ne’e, Governo sei transforma riku-soin naturais, iha rai-laran ka iha tasi-laran, ba seguransa alimentar, ba saúde, ba produtividade no ba oportunidades kriaun empregu. Nune’e mós sei transforma hidrokarbonetos (ka mina-rai nebé todan) ba oportunidades desenvolvimentu infraestruturas, oportunidades ba setor privadu no ba kriaun empregu. Maibé, sei transforma mós rikeza nebé iha nia emar, nudar timoroan, transforma paizajem natural no ninia kultura ímpar (ka únika) ba empreendedorismu no ba aumentu rendimentus iha País tomak.

Ba ida ne’e, esensial mos atu desenvolve Kuadru Nasional de Planeamento ida kona-ba Polos (ka Sentrus) Desenvolvimento, iha rejioens balun iha ita-nia Rain, ne’ebé sei define karakteristikas rasik iha rejiaun ida-idak no potensial ba kresimentu husi sektor ida-idak no subsektore, tuir rekursus disponíveis (ka iha) iha fatin-fatin, atu implementa asoens no estratéjias kona-ba kresimentu sustentável no ba desenvolvimentu ekuitativu iha País tomak, tuir mote ne’ebé hateten katak *“se natureza rika duni, povo labele sai kiak”*.

5.1 Polítika Makroekonómika

Objetivo ida iha polítika makroekonómika husi VIII Governo, maka atu kria kampu serviço ba ema hotu, liu-liu ba jovens no ba moris diak ba povo tomak. Nune'e, Governo nia alvo maka atu kria, no mínimu, 60,000 kampo-de-servisu foun no atu mantein taxa badak ba dezempregu, no hamenus taxa kiak, minimu 10%, durante tinan lima oin mai.

Atu atinje objetivos hirak né, polítika makroekonómika sei orienta liu-liu ba desenvolvimento ekonómiku ho kresimentu nebé boot, inklusivu no sustentável, ba diversifikasaun ekonomia liu-husi desenvolvimento setores produtivos (agrikultura, turismo, petróleo no minerais, no industria manufactureira), promosaun ba investimentu husi setor privado no hametin sustentabilidade fiskal no desenvolve indústria finanseira.

Durante tinan lima oin mai, Governo hakarak atinje média kresimentu ekonómiku liu 7%, ho kontribuisaun boot husi investimentu sector privadu iha sectores produtivos. Governo sei kria kondisoens ba investimento, aumenta investimentu husi setor privado, no minimu 10% kada tinan, hodi kontribui atu diversifika ekonomia, aumenta baze ba imposto, hodi nune'e bele viabiliza objetivo kona-ba sustentabilidade fiskal, no kontribui ba desenvolvimento ne'ebé inkluzivu no sustentável.

Governo sei desenvolve uluk infraestruturas, rekursos humanos no hametin instituisoens públicas, núdar pré-kondisaun atu viabiliza implementasaun polítika makroekonómika, hodi atinje ninia objetivos. Núdar pré-kondisaun atu estimula desenvolvimento iha setores sira seluk, Governo sei kontinua desenvolve infraestruturas ho objetivo atu suporta kresimento ekonómiku no atu hametin produtividade, konektividade, asesu no afordabilidade (katak bele hola).

5.2 Setor Finanseiru

Indústria finanseira iha Timor-Leste sei limitadu hela ba setor bankáriu no seidak iha merkadu finanseiru. Merkadu finanseiru facilita osan naksulik husi ema sira ne'ebé iha osan liu (*surplus*) ba sira ne'ebé presiza osan, liu-husi mekanismu diretu no indiretu. Merkadu finanseiru ida luan no transparente, mak facilita investimentu iha setores produtivos no dudu kresimentu ekonómiku.

Governo sei servisu hamutuk ho entidades relevantes sira, liu-liu ho Banco Central Timor-Leste (BCTL) atu promove dezvoltimentu industria finanseira liu-husi kria ambiente favorável hodi fasilita atividades komersiais husi setor bankáriu, instituisoens seguros, instituisoens ba mikro kréditu no merkadu finanseiro iha Timor-leste.

Política dezvoltimentu ba industria finanseira ne'e sei kontribui ba mudansa iha estrutura ekonomia nian, ne'ebé sei depende maka'as ba despesa publica (*public sector driven economy*) ba ekonomia ida ne'ebé sustentável tamba sustenta ho atividades setor privado nian (*private sector driven economy*).

Iha âmbito ida n'ee, Governo mós sei:

- Promove estabelecimento rejime jeral ida atu fó garantias reais (ka los) kona-ba sasán móvel, no mós rejisto ba rikusoin;
- Hadi'a rejime legal ba setor finanseiru iha Timor-Leste, no mós hadi'a lejislasoens tuan ne'ebé agora dadaun sei utiliza;
- Kria rejime finanseiru ida ne'ebé koerente ho kuadru legal no institucional ne'ebé iha, hodi evita prática ne'ebé la-dia iha setor finanseiro;
- Halo estudus kona-ba dezvoltimentu setor seguros (ka 'asuransi'), ne'ebé esensial ba dezvoltimentu husi investimentu setor privadu nian.

5.2.1 Banku Dezenvolvimentu Timor-Leste (BDTL)

Dezenvolvimentu setor privado iha Timor-Leste la-la'o ho máximu, tamba limitasaun ka la-ia asesu ba kcréditu no ba finansiamentu ho durasun tempu naruk ho juros ne'ebé asesíveis. Empresas sira presiza kréditu hodi investe. Iha prokura (katak buka, hakarak, presiza) ne'ebé boot ba kréditu, iha Timor-Leste, atu hadi'a ka halo hotéis, atu fasilita retalhistas sira bele sosa sasán oin-oin no barak liu-tan, atu empresas konstrusaun sivil bele sosa ekipamentus no atu ema harii uma no eskritóriu. Maski bankus komersiais hahú iha aumentu no iha likidez iha sistema bankáriua, maibé kréditu ba setor privado menus husi 14%, husi total ativos. Bankus sira, ne'ebé funsiona iha Timor-Leste, fó deit kréditu ba organizasoens internacionais no ba empresas husi sira-nia rain no ba deit setores ne'ebé depende maka'as ba kontratu ho Governu no ba investimentu públiku.

Governo sei estabelese Banco Desenvolvimento Timor-Leste (BDTL), hodi bele fó asesu ba finansiamentu longo-prazu (ka tempo-naruk) ho taxa juros ne'ebé asesível. Banku ida ne'e sei fó oportunidade ba empresas timor hodi hamrik, emprega ema barak, harii infraestruturas no, nune'e,

kontribui ba diversifikasaun ekonómika. Banku ida ne'e sei foka liu ba hatán demandas ba kréditu iha áreas estratéjika Nasaun-nian, ne'ebé iha relasaun ho kresimentu setor privadu nian no ba dezvoltamentu merkadu finanseiru. Estado maka sei sai na'in ba Banku ida ne'e, ho kontribuisaun kapital timor-nian. Banku ida ne'e sei iha diretivas ba investimento klaras no rigorozas, ho operasoens administrativas no komersial ne'ebé independentes ho padraun ba boa-governasaun ne'ebe ás.

5.2.2 Banco Nacional Comércio Timor-Leste (BNCTL)

Asesu ba krédito kontinua sai problema empresas ki'ik no ba Timor-oan sira, inclui sira ne'ebé hela iha áreas rurais. Falta krédito mak impede empresas ki'ik atu bele aumenta sira-nia kbit, limita Timor-oan sira-nia kapasidade atu kria empresas no, tamba ne'e, impede kresimentu ekonomia. BNCTL buka haluan daun-daun ninia servisu, iha munisípius no mos iha postos administrativus, liu-husi banku móvel. Governo sei kontinua fó apoio ba BNCTL no ba ninia alargamento atu servi ita-nia populasaun tomak, liu-husi prestasaun servisu bankáriu no kréditus, hodi fó asesu ba servisu finanseirus ba Timor-oan sira no ba empresas mikro, ki'ik no médias, tanto iha áreas urbanas no mos iha áreas rurais. Governo mós sei kontinua fó apoio ba servisu Banco Central nian no banco komersial, hodi fasilita sistema bankáriu ida abranjente no asesível ba ema hotu, inclui esforsus kona-ba "Mobile Phone Banking" no "inkluzsaun finanseira".

5.2.3 Mikro no Uniaun de Krédito

Esforços atu haburas ekonomia nasional ne'ebé sustentável, sei halo liu-husi fó insentivus atu kria mikro-empresas no empresas familiares. Atu realiza ida nee, governo sei implementa política ne'ebé sei facilita criação empresas kiik no suporta sira nia atividades negócios.

Iha tiha ona instituisoens mikro no uniaun de krédito lubuk ida, nebé fó ona servisu krédito ba populasaun barak. Governo sei kontinua tulun instituisoens hirak né, hodi habelar liu-tan sira-nia servisu no fasilita diak liu-tan populasaun hodi hetan krédito, liu-liu empresas mikro no ki'ik iha áreas rurais.

5.2.4 Política Monetária – Preparasaun Moeda

Moeda núdár instrumento finanseiru, ne'ebé assume papel importante iha desenvolvimentu Nasaun ida-nian, liu-liu iha dezempenho ba valor husi moeda ne'ebé Timor-Leste uza hasoru moedas seluk. Governo, liu-husi Ministério Finanças, sei servisu hamutuk ho Banco Central Timor-Leste (BCTL), atu halo estudo no análise kle'an kona-ba vantajens no desvantajeens husi utilizazaun moeda Dólar ou uza moeda rasik. Rezultadu husi estudo ne'e maka sei determina kona-ba Timor-Leste atu kontinua uza moeda Dólar ou kria nia moeda rasik.

5.3 Finansas Públicas

Finansas Públicas maka fator importante ida ba prosesu desenvolvimento iha Timor-Leste. Nune'e, sei kontinua hadi'a no hametin jestaun finansas públicas ne'ebé iha transparênsia, responsabilidade, efisiênsia, efikásia no sustentabilidade núdár programa prinsipal ida, nebé Governo sei implementa durante ninia mandato.

Atu promove jestaun finansas públicas sai diak liu-tan, sei halo liu-husi “Reforma ba Gestão Finanças Públicas”, hodi hametin jestaun no habelar implementasaun Parcerias Publico-Privadas, no hasai política ida ke diak no jestaun diak ba dívidas públicas (empréstimos), mantein jestaun di'ak no prudente ba Fundo Mina-rai, no halo jestaun di'ak ba fundos públicos, inclui ba Fundo Seguransa Sosial.

5.3.1 Reforma Jestaun Finansas Públicas

Reforma Fiskal, nebé hahú implementa iha mandato VI Governo, sei troka ho “ Reforma Fiskal no Jestaun Finansas Publikas”. Mudansa ida ne'e sei introduz, tamba Governo comprometido atu halo reforma nebé kompreensiva, iha área Finansas Públicas nian, hodi aumenta reseitas ba Estado, no hametin transparênsia no efisiênsia iha política fiskal no jestaun finanseira.

Reforma jestaun finansas publikas sei hala'o liu-husi halo diversifikasaun finanseira, iha área reseitas no despesas, hodi hadi'a aprovizionamentu, no hametin descentralizasaun finanseira no orsamentu nebé bazeia ba programa.

5.3.2 Reforma impostos no taxas

Liu-husi diversifikasaun reseitas, Governo hakarak hetan to'o 18% iha reseitas doméstikas, husi total "Produto Interno Bruto (PIB)", iha 2023 (Estabelese ona meta atu atinje to'o tinan 2020). Ida ne'e importante tebes, hodi hahu hakore-an husi dependênsia ba reseitas husi Fundo Mina-rai. Atu atinji objetivo ida ne'e, Governo sei kontinua hadi'a administrasaun, rekursus humanos, sistema no infraestruturas ba Autoridades de Imposto iha Alfândega, halo revizaun ba Lei do Imposto no introduz lei kona-ba "Imposto de Valor Acrescentado (IVA).

Iha parte seluk, Governo hakarak aumenta mak reseitas, liu-husi efisiênsia no efikásia boot liu iha kobra fiska, maibe mantein karga fiska ida neutra no kompetitiva iha rejiaun, liuhosi identifika no regula potênsias nebe iha ba reseitas no hadi'a kapasidade instituisoens públikas nian, ho objetivu atu halo koleasaun reseitas, husi nível nasional to'o munisípius.

Objetivu prinsipal ida, husi diversifikasaun reseitas maka atu aumenta reseitas no facilita desenvolvimentu sosioekonómiku, investimentu no kriaun emprego. Nuné, programa ida ne'e sai nudar parte integrante husi programa Governo-nian atu desenvolve no diversifika ekonomia.

Asegura instalasaun órgauns sira, servisu no pessoal Autoridade Tributária no Autoridade Aduaneira, liuhosi Komisaun Instaladora ida-idak.

5.3.3 Efisiênsia no Efikásia iha Despeza Publika

Iha asuntu ida ne'e, Governo sei assegura katak despesas públicas tenki halo ho forma efetiva, efikaz, transparente atu bele hatan. Nune'e, sei kontinua hametin descentralizasaun financeira ba instituisoens públicas no ba Autoridades regionais no munisipais, hodi reforsa kapasidade iha instituisoens públicas, hanesan: Agência Desenvolvimento Nacional (ADN), Sekretariadu Grandes Projetos no Komisaun Nacional Aproveitamento (CNA), hodi prepara, prosesa no halo supervizionamentu ho rigor ba projetos, atualiza no aplika sistema informátiko-financeiru no ho transparênsia ba entidades públicas hotuhotu, inklui RAEOA no ZEESM, halo interligasaun (*interface*) sistema informátiku ho sistema informátiku financeiru, nebe instituisoens relevantes, iha

setor públiku, utiliza daudaun, nune'e mós, atualiza no hadi'a Lei Orçamento no Gestão Financeira no Lei Aprovizionamento, hodi gradualmente transforma sistema kontabilidade Estado nian, husi **"cash basis system"** ba **"accrual basis system"** no kontinua implementa política "orsamento tenki bazeia ba programa".

Sei implementa mós rejime profissionais iha jestaun finansas públicas, atu hametin rekursos humanos iha área finansas, hodi assegura katak rekursus finanseirus públicos hetan jestaun nebé rigoroza duni, hodi bele finansia prosesu konstrusaun Estado no Nasaun.

5.3.4 Orsamentu Bazeia ba Programa

Despesas publikas sei hetan impacto boot, tamba orsamento Estado maka sei finansia atividades nebé estabelese ona. Nune'e, política kona-ba "orsamento tenki bazeia ba programa" sei kontinua implementa iha instituisoens públicas hotu-hotu, husi nasional to'o munisípius.

Nune'e, Governu sei implementa kompromisu ida ne'e, nudar komponente ida husi Reforma Gestão Finanças Públicas, tamba Governo hakarak kria sistema interligasaun entre orsamento no planeamentu, ne'ebé sei define objetivos nebé klarus, alvos no impactos husi servisu públiku ba populusaun, iha tempo badak, médio no naruk.

5.3.5 Aprovizionamento no Transparênsia iha Finansas Públicas

Componente importante ida husi Reforma Gestão Finanças Públicas maka prosesu aprovizionamento públikuo. Sei kontinua hadi'a kapacidade instituisoens públicas nian no halo revizaun ba Lei Aprovizionamento, núdar kompromisu ida nebé sei implementa iha mandato ida ne'e.

Sei revê no atualiza Lei no regras aprovizionamento nian, hodi assegura katak prosesu aprovizionamentu públiku. iha nível nasional, rejional no munisipal, sei hala'o ho efikásia, transparênsia no la-iha diskriminasaun, atu fasilita dezvoltimentu setor privadu nian, liu-liu setor privado lokal. Presiza duni halo revizoens hirak ne'e, atu bela halo ajustamentu fazeadu ba leis no regras aprovizionamento ho prosesu dezvoltimentu ne'ebé iha.

Governo mos iha compromisso boot atu kontinua promove transparênsia no responsabilizasaun ba finansas públikas, liu-husi asoens tuir mai:

- kontinua dezenvolve Gestão Finanças Públicas electrónica no promove transparênsia liu-husi Portal Transparênsia Orçamento nian, Portal Aprovisionamento Electróniku, Portal Transparênsia ba Ajuda externa no Portal ba Resultados Governu nian;
- Halo coordenação ho entidades relevantes atu hala’o auditoria regular ba despesas públicas;
- Kontinua hametin kooperação ho Tribunal de Contas, hodi promove transparênsia no responsabilizasaun;
- Hakbiit órgãos inspesaun nian, hanesan Gabinete Inspector Geral do Estado, atu aumenta no hadi’a inspesoens no auditorias ba entidades públicas, ho responsabilidade no independensia.

5.3.6 Empréstimos

Governo sei kontinua halo gestão diak ba osan ne’ebé simu ona nudar emprestimo no ba osan ne’ebé sei tama, liu-husi emprestimo, iha futuro oin mai. Osan nebé atu empresta husi instituisoens financeiras ka husi merkadu financeiru, sei utiliza deit atu finansia investmentus iha setores produtivos, no sei la boot liu kapasidade Governu-nian atu selu iha futuro.

Nune’e, Governu sei kontinua ho política empréstimo hodi hetan osan barato (funan empréstimo nian tenki minus husi 3%) atu finansia projetos infraestruturas, nebé sei fó retornus ekonómiku, financeiru no sosial boot, hodi estimula desenvolvimento no facilita prosesu diversifikasaun ekonomia. Sei fó atensaun boot ba hadi’a kapasidade iha instituisoens públicas relevantes, hodi supervizona no assegura qualidade ba investimento.

5.3.7 Parcerias Público-Privadas (PPP)

Modalidade PPP sei kontinua hala’o, iha prosesu diversifikasaun despesas atu finansia investmentus importantes. Governo sei identifika projetos husi setores nebé iha potênsia boot atu hamosu efeitos multiplicadores barak, no sei negocia ho investidores sira atu estabelese parcerias nebé lori investimento.

Iha ne'e, sei kontinua hadi'a liu-tan leis no regras, no mós kapasidades husi Unidade PPP, iha Ministério Finanças, hodi halo jestaun nebé diak ba investimento porto Tibar, ne'ebé hetan finansiamentu ho modalidade PPP. Nune'e mos, sei aumenta kbiit Unidade PPP nian, atu iha kapasidade hobebe identifika projetos estratéjkus, halo negosiasaun ho setor privado no jere portfólio PPP ho rigor.

5.3.8 Participasaun Setor Públiku iha Investimento Privado (Equity Participation)

Tamba Timor-Leste sei konsidera hanesan Nasaun ida ho risku boot ba investimento privado no ba diversifikasaun financeira (reseitas no despesas), atu atrai investimento no kria emprego, Governo sei promove programa "*equity participation*" ka partisipasaun iha "ações" ba iha investmentus husi setor privado. Timor-Leste iha Fundo Mina-rai ne'ebé investe daudauk iha merkado financeiro internacional, ho retorno médio anual 3%, nune'e, Governo hola "ações" setor privado nian, kuandu investimento ne'e mai iha Timor-Leste no investmentu fó retornu financeiro no ekonómiku ne'ebé boot.

Atu viabiliza compromisso ida nee, Governo sei hametin kapasidade empresas estatais nebé iha no orienta sira atu haknaar-án ho diak hodi fo resultados financeiros no ekonómikus ba Estado, promove estabelesimento no atividades empresas estatais ba setores produtivos, estabelece "Timor-Leste Investimento Corporation (TLIC)" no kapitaliza companhias estatais hanesan Timor-GAP, bazeia ba sira-nia plano negósus.

Governo hakarak implementa mekanismu ba diversifikasaun financeira, liu-husi "*Equity Participation*", tamba sei estimula investimento husi setor privado, promove dezentvolvimentu infraestruturas, kontribui ba diversifikasaun ekonomia, ba kria saun emprego no hatama reseitas ba Estado.

5.3.9 Timor-Leste Investment Corporation (TLIC)

Governo sei estabelese TLIC, hodi hala'o knaar nudar companhia estatal ba investimento. TLIC sei hetan kapitalizasaun husi Governo, atu halo investimento komersial ne'ebé sei hamosu retornu

financeiro boot, no mos halo investimento ba projetos sira nebé iha efeitos multiplikativos barak ba desenvolvimento socioekonómiku. Sei fó prioridade, uluk liu, ba investimento iha rai-laran.

Nudar kompanhia estatal ba investimento, TLIC mos bele halo kapitalizasaun ba kompanhias estatais seluk, nudar parte ida husi ninia atividades komersiais. Em princípio, desizaun ba investimento nebé TLIC halo, tenki bazeia ba prinsípius no objetivus komersiais.

5.3.10 Jestaun ba Fundo Mina-rai

Governo sei kontinua servisu hamutuk ho Parlamento Nacional no Banco Central Timor-Leste (BCTL), hodi mantein jestaun di'ak ba Fundo Mina-rai, nebé sai nudar úniku rekursu financeiru ba Timor-Leste. Kompromisu ida ne'e sei reflete husi polítika Governo nian atu mantein governasaun di'ak ho transparênsia, sustentabilidade no investimento prudente ba Fundo Mina-rai.

Sei hametin sistema “*check and balance*”, atu assegura katak utilizaun osan, husi Fundo Mina-rai ba nesesidades Estado-nian, tenki liu-husi autorizasaun husi Parlamento Nacional. Iha parte seluk, Fundo Mina-rai sei kontinua investe ho rigor no prudensia, iha merkado financeiro (títulos no ações) tuir lei haruka, hodi fó retorno ne'ebé boot. Nune'e, sei hametin sustentabilidade ba Fundo, liu-husi orsamentasaun no despesas públikas ne'ebé rasonais, efikazes no efisientes, no halo jestaun di'ak ba “*cash flow*” Tesouru nian.

5.3.11 Jestaun Fundo Seguransa Sosial no Fundo ba Veteranos

Governo hakarak kria bazes nebé di'ak ba protesaun sosial ba sidadauns tomak. Nune'e, sei hametin programa assistênsia sosial ne'ebé iha, liu-husi halo ajustamento ba nível assistênsia financeira tuir nesesidade, nebé iha hela, no halo jestaun di'ak ba Fundo Seguransa Sosial hodi assegura nia sustentabilidade.

Seguransa sosial, sai núdar kompromisu Governo-nian atu hametin desenvolvimentu inlluzivo. Nune'e, sei estabelese “Instituição da Segurança Social”, hodi jere servisu no Fundo Seguransa Sosial ho di'ak, atu iha sustentabilidade no transparênsia ba Fundo ne'e, no assegura direito nebé beneficiários sira hetan, ba tempo naruk.

Iha parte seluk, Governo mos sei halo estudus kona-ba estabeleimentu Fundo Veteranos, núdar kompromisso ida atu hadi'a diak liu-tan veteranos sira-nia moris no assegura sustentabilidade iha assistênsia financeira ba veteranos sira, iha tempo naruk. Estabelesimento Fundo Veteranos ne'e sei sujeito ba rezultadu husi estudos ne'ebé halo.

5.3.12 Jestaun ba Património Estado

Processo konstrusaun Estado, nebé kontinua la'o ba oin ho diak, resulta ona ba aumento iha património Estado nian, iha bens móveis no imóveis iha nível nasional, regional no munisipal. Nune'e, Governo ida ne'e hakarak halo jestaun di'ak liu-tan ba património Estado hirak né.

Atu halo jestaun ida di'ak ba património Estado, política Governo nian maka atu harii instituisaun ida dedicada deit ba koordenaun ho instituisoens públicas relevantes, hodi halo jestaun ba património, iha móveis no imóveis tomak. Jestauno ba património Estado inklui estabelese sentral ida ba baze de dados kona-ba património Estado tomak, hodi define regularmente valores no depresiasaun ba património ne'e, no halo jestaun di'ak ba utilizaun ka ba aluga patrimónios sira né.

6. Boa Governasaun no Kombate ba Korupsaun

Boa governasaun ho setor públiku profissional, competente no efisiente, maka bele hatúr kondisoens nebé bázikas ba prestasaun servisus públicos nian no ba implementasaun política hotu-hotu no asoens nebé hakerek ona iha Planu Estratéjiku Dezenvolvimentu no mós ba implementasaun Programa Governu-nian.

Atu aumenta konfiansa ba governasaun, tenki nesesariamente hasa'e dezempenhu iha setor públiku, liuliu tamba dezempenhu ne'e maka sai prinsipal motor ba kresimentu ekonómiku nasional, husi ninia inísiu kedas.

Hala'o auditorias no harí mekanizmus nebé efikazes atu garante transparênsia iha instituisoens públicas no ba responsabilizasaun nebé la ka'et ho nia asoens, mak sai hanesan garantia boot ida ba boa governasaun. Boa governasaun mós, iha nia papel rasik, sei kontribui hodi prevene korrupsaun iha níveis hotu-hotu iha sociedade laran.

Governu sei promove, hanesan temi ona, prinsípius transparênsia nian, responsabilizasaun, integridade no lideransa, liu-hosi mekanizmus ba jestaun de riskus, responsabilidade nebé bazeia ba rezultadus, no mós ba sistemas reklamasaun nian no, liuliu, ba uzu nebé adekuaadu (ka lós) ba fundus públicos.

Governu, atu promove boa governasaun no combate korrupsaun, sei desenvolve asoens hirak tuir mai ne'e:

- Reforsa Órgauns inspesaun nian, li-liu Gabinete Inspetor-Jeral Estadu, hodi aumenta no hadi'a inspesoens no auditorias, nebé responsáveis no independents, ba entidades públicas;
- Investe atu reforsa kapasidade Komisaun Anti-Korrupsaun, liu-liu hodi promove iniciativas kona-ba prevensaun ba korrupsaun, inklui kampanhas edukasaun sívika nian;
- Investe atu reforsa kapasidade hosi Komisaun Funsan Públika no kontinua promove kultura ba jestaun kona-ba dezempenhu no ba rekrutamentu no mós ba progresaun kareira, ho baze iha méritu;
- Hametin kooperasaun ho Tribunal de Kontas, hodi hato'o informasoens hotu-hotu no kontas nebé Tribunal husu, atu garante responsabilizasaun nebé boot no transparênsia;
- Desenvolve no implementa Kódigu de Konduta ba Membrus Governu hotu (PED);
- Uza teknolojia informasaun moderna nian, iha funsaun públika, hodi apoia koezaun iha Governu no iniciativas hosi Governu Eletróniku (PED 2020);
- Haré fali Lei nebé eziste ona no aumenta lejislasaun preventiva no kombate korrupsaun nian;
- Estabelese planus espesífikus de asaun, hodi kombate korrupsaun, tuir setores no instituisoens nebé define;
- Hala'o kampanha antikorrupsaun, tantu iha nível administrasaun públika, maibé mós iha eskolas no ba públiku em jeral, hanesan forma preventiva no edukasional ba jerasoens futuras;
- Promove sistemas ba reklamasaun no ba rona populasaun, hodi promove formularius reklamasaun no implementasaun ba kestionárius ka perguntas ba públiku;
- Desenvolve baze de dados kona-ba instituisoens públicas no privadas, ne'ebé envolve ona iha korrupsaun, hodi halo monitorizasaun nebé efetiva;
- Kontinua implementa política legislativa ida, hodi hare ba qualidade lejislasaun nian, nia simplisidade no nia sistematizasaun no mós kona-ba asesu ba lejislasoens ne'e;
- Hadi'a asesu no konhesimentu kona-ba lejislasaun nasional, liu-hosi hadi'a publikasaun no liu-husi distribuisaun, nebé tenki beibeik, ba kolektâneas (ka kompilasaun) ne'ebé organizada tuir setores, hanesan mós nia disponibilizasaun bilinge (iha lian rua) no ninia divulgasaun 'online';
- Reforsa instituisoens ne'ebé responsáveis ba produsaun estatískas nacionais, hodi bele informa di'ak liu-tan kona-ba tomadas desizaun, atu desizoens sira ne'e hasai ka halo ho baze ba

informasoens nebé rigorozas, hodi permite monitoriza no avalia dezempenhu nebé real, husi setor públiku iha prestasaun servisu públikus no mós bele hetan retratu real Nasaun-nian;

- Hadi'a komunikasaun interna iha Governu, tantu entre organizmus governamentais hanesan mós iha ida-idak nian, hodi hamenus informalidade ba prosesu ne'ebé afeta ba transferénsia konhesimentus no prestasaun de kontas. Reforsa iha komunikasaun sei kontribui mós hodi hamenus duplikasaun ba atividades, funsoens no responsabilidades ba programa ida hanesan, ne'ebé eventualmente halo halakon responsabilizasaun;
- Reforsa implementasaun Roteiru ba Orsamentasaun tuir Programas ba Timor-Leste, iha nebé Planu tenke liga ho Orsamentu, iha organizmus governamentais hotu;
- Hametin kapasidades iha planeamento, monitorizasaun no avaliasaun iha organizmus governamentais hotu-hotu, inklui mós esforsu boot liu-tan iha formasaun ba rekursus humanus, atu nune'e difikuldade nebé jeral (katak hotu-hotu hetan ka iha) atu kompriende no implementa konseitus ne'ebé relasiona ho Planeamentu, Monitorizasaun no Avaliasaun, sei la prejudika qualidade iha informasaun no kona-ba implementasaun roteiro ba orsamentasaun tuir programas;
- Implementa inisiativas ne'ebé kontribui ba kultura de dezempenhu no responsabilizasaun, tuir estrutura hierárkika no atribuisaun kona-ba responsabilidades, nebé institucionalizada ona;
- Haré fali Lei Pensaun Vitalisia, atu nune'e rejime ida ne'e bele integradu iha Rejime Seguransa Sosial Kontributivu, kona-ba pensoens ba membrus foun iha Órgauns Soberania.

6.1 Administrasaun Públika

Hadia efikásia, efisiénsia no profisionalismu iha asaun Administrasaun Públika ba iha administrasaun servisu públikus ne'ebé diak liu, ne'e fator ida krusial ba iha implementasaun polítika no programa ba desenvolvimentu ne'ebé lori ba redusaun kiak no, ba progresu no moris diak populasau sira-nian.

Ho razaun ida ne'e, reforma ba administrasaun públika, hodi tama ba modernizasaun no ba iha implementasaun medidas ba boa governasaun, kontinua sai prinsipal objetivu Governu nian. Ho ida ne'e, hadia lideransa, jestaun no kapasidade dezempenhu, transparénsia no responsabilizasaun sei kontribui ba prestasaun servisu públikus ne'ebé diak, ho rezultadu ba iha moris diak no progresu populasau sira-nian, no iha aumentu de konfiansa iha instituisoens Estadu.

Governus ne'ebé kaer ukun to'o agora, aposta iha Reforma Administrasaun Públika, atu hetan setor públiku ida sustentável. Governu ida ne'e, sei kontinua dezenvolve esforsus hodi garante

kontinuidade ba reformas no programas ne'ebé la'o dau-daun, hodi asegura nafatin promosaun iha efisiénsia, efikásia, transparénsia, produtividade no igualdade de género, iha setor públiku.

Iha ámbitu ida ne'e, Governu sei:

- Estabelese Komisaun Nasional ba Reforma iha Administrasaun Públika no aprova guia de Reforma ba Administrasaun Públika tinan 2018-2023;
- Kria mekanismos de koordenasaun no kooperasaun entre Agência Nacional para a Reforma e Modernização da Administração Pública, Komisaun Funsun Públika, Institutu Nasional Administrasaun Públika no Departamentos Governamentais sira seluk, atu identifika metas ne'ebé prioritárias, lejislasaun ne'ebé nesesária no asoens nebé atu halo ba melhoria progressiva iha organizasaun no funksionamentu da Administrasaun Públika nian, para hasa'e kualifikasoens Recursos humanos iha Administrações Públicas no ba melhoria iha qualidade kona-ba prestasaun servisu públikus ba sidadauns;
- Revê no implementa Política kona-ba Fortalesimentu Institucional, inklui halo revizaun ba matriz organizasional iha instituisoens hotu nia laran;
- Hala'o revizaun ba estrutura setor públiku hodi determina karik iha benefísiu hodi estabelese instituisoens autónomas, hodi hala'o funsaun balun iha Estadu nian (PED 2020);
- Haré fali ka revê no aprova kuadru jurídiku ba Organizasaun iha Administrasaun Públika, nebé hetan harmonizasaun ho política Fortalesimentu intitucional no ho Guia Reforma no Modernizasaun iha Administrasaun Públika; Halo uniforme ba sistemas, prosesus no prosedimentus kona-ba funksionamentu Administrasaun Públika nian, liuliu kona-ba desempenhu iha servisu bai-bain, husi Departamentus governamentais tomak;
- Kontinua hala'o diagnóstikus kona-ba forsa de trabalhu iha instuisoens públicas, hodi halo ajustamentu no hadi'a kuadru pesoal iha organizasaun ida-idak, no hodi implementa mós regras no prosedimentu ne'ebé padronizados, inklui mós kontratus de trabalhu;
- Reforsa mekanismu ne'ebé permite rekrutamentu ho baze iha méritu, progresun iha carreira, liuhosi rezultadus kona-ba desempenhu no méritu, insentivus ba produtividade no oportunidades iha formasaun no desenvolvimentu institucional ba rekursus humanus hotu iha setor públiku;
- Aprova programa nasional ida ba formasaun rekursus humanus iha Administrasaun Lokal Estadu nian hodi hadia prestasaun bens e servisu públiku iha lokal;
- Finaliza, aprova no implementa Planu Estratéjiku ba Komisaun da Funsun Públika, hodi garante armonizasaun husi Planu ne'e ho Guia da Reforma no Modernizasaun iha Administrasaun Públika ho Política Nasional de Fortalesimento Institucional;
- Tau iha Institutu Nasional de Administrasaun Públika kondisoens ne'ebé nesesárias ba desempenhu iha sira-nia funsaun, liu-liu iha ambiente organizasional, lojística no finanseiru,

inklui mós nia formalizasaun, hodi asegura nia afirmasaun núdar Centru formasaun profesional ba Administrasaun Públika;

- Reforsa kontrolu no jestaun administrative, finanseira no patrimonial Estadu nian, liuhosi Inspesaun Jeral do Estadu, ho revizaun ba estatutu juridiku IGE nian no aprovasaun ho implementasaun lei de sistema ba kontrolu internu iha Administrasaun públika.

6.2 Desentralizasaun

Modernizasaun iha Administrasaun Públika no hasa'e nia efikásia no efisiénsia, inklui, núdar nesesidade ida, desentralizasaun no deskonsentrasaun. Transferénsia iha atribuisaun, kompeténsia no responsabilidade ba iha órgauns lokais no munisipais, hodi hakbiit sira no hodi kria kondisoens ne'ebé bele fó servisu ho qualidade, ne'e sai núdar aspetu fundamental iha prosesu desentralizasaun.

Ida ne'e, aleinde hasa'e partisipasaun demokrátika, sei kontribui mós ba dezvoltamentu iha setor privadu iha nível munisipal no rural, atu ema hotu participa ba nia dezvoltamentu rasik no, ikus liu, ba iha dezvoltamentu ne'ebé integradu no sustentável Nasaun nian.

Temas hanesan Ordenamentu do Territóriu no Kuadru Nasional de Planeamentu sei hetan abordajen husi perspetiva ida komplementar no integrada, hodi tau em konta Política Desentralizasaun Administrativa no Autonomia Lokal, atu garante, ba Nasaun tomak, dezvoltamentu sustentável, equilibradu no ekuitativu ka hanesan.

Iha ámbitu ida ne'e, Governu sei:

- Promove aprovasaun, husi Parlamentu Nasional, ba Lei do Poder Lokal no Desentralizasaun Administrativa, ba Lei Eleitoral Municipal, ba Lei Finansas, Patrimóniu no Aprovisionamento Munisipais no ba Leis atu estabelese Munisipios;
- Revê kuadru juridiku kona-ba organizasaun no funsionamentu Autoridades Munisipais no Administrasoens Munisipais, hodi fó continuidade ba estratéjia desentralizasaun administrativa nebé prevê ho aprovasaun Dec-Lei n.º 3/2016, 16 de Marsu;
- Sei kontinua ezejuta estratéjia desentralizasaun administrativa, hodi Administrasoens Munisipais iha Aileu, Ermera ho Likisá, sai ona nudar Autoridades Munisipais, ho personalidade jurídica no autonomia finanseira, hahú iha tinan 2019;
- Revê no aprova Planos de Desenvolvimento Munisipal, Munisipius 12 nian, hodi armoniza ho PED 2011-2030 no ho Programa Governu nian, tamba ne'e mak sei sai referénsia ka mata-dalan atu elabora Planus Asaun Anual, Planus Investimentu Munisipal no Orsamentus Munisipais;

- prova no implementa Diplomas ministeriais conjuntos, hodi loke dalan ba ezekusaun local ba programas husi governu nebé delega ba órgauns Administrasaun Lokal;
- Aprova no implementa Despachos ministeriais conjuntos, kona-ba programas formasaun ba funsionarius Administrasaun Lokal nian, hodi bele implementa programas husi governu nebé Autoridades no Administrasoens Munisipais maka sei ezekuta;
- Reforsa alokasaun fundus ba orsamentos munisipais, nune'e bele ajuda servisu Administrasaun local nian hodi presta servisu barak liu no ho qualidade;
- Halo levantamentou ba nesesidades Administrasaun Lokal nian, kona-ba rekursus humanus no halo planu atu implementa programas hodi kapasita servidores públikus lokais;
- Aprova no implementa programa ida oin-sá bele rekoloka rekursus humanus husi Administrasaun Públika, hodi assegura distrinuisaun rekursus humanus nebé ekuitativa, tuir nesesidades orgaun ka departamento ida-idak;
- Organiza fazeadamente eleisoens ba Órgauns representativus Poder Lokal nian, iha tinan 2021, 2022 no 2023, tuir kondisoens nebé munisipiu ida-idak apresenta;
- Aprova no implementa Politika Nasional Dezenvolvimento Lokal, nebé haktuir duni PED 2011-2030;
- Revê enkuadramentu juridiku Planeamentu ba Dezenvolvimento Integrado Munisipal, hodi simplifika prosedimentos iha programasaun no ezekusaun investmentus públikus, nebé hetan finansiamentu husi programa ne'e, no atu reforsa kompetensias ba órgauns Administrasaun Lokal nian, iha implementasaun programas hirak né;
- Revê enkuadramentu juridiku Programa Nasional Dezenvolvimentu Sukus, atu reforsa partisipasaun husi órgauns Sukus nian, iha prosedimentus programasaun, ezekusaun, supervizaun no avaliasaun ba qualidade projetus, nebé hetan finansiamentu, liu husi PNDS;
- Aprova no implementa kadru juridiku ba Planeamentu Dezenvolvimentu Komunitáriu, hodi assegura finansiamentu ba ezekusaun Planus Dezenvolvimentu Komunitáriu, liu husi PNDS;
- Revê rejime juridiku kona-ba insentivus materiais no finanseirus ba organizasoens komunitárias, hodi aumenta kbit material no finanseiru ba Sukus, nune'e bele fó prestasaun bens no servisu ba membrus comunidades lokais nian;
- Aprova diploma legal ida atu regulamenta Lei dos Sukus, nune'e bele operacionaliza ezersisiu kompetensias, nebé temi ona iha Lei ne'e, hodi fasilita koordinasaun entre Sukus no Administrasaun Estadu nian no autarkias munisipais;
- Aprova diploma legal ida kona-ba halo kontratus interadministrativus entre Administrasaun Estadu no autarkies munisipais no sukus, hodi ajuda diak liu tan prestasaun bens no servisu, liu husi Sukus, tuir kbit ka kapasidade konkreta ka real iha organizasaun komunitaria ida-idak;
- Revê no ezekuta Programa Nasional ba Kapasitasaun Lideransas Komunitarias.

6.3 Administrasaun Eleitoral

Prosesu rekonsiliaun nasional no konstrusaun ita-nia Estadu de Direitu Demokrátiku bele la'o ho di'ak, tamba kapasidade ita-nia Rain atu organiza no realiza duni eleisoens livres no demokrátikas. Iha tinan hirak né, observadores nacionais no internacionais rekonhese duni Profisionalismu no izensaun husi Órgauns Administrasaun Eleitoral nian. Ita-nia Povo iha mós konfiansa tomak katak rezultadus nebé hetan apuramentu, iha prosesus eleiorais, mak sai duni nudar expresaun lolós ba vontade popular.

Nune'e mós, iha nível internacional, iha duni konfiansa ba ita-nia Sistema eleitoral, hodi Komunidade Internacional rekonhese ita-nia Estado nudar demokrasia nebé lós duni ka verdadeira. Tamba faktu ida ne'e, maka iha pedidus ba ita-nia Estadu, durante tinan hirak né, atu bá fó apoiu tékniku iha organizasaun no realizasaun eleisoens iha Estados seluk, hanesan Guiné-Bisau, S. Tomé e Príncipe no Repúblika Centro-Afrika.

Maibé ita tenki assegura nafatin no fortalese liu tan kualidade no kapasidade ba ita-nia Administrasaun Eleitoral, la ós deit husi apoiu ba atividades formasaun no kualifikasaun ita-nia téknikus eleitorais sira-nian, nune'e mós liu-husi revizaun ba ita-nia lejislasaun eleitoral, atu bele klarifika tiha aspetus nebé bele sai kontroversus ka difísil atu aplika, no liu-husi atualizasaun nebé bele fó kbit atu responde ba dezafius, que bele mosu, iha ita-nia Sistema eleitoral.

Nune'e, maka Governu sei:

- Promove organizasaun no realizasaun Curso ida ba Jestaun no Administrasaun Eleitoral, atu nune'e reforsa kapasidades téknikas ba profissionais sira iha órgauns Administrasaun Eleitoral;
- Halo atualizasaun jeral ba Baze de Dados do Resenseamentu Eleitoral, atu elimina ka halakon tiha situasoens nebé hamosu inskrisaun repetida ka liu dala ida ba eleitores no mós inskrisoens ba eleitores, nebé mate tiha ona;
- Promove aprovasaun, husi Parlamentu Nasional, ba Código Eleitoral ida, nebé halibur, iha diploma legal ida deit, normas jurídkas hotuhotu, nebé hare ba organizasaun no realizasaun eleisoens ba Presidente da República hanesan mós ba Deputados ba Parlamento Nasional.

6.4 Ordenamentu Teritóriu

Parte hosi estratéjia desenvolvimentu, iha kapital social, sei relasiona ho kapasidade Governu atu defini prosesu organizasaun ba espasu ne'ebé populasaun hela ba, hodi bele okupa, bele utiliza no transforma ba ambiente diak ida, tuir sira-nia potencialidade.

Ho ida ne'e, maka prioridade Governu ida ne'e nian atu implementa Lei de Bases de Ordenamentu do Territ6rio no halo esbosu ba Planu Nasional de Ordenamentu de Territ6riu no aprova ninia lejislasaun, atu bele defini, ho forma ida ekilibrada no estrat6jika, utilizaun ba espasu iha desenvolvimentu atividades umanas (ka emar-nian), ho forma sustent6vel, hodi konsidera aspetus ekon6mikus, sosiais, kulturalis, pol6tikus no ambientais.

Lei de Baze prev6 ezist6nsia tipu rua kona-ba instrumentus ba planeamentu territorial: husi 6mbitu nasional no 6mbitu munisipal. Ninia aprovasaun permite define, lol6s, prins6pius orientadoes no obejtivus hosi Administrasaun, identifika intereses p6blikus oi-oin ho dimensaun territorial, utiliza instrumentus kona-ba planeamentu territorial, n6dar meu ba Administrasaun P6blika, nune'e m6s defini tipulojia no objetivus nebe tenke la'o tuir, iha tempu m6diu no naruk.

Iha 6mbitu setor ekon6miku, na ba nia susesu no kresimentu sustent6vel, Governu sei desenvolve Kuadru Nasional de Planeamentu, atu implementa P6lus Desenvolvimentu no Zonas Especiais Economia Sosial ba Merkadu, iha Timor-Leste, iha fatin sira nebe bele potensial, tuir rekursus lokais nebe karik iha, hodi implementa asoens konkretas tuir estrat6jias ba kresimentu sustent6vel.

Kuadru Nasional ba Planamentu ida ne'e sei kesi no desenvolve tuir Pol6tika Nasional Ordenamentu Territ6riu.

Governu sei:

- Elabora kuadru institucional no Leis ne'eb6 presiza, ba iha ordenamentu territ6riu nasional, nebe tenki inklui planu nasional ordenamentu territ6riu, planu sektorial ba ordenamentu territ6riu, planu diretor ba sidades bot, planu diretor ba munis6pius no planu urban6stiku ho nia divizaun;
- Elabora planu urbanizasaun rural, hodi f6 ba populaun asesu rodovi6rio, B6 no sanementu, eskolas, kl6nikas sa6de nian, asesu ba merkadu no eletrisidade (PED 2022);
- Promove elaborasaun no implementasaun ba planus ezelesaun urban6stika, ho objetivu revitaliza sistem6tika iha sidades urbanas, tuir faze no integradu ho koordenaun entre setor sira ne'eb6 iha impaktu ho utilizaun rai;
- Implementa Pol6tika Nasional ba Mobilidade Urbana, hodi desenvolve transportes terrestres no hodi garante desenvolvimentu nebe sustent6vel no iha protesun nebe adekuada ba meu-ambiente. Pol6tika ida ne'e iha objetivu atu munis6pius elabora no apresenta ida-idak nia planu mobilidade urbana rasik, ba planeamentu no kresimentu sidade ho forma ordenada, hodi f6 prioridade ba meus transporte la motorizadus no ba servisus transporte p6bliku koletivu;

- Implementa Planu Ordenamentu do Territóriu iha Ilha Ataúro, ba desenvolvimentu ekonómiku no sosiál iha nebé, hodi konkretiza objetivus hirak nebé lori ba kriaun Zona Especial Economia Sosial de Merkadu;
- Kontinua implementa diplomas kona-ba toponímia ba sidade Dili, rejime jurídiku ba toponímia no halo numerasaun polísia nian, iha munisípius.

6.5 Desenvolvimentu Rural

Transformasaun sosial no ekonómika iha zona rural sira, hodi promove qualidade moris ba timor-oan hotu, to'o sira ne'ebé hela área remota no asesu difísil, karik ba sira ne'ebé presiza tebes, núdar prinsipal objetivu Governu ida ne'e nian.

Atu kumpre ba objetivus hirak ne'e, Governu sei halo ho forma ne'ebé koordinada no iha nível intersektorial, ne'ebé implika ba polítikas hotu no investimentu sektorial sira, ne'ebé sei koalia kona-ba desenvolvimentu rural ho forma transversal. Iha N asaun ki'ik hanesan Timor-Leste, ezisténsia hosi asimetria regional no desigualdade sosial no ekonómika ne'e inkoerénsia ida ne'ebé representa lakon bot iha oportunidade.

Iha ámbitu ida ne'e, maka hatúr prinsipal aksaun ba desenvolvimentu rural hanesan tuir mai:

- Konstrói, reabilita no desenvolve infraestrutura bázika, ekonómika no sosial, iha konsulta ho planeamentu no envolvimentu diretu hosi comunidade sira;
- Hadia kuadru legal no regulador ne'ebé permite desenvolvimentu ba iniciativa no projetu to'o nível comunidade rural sira;
- Desenvolve estudu kona-ba kriaun ambiente ida apropriadu ba investimentu iha área rural, liu-liu implementasaun ba sistema mirkokréditu no forma empréstimu sira seluk, promosaun kooperativa ka negósiu familiar, ho prioridade ba produsaun agríkula no ba kriaun merkadu, nomós ba produktu prosesadu sira;
- Promove kapasitasaun institucional no formasaun profisional ba negósiu familiar, kooperativa no empreza ki'ik no média iha zona rural sira;
- Hadia planeamentu ba aktividade agríkola no ba jestaun Rai no ba rekursu natural, inklui hala'o estudu kona-ba vantajen komparativa iha kada rejiaun no asesu ba infraestrutura no ba merkadu;
- Kontinua promove desenvolvimentu sektor privadu ha área rural sira, inklui liuhosi eskema insentivu sira no hosi benefísiu fiskais ba iha áreas agríkolos, plantasaun Bambú/florestal sira, avíarius no hakiak karau nomós teknolojia tradisional sira, hanesan fabriku hena;
- Kontinua promove prosesu descentralizasaun no governu lokal ba iha emansipasaun política, sosial no ekonómika iha lokalidade rural sira;

- Dezenvolve parseria no kooperasaun internasional entre empresa agríkola hodi hadia áreas hirak tuir mai ne'e: estudu ba Merkadu, estratéjia komersializasaun, avaliasaun no planeamentu ba empresa sira, formasaun no assisténsia téknika, teknolojia no dezvoltimentu produtu no mekanizmu finansiamentu;
- Kontinua apoiu ba empresa agríkola rural sira ho matéria-prima (semente, fertilizasaun, nsst) no ekipamentu, nune'e mós ba indústria nsst.

6.6 Rejiaun Administrativa Especial Oe-Cusse Ambeno no Zona Especial ba Ekonomia Sosial Merkadu

Rejiaun Administrativa Especial de Oecusse-Ambeno (RAEOA), estabelece duni atu facilita sinerjia nebé diak-liu entre instituisoens Estado nian iha Rejian ida nebá, ho hanoin katak sei permite governasaun ida efikaz liu, ajuda hamenus kiak no dudu bem-estar ekonómiku ba populasaun tomak.

Zonas Especiais ba Ekonomia Sosial de Merkadu Timor-Leste (ZEESM TL) sai núdar programa ida ba dezvoltimentu nasional, ho objetivu atu estabelese zonas especiais ba komérsiu ho ninia karáker social, ne'ebé sei permite kresimentu ekonomia sosial ba merkadu, katak ema ho populasaun husi rejiaun né maka sei simu benefísius, diretus no indiretus.

Haré ba politika tós, nebé hala'o iha Oe-Kusi, no ba tempu naruk demais ona iha nebé la kumpri tuir prosedimentus nebé orienta Estado tomak, iha kontekstu Administrasaun Públika no boa-governasaun, prosedimentus nebé instituisoens governamentais hotu-hotu halo tuir no kumpre, maka Governu ida ne'e hare katak iha urjênsia atu altera kadru jurídku atual nebé prevalese iha Rejiaun ida nebá.

Importante tebes iha separasaun poderes entre RAEOA no ZEESM, hodi kapasita sosiedade no populasaun lokal sira atu intervein, espresa sira nia hakarak no sira nia espetativa, hodi asegura espíritu no objetivu ikus ba kriaun Zonas Especiais ba Ekonomia Sosial Merkadu.

Partisipasaun efetiva husi sosiedade no husi comunidades sira iha prosesu dezvoltimentu, nebé hala'o iha ninia rejiaun laran, mak sai núdar fator determinante hodi haree, sukat no tetu kona-ba benefísius nebé sei mosu ba sira-nia vida, ba kresimentu sosio-ekonomiku no kultural, responsável, transparente no sustentável.

Nune'e, Governu sei kontinua investe iha estrutura regional governasaun ne'e, liu-husi politikas inovadoras no aposta ba paradigma foun ida ne'e, ba dezvoltimentu nebé nia baze iha ekonomia sosial de merkadu, maibé sei hala'o medidas tuir mai ne'e:

- Separa servísius nebé pertense ba ZEESM husi funsoens Autoridade Administrativa Regional nian;

- Integra servisu finansas iha Rejiaun ne'e ba Sistema nasional FreeBalance;
- Hadi'a sistemas kontrolo no fiskalizaun, liuliu kona-ba grandes projetus, nebe tenki sujeitus ba fiskalizaun prévia husi Tribunal Kontas;
- Hadi'a sistemas aprovizionamentu, hodi garante kumprimentu ba rejime sentral aprovizionamentu nian;
- Halo auditoria ba RAEOA no ZEESM.

6.7 Governu Eletróniku

Governu Eletróniku ka Administrasaun Públika Eletrónika, permite informa no divulga servisu, nebe presta tiha ona, no haklekan, ba populasan em jeral, informasoens nebe Governu hasai, hodi uza teknolojia Informasaun no Komunikasaun, hodi asegura boa governasaun, transparénsia nebe bot-liu iha prosesu no polítika públicas, no, au mesmu tempu, bele hakbesik ema ba órgauns governamentais, nune'e, bele iha sira-nia partisipasaun bot-liu iha desizoens ne'ebé governantes sira foti ka hasai.

Governu sei aposta iha desenvolvimentu iha Teknolojia de Informasaun no Komunikasaun, hodi implementa Política Nacional kona-ba Teknolojia Informasaun no Komunikasaun, nune'e bele kria dau-daun kondisoens nebe presiza atu Instituto de Teknolojias de Informasaun no Komunikasaun, nebe foin estabelese, bele konkretiza nia misaun atu jere rede informática Governu-nian no mós entidades públicas seluk nian, hodi hala'o modernizasaun ba Estado no hadi'a funsionamentu no prestasaun servisu iha instituisoens públicas.

Parte fundamental hosi estratéjia ne'e, maka modernizasaun administrativa, hodi desenvolve mais-valia husi Governu Eletróniku, inklui estabeleimentu plataforma ba konektividade no asesu ba internet, iha instuisaoens Estado no Governu.

Nune'e, Governu sei nafatin desenvolve esforsu atu aprosima sidadauns sira ba iha administrasaun pública, liu-hosi desenvolve setor informática no teknolójiku ne'ebé permite, iha futuru, sistema moderno no efikaz iha governasaun eletrónika.

Ba ida ne'e, Governu sei:

- Hala'o estudu atu estabelese jestaun rede informática governu nian no entidades públicas sira seluk;
- Implementa Política Nacional ba Teknolojias de Informasaun no Komunikasaun;
- Adota teknolojia de informasaun nebe moderna, iha funsaun pública, atu apoia koezaun iha Governu no apoia iniciativas ba Governu Eletróniku (PED 2020);

- Hadi'a no atualiza, ho forma kontinuada, Portal Eletróniku Governu nian, liu-liu informasaun kona-ba Rai laran no atividade governu nian, inklui ligasaun ho entidade governamental no públika sira seluk;
- Fomenta ezisténsia portais eletrónikus, ho qualidade, ba entidades governamentais hotu;
- Promove plataforma interativa ida ho entidades governamentais, nebé hetan sentralizasaun uluk iha Portal Governu, husi ne'ebé Governu loke espasu ida atu rona, halo debate no organiza informasoens nebé relevantes ba opiniaun públika;
- Hahú konversasoens preliminares ho órgauns soberania sira seluk, atu kria espasu ida ba diálogu entre órgeuns sira né, liu-hosi plataforma tenolójika nian;
- Halo levantamento no promove koordenasaun interministerial kona-ba componentes Governu eletróniku ho servisu no formuláriu, ne'ebé tenke disponíveis 'online' iha futuru;
- Kontinua desenvolve Jestaun Finansas Públikas eletrónika no Modelo Transparénsia iha Timor-Leste, liu-hosi portais eletrónikus, ne'ebé permite iha konsulta kona-ba operasoens Estadu-nian, inklui mós Portal Transparénsia kona-ba Orsamentu, Portal Aproximamentu Eletróniku, Portal Transparénsia de Ajudas no Portal kona-ba Rezultadus Governu-nian;
- Implementa gradualmente servisu pagamentu 'online' ba Estadu;
- Kontinua investe iha kriaun de baze-de-dadus eletrónikus (para além de baze de dadus Funsun Públika nian).

6.8 Justisa

Promove Estadu de Direitu no garante iguallade iha asesu justisa ba ema hotu, sai nafatin dezafiu boot ba Timor-Leste, nebé lori aspetus kompleksus tebes. Mas, konsolidasaun iha setor justisa sai hanesan baze importante no fundamental ba konstrusaun paz no konstrusaun Estadu. Nomós, fator krusial ida atu transmiti konfiansa no atrai investimentu, ba desenvolvimentu ekonomia nian. Ita enfrenta dezafius barak ne'ebé, atu koalia badak deit, mosu husi kuadru kona-ba legislasoens (ka leis) nebé defisientes no la adekuadas ba ita nia realidade, kona-ba infraestruturas ne'ebé la suficiente no kona-ba difikuldade iha kapasitasaun no kualifikasaun ita-nia rekursus humanus, ne'e hotu hanesan kondisoens fundamentais atu permite ema hotu hetan asesu ba justisa.

Ita iha kontestu históriku ida, nebé esplika didiak dezafius balun iha setor ida ne'e, hodi destaka katak parte balun hosi profesionais iha setor justisa la iha domíniu iha sistema legal, sistema ne'ebé inspiradu husi modelu portugués, nune'e mós, la iha domíniu plenu (ka diak) iha língua portuguesa, nudar kondisaun esensial tebes atu interpreta no aplika leis.

Frajilidade iha sistema justisa bele kria problemas boot ba prosesu 'konstrusaun Estadu' ne'e rasik no mós ba desenvolvimentu ekonómiku no sosial Nasaun nian. Sei la-ia konfiansa ba investimentu

ekonómiku, wain-hira la-ihá sistema judisial ne'ebé asegura kumprimentu ba Lei. No wain-hira la-ihá investimentu, sei la-ihá servisu no, se la-ihá servisu, sei la-ihá paz. Nune'e, maka tema ida ne'e tenke aborda, tuir duni respektu ne'ebé nesesáriu ba instituisoens no tuir respektu ba separasaun poderes, maibé mós ho urjénsia no seriedade.

Ho nune'e, Governu ida ne'e iha objetivu atu hahú reforma ne'ebé klean, iha instituisaun ida ne'e, hodi hatene katak reforma ne'e sei lori tempu, tamba ninia kompleksidade. Ami fiar katak kooperasaun institucional, iha prosesu ida ne'ebé inkluzivu, no iha apropriasaun hosi sira ne'ebé iha knar atu foti desizoens nasionais, sei bele kontribui ba solusaun ba dezafiu ida ne'e, ka, ba iha konsolidasaun sistema de Justisa ida efikaz, iha ne'ebé prosesus, iha ne'ebé justisa sei aplika, sai prosesus nebé lalais, ekilibradus, bele fó konfiansa, independentes no justus duni.

Hanesan parte ida mós husi nia objetivus principais, maka Governu sei:

- Konsolida paz no demokrasia, hodi garante direitos, deveres, liberdades no garantias fundamentais ba sidadauns tomak;
- Introduz reforma ida nebé kle'an, iha setor justisa;
- Hadi'a efisiénsia, efikásia no servisu lalais, iha ezersísio no iha administrasaun justisa nian;
- Promove setor judisiáriu ida nebé profisional, competente, independente no transparente;
- Harí kuadru ida ba rekursus humanus, iha setor justisa, ne'ebé competente, independente, profisional no esperiente;
- Garante independénsia husi tribunais iha nia relasaun ho órgauns soberania sira seluk;
- Promove no respeita direitos ba sidadauns hotu-hotu, inklui haluan asisténsia jurídika ba sidadauns nebé vulneráveis no desprotejidos, liu-liu kona-ba asesu no kompriensaun sistema justisa nian rasik;
- Promove konfiansa ba Sistema justisa, tantu husi povu tomak no mós husi sidadauns estranjeirus sira, nebé inklui investidores sira.

Atu realiza objetivus nebé temi iha leten, Governu sei implementa, tuir temáticas setor nian nebé oi-oin:

- a)** Iha planu desenvolvimento institucional, sei konsolida administrasaun justisa, liu-husi melhoria iha kapacidade institucional no koordenaun. Ba ida ne'e, sei:
- Revê no atualiza Planu Estratéjiku Setor Justisa nian (2011-2030), hodi hala'o reforma ida ke lalais iha setor justisa;
 - Sei haré fila fali (ka revê) linhas kordenaun no planeamentu integradu, no estabelese Komisaun Técnica atu halo revizaun ba PESJ no insentiva diálogo ho stakeholders Setor Justisa nian, kona-ba politikas no resultados husi implementasaun;

- Hala’o reforma ba Centro Formação Jurídika no Judisiária - CFJJ, núdar Sentru de excelênsia ida ba atores judisiários sira no armoniza baze legal kona-ba rekrutamentu majistradus no defensores públikus sira-nian;
- Hadi’a kordenasaun iha setor ida ne’e, hodi asegura katak ninia instituisoens sira hetan perspetiva nebé klara atu oin-sá sira interaje no komplementa malu;
- Deskonsentra servisu justisa no kria mekanismus nebé efikazes, atu fasilita asesu ba justisa husi populasau tomak.

b) Reforma ba kuadru legal, sei hala’o husi konsolidasaun no armonizasaun ba kuadros legais tomak iha Sistema Justisa no área Direitu. Nune’e, sei:

- Revê konjuntu leis estruturantes, nebé aprova no implementa ona iha setor justisa, hodi haree ba sá-ida maka sei falta no hadi’a riha regulamentasoens, bain-hira presiza;Kompleta kuadru legal iha Sistema judicial no hala’o revizaun ba leis sira nebé iha hela;
- Revê rekomendasoens husi Proposta kona-ba Política Pública no Estratégia ba Reforma Legislativa no ba Setor Justisa, nebé prepara tiha ona husi Komisaun ba Reforma Legislativa no ba Setor Justisa, atu define planu de implementasaun id aba reforma estrutural iha administrasaun justisa;
- Prepara proposta de lei ba organizaun judisiária, hodi alarga (ka haluan) mapa judicial, ho estabesimentu ba tribunais municipais foun;
- Revê Estatuto Majistradus sira-nian no mós Defensores Públikus sira-nian;
- Implementa Lei Terras e Propriedades no finaliza levantamentou kadastral no rejistu ba bens imóveis;
- Kompleta tiha pakote Lei de Terras no prepara propostas de lei ba Rejistu Predial;
- Propoin ba aprovasaun leis hirak ne’ebé hodi hadia rejime jestaun bens imóveis Estado nian no arendamentu bens imóveis Estado nian ba partikular sira;
- Reforsa Política kona-ba Lian iha Setor Justisa, liu-husi implementasaun no reforsu husi Rejime de Utilizasaun kona-ba Línguas Oficiais iha setor justisa, hodi adopta modelu bilingue (ka lian rua) iha elaborasaun atus normativus, iha prosesus judiciais no iha prosedimentus administrativus ba servisu justisa-nian;
- Introduz dekretu-lei kona-ba aplikasaun obrigatória ba lian rua (português no tetum) iha setor justisa.

c) Dezenvolvimentu Rekursus umanus nian, krusial tebes ba Setor ida, ho nia knar nebé fundamental tebes iha prosesu harí Estado no harí Nasaun. Nune’e, sei:

- Define política no planu estratéjiku ida ba formasaun iha kuadru rekursus umanus setor justisa nian, tanba ne'e krusial ba melhoria no konsolidasaun setor, ho medidas ba kurtu, médiu no longu prazu, hodi konsidera didial aspetus fundamentais nebé, to'o agora, difikulta hela área justisa;
- Asegura revizaun ba prosesus rekrutamentu, formasaun no hatama rekursus umanus iha setor justisa;
- Kontinua dezenvolve planus no hala'o formasaun rekursus umanus, hodi haree ba iha futuru, ho médiu no longu prazu, bele estabelese instituisoens hotu-hotu nebé previstas ona iha Konstituisaun no Lei;
- Insentiva formasaun ba auditores iha Kâmara de Kontas no ba juízes iha Tribunal Superior Administrativu, Fiskal no Kontas;
- Asegura formasaun nebé kontínua no formasaun komplementar ba Defensores Públikus no mós estabelese Ordem dos Advogados, nebé la haree ba organizasoens oin-oin advogadus sira-nian;
- Garante formasaun ba funsionárius públikus, ofisiais de justisa, téknikus de apoiu administrativu iha setor justisa;
- Implementa formasaun ba Notárius, Konservadores Rejistu no Notariadu;
- Apoia formasaun ba téknikus kadastrais no reforsa funsionamentu Komisaun de Terras;
- Investe iha Centro de Formasaun Jurídika no Judisiária no ba hadi'a kapasidades iha Sentru ne'e, atu bele kontinua fó kapasitasaun no formasaun ba profisionais iha setor justisa;
- Prepara kurríkulu atu hanorin no haree mós atu reforma kuadrus ba formadores ka dosentes iha CFJJ;
- Kontinua formasaun ba majistradus, defensores públikus no advogadus privadus iha CFJJ;
- Reforsa kapasidade Defensores Públikus sira-nian no kria kondisoens ba advogadus privadus, profisionais no kompetentes, hodi hadi'a assistênsia jurídika, nebé tenki efetiva no ho qualidade;
- Promove kapasitasaun Atores Judisiais timoroan sira;
- Promove no kapasita funsaun Inspetor Judisial sira;
- Reforsa kuadru juízes ho número suficiente, atu preenxe órgauns judisiárius nebé iha no hirak nebé sei estabelese, no rekruta no forma pessoal atu kaer funsoens administrasaun nian, hodi liberta juízes sira husi servisu sira né;
- Forma Ofisiais de Justisa atu bele kaer ka hala'o didiak sira-nia servisu;
- Formasaun akadémika kona-ba reintegrasaun social, ho matéria legal no treinamentu ba guardas prisionais, no mós formasaun espesializada ba guardas prisionais iha Sentru Reabilitasaun juvenil;

- Revê tiha kritérius kona-ba rekrutamentu ba juízes internacionais sira, hodi iha melhoria iha sira-nia funsaun assessorial nian, no formasaun no mentoria, atu nune'e bele iha transferênsia de konhesimentu lolós no mós atu juízes nasionais bele kompriende di'ak liu kona-ba servisu asesoria nian;
- Konseihu de Koordensasaun mak sei estabelese mekanismus ba rekrutamentu juristas internacionais, antes de sira mai servisu iha setor justisa iha ita rain.

d) Nesesidade ba infraestruturas nebé adequadas iha Setor Ida ne'e, boot tebe-tebes. Nune'e, sei:

- Investe iha kapasidade instituisoens setor justisa nian, atu bele kumpre didiak sira-nia mandate, inklui infraestruturas de apoiu, ekipamentus no informatizasaun;
- Harí edifísiu ba PCIC no ba Supremo Tribunal Justisa;
- Finaliza konstrusaun edifísiu ba delegasaun Defensoria Pública nian, iha munisípius;
- Harí residênsia ba guardas prisionais;
- Reabilita edifisius Defensoria Pública nian no edifisius Rejistu Sivil/Konservatórias no Terras e Propriedades, iha munisípius;
- Harí Centro Reabilitasaun Juvenil;
- Moderniza setor justisa, inklui infraestruturas, ekipamentus no ferramentas, no mós prosesuais;
- Instala Sistema IT ho rede nebé bele kobre munisipius hotuhotu.

e) Relasiona ho asesu ba justisa, sei fomenta aprosimasaun husi justisa ba sidadauns sira no, atu ida ne'e akontese, sei:

- Asegura kapasidade servisu prisionais sira-nian, hodi garante seguransa no melhoria iha instalasoens prisionais, kumprimentu ba normas internacionais no ba reintegrasaun prizioneirus sira-nian iha comunidades;
- Hadi'a kapasidade servisu rejistu no notariadu, hodi garante seguransa ba komérsiu jurídku no asegura katak atus ezejuta duni ho lalais no bele iha asesu ba sidadauns sira;
- Hadi'a efikásia iha jestaun ba kadastru Terras no património imobiliáriu Estado nian;
- Kontinua implementa prosesu atu haluan emisaun bilhetes de identidade ba munisípius hotu-hotu, no kontinua investe iha emisaun Pasaporte Eletróniku Timor-Leste nian;
- Expande programa Klínika de Asesu ba Justisa, hodi agranje munisipius hotu-hotu;
- Revê mapa setor justisa nian no implementa medidas atu bele garante, iha futuro, presensa judisial, ho qualidade no profesionalismu, iha munisipius hotu-hotu;

- Hala’o kampanhas boot atu divulga Sistema justisa, leis no direitos fundamentais sidadauns sira-nian, hodi kria konfiansa ba Sistema justisa no asegura kompreensaun nebé diak kona-ba ‘justisa ba ema hotu’;
- Kontinua disemina (ka halo sosialisasaun) ba leis, dekretus-leis no diplomas legais atu aumenta konhesimentu husi sidadauns sira.

f) Ikus liu, matéria ida nebé transversal ba instituisoens tomak iha Setor Justisa, maka boa governasaun, tamba só ho ida ne’e, maka bele mosu dezempenhu di’ak iha justisa, nebé sei benefisia ema hotu. Ba ida ne’e, sei presiza:

- Melhora (ka hadi’a) kapacidade Órgaus supervizaun no kontrolo iha Sistema justisa, hodi asegura ninia independensia no mós ninia efikásia no efisiênsia (Konselhus Superiores no Tribunal de Kontas);
- Reforsa Konselhu de Koordenasaun Setor de Justisa nian, hodi fortifika funsionamentu Konselhu Superior Majistradus Judisiais, Ministériu Públiku, Defensoria Públika no estabelese Konselhu Superior Tribunal de Kontas;
- Garante aperfeisoamentu ba sistemas jestaun no prosedimentus nian, iha planeamentu, orsamentasaun, jestaun finanseira, aprovizionamentu, lojístika no rekursus humanus, inklui estabelese sistemas koordinadus ba jestaun kazus prosesuais nian;
- Hadi’a koordenasaun iha setor justisa rasik no entre setor ne’e ho órgauns seluk, liuliu orgauns nebé relevantes ba hadi’a setor justisa;
- Reforsa servisu iha Konselhu de Koordenasaun Setor Justisa, hodi armoniza tiha baze legal ida no fó oportunidades ba ‘stakeholders’ sira atu partisipa iha reunioens Konselhu Koordenasaun nian;
- Kontinua reforsa implementasaun ba sistemas de jestaun no prosedimentus, inklui Sistema ba jestaun kazus prosesuais;
- Aperfeisoa (ka hadi’a diak liu-tan) mekanismus kona-ba kooperasaun internasional, nebé tenki alinha prioridades iha sira-nia programas ho estratéjias no prioridades País nian;
- Kontinua promove kooperasaun ho paízes CPLP no ASEAN nian no ho organizasoens internacionais seluk-tan, iha área justisa, nudar parseirus importantes ba dezvoltimentu ba setor justisa.

6.8.1 Polísia Sientífika ba Investigasaun Kriminal

- Hadia kapacidade Polísia Sientífika ba Investigasaun Kriminal, iha asoens kona-ba prevensaun, detesaun no investigasaun;

- Investe iha laboratóriu no ekipamentus sientífikus no kriminais;
- Reforsa formasaun iha área investigasaun kriminal, liuhosi kooperasaun bilateral ho Eskola Polísia Judisiária husi Portugal.

6.9 Defeza no Seguransa

Dezenvolvimento iha Instituisoens Defeza no Seguransa, ne'ebé transparentes, eficientes, kompetentes no profisionais, sai fundamental ba manutensaun demokrasia no ba konsolidasaun estabilidade no paz, iha nível nasional no internacional.

Nune'e, setor Defeza no Seguransa ida ne'ebé forte, konstrói dau-daun hahú husi restaurasaun independénsia, ho abordajen ida ne'ebé tau iha konsiderasaun sirkunstáncias Nasaun nian, liu-liu hosi nia pasadu konfliktu ne'ebé naruk no foin liu, ho Estado nebé foin harí no ninia fragilidade.

Dezafiu iha rekonstrusaun, inklui preparasaun rekursus humanus, desenvolvimentu kuadru legal ida ne'ebé sólidu no consistente ho “idiosinkrasias” ka diferensas ka espesifisidades lokais no disponibilizasaun ekipamentus no infraestruturas, ne'ebé nesesáriu ba Instituisoens Seguransa nasional nian, hetan abordajen gradual hosi Instituisoens Governus nebé kaer ukun to'o agora.

Governu sei, ho ida ne'e, sei kontinua konsolida progresus ne'ebé alkansa ona, sei buka korrije sistemas no imperfeisoens iha setor ida ne'e, no sei desenvolve estratéjias foun ne'ebé permite konsolidasaun iha setor Defeza no Seguransa ida ne'ebé modernu no profisional.

Ho objetivus hirak ne'e, inklui reforsu iha koordenasaun no kooperasaun diak entre Forsas de Defeza (F-FDTL) no Forsas de Seguransa, hodi asegura ho klareza no empenhu, tuir responsabilidade ida-idak nian no misoens ida-idak nian nebé distintas ka keta-ketak.

Governu mós sei kria Konseihu Seguransa Nasionál ne'ebé sai núdar Órgaun Konsultivu ba Governu, hodi fó prestasaun no akonselhamentu no apoiu ba tomada desizoens superiores, nomós hodi halo elaborasaun ba polítika no lejislasaun ne'ebé inklui matéria Defeza no Seguransa nian.

6.9.1 Defeza

Forsas Armadas Timor-Leste, FALINTIL – FDTL, ne'ebé forma hosi sidadauns nasionais de'it, tuir konstituisaun responsabiliza ba iha defeza militar. Nia misaun principal ne'e fokus liu atu garante

independência nacional, integridade territorial no liberdade nomós seguransa ba populasan kontra agresaun ka ameasa esterna, tuir respeito ba orden konstitusional.

Alein de nia misaun principal, F-FDTL bele tau iha misaun de apoiu seluk ba autoridade sivil sira, iha kuadru sistema ne'ebé integradu iha Seguransa Nasional, haktuir termus da Lei Seguransa Nasional, nune'e mós iha apoiu ba política esterna Estado nian, iha operasaun apoiu ba paz no humanitaris.

Hanesan mós ho Forsas Seguransa, Forsas Defeza la-iha no labele tama partidu no tenke obedese deit ba Órgãos Soberania kompetentes, ho tenki hadook-an hosi intervensaun política sa-ida deit.

Iha desenvolvimentu setor Defeza, Estado Timor reafirma nia postura estratéjika iha defeza, ne'ebé iha respeito ba Estado de Direito, hodi continua diplomasia no disuazaun, hanesan forma ida hodi prevene no resolve konfliktus ruma, maibé, mantein nafatin katak bele uza forsa tuir termus Karta Nasoens Unidas nian bain-hira nesesáriu duni atu garante independência nacional.

Abordajen ida ne'e implika atu investe iha Forsas Defeza hodi hetan kapasidade atu defende Nasaun hosi ameasas externas, nune'e mós aptas atu kontribui ba esforsus iha kooperasaun rejional no internasional, inklui iha prezervasaun paz no estabilidade nasional no internasional.

Iha kontestu ida ne'e, desenvolvimentu ba defeza sei tau atensaun ba iha leitura contemporânea kona-ba kontestu jeoestratéjiku internacional sésulu XX nian, permeadu ho riskus foun no ameasa – agora ne'ebé difunde, multidimensionais no ho karater liu-liu internu, hodi halo forte fronteira entre defeza no seguransa. Ezije mós, nune'e, leitura diak id aba ambiente seguransa iha sékulu XXI, atu halo fali avaliasaun ba papel no funsaun ba instituisaun defeza Estado Timor no nia pozisaun iha relasaun esterna iha area ida ne'e, liu-liu koa-ba seguransa cooperativa no nia partisipasaun iha asaun kolektiva humanitarian no paz iha âmbito organizasaun Nasoes Unidas no forum internacional sira seluk.

Atu konsolida metin liu tan planeamentu estratéjiku ba defeza no militar, ne'ebé nia dokumentu ne'e fundamental ba desenvolvimentu iha kapasidade esensial F-FDTL nian, hodi hala'o sira nia misaun, no hodi fo'o orientasaun ba siklu planeamentu forsas, defeza sei fo'o continuidade ba elaborasaun edifísiu estruturante ba planeamentu estratéjiku defeza no militar nian. Ho aprovasaun Konseitu Estratéjiku ba Defeza no Seguransa Nasional, no defeza sei hametin edifísiu estruturante planeamentu estratéjiku nian hodi konsolida diretiva ministerial ba planeamentu no defeza militar, Konseitu Estratéjiku Militar, Misaun F-FDTL, Sistema no Dispositivu forsas nian no propoin Lei Programasaun Militar nian, hodi moderniza no profesionaliza F-FDTL. Ho vizaun ida ne'e, planeamentu Forsas serve atu halo planeamentu estratéjiku ne'ebé bazeadu iha avaliasaun nesesidade ba defeza nasional konforme risku no ameasa ne'ebé identifika ona.

Governu mós sei asume estratéjia nebé sei efikaz liu tan, kona-ba seguransa jeoestratéjika no marítima, ne'ebé konsidera eventus foin lalais ne'e iha parte barak iha mundu tomak, iha nebéh

aktus terrorismu aumenta, nomós tráfiku humanu no krimes organizadus seluk. Iha parte seluk, konsidera katak pozisaun jeográfika Timor-Leste, ho ninia Zona Ekonómika Ezkluziva ne'ebé luan no nia rikeza iha rekursus naturais iha Tasi laran ne'ebé hale'u teritóriu tomak, inklui rekursus enerjétikus hosi Tasi Timor, sai urjente atu hare oin-sá dezenvolve kapasidade naval atu Timor-Leste iha kondisaun atu proteje no prezerva ninia rekursus no nia Povu.

Nune'e, Defeza sei konsolida lejislasaun ne'ebé nesesáriu hodi hadia Sistema Autoridade Marítima Timor-Leste (SAMTL) no Autoridade Marítima Nasional, no implementa operacionalmente nia funsionamentu hanesan entidade ne'ebé ezerse poder públiku iha espasu maritime, iha soberania no juridisaun nasional no ho funsaun estrutura superior diresaun nian, administrasaun no koordenaun hosi órgaun no servisu ne'ebé hala'o iha ámbitu SAMTL.

Governu, iha área defeza, sei buka alkansa objetivus hirak tuir mai:

- Defende soberania nasional, konsolida paz no estabilidade no promove rekonsiliaun no unidade nasional;
- Promove servisu militar, núdar dever patriótiku no inkute iha profissionais setor ida ne'e atu sai modelu exemplar ba sidadania no integridade;
- Envolve F-FDTL iha desenvolvimentu ekonómiku, sosial no humanu País nian;
- Dezenvolve asoens kooperasaun bilateral no multilateral, ba promosaun no prezervasaun ba paz no ba estabilidade nasional, regional no mundial, iha fortalesimentu ba seguransa koperativa;
- Asegura partisipasaun Forsas Armadas timor-nian iha forsas multinasionais no iha organizasoens internasionais, inklui operasoens ba manutensaun de paz no operasoens humanitárias husi Nasoens Unidas;
- Treina no hadia kapasidade Forsas Armadas atu fó apoiu ba populasaun sivil, liu-liu iha tempu dezastres naturais no kazus emergjénsia sira seluk, iha ámbitu sistema integradu seguransa nasional nian;
- Hasa'e kbit componente naval ba iha defeza, vijilánsia, kontrolu no fiskalizasaun ba atividades marítimas no portuária iha ámbitu sistema autoridade maritime Timor-Leste nian;
- Promove no hari'i Komponente Apoiu Aéreo Lijeiru hodi partisipa ho forma integrada iha defeza militar país, nune'e mós halo patrulha ba espasu aéreo nasional no partisipa iha misaun humanitarian sira hodi apoia ba populasaun sivil sira;
- Promove no hadia kapasidade hotu-hotu iha F-FDTL ne'ebé identifika ona iha Konseitu Estratéjiku Defeza no Seguransa Nasional ;
- Elabora Konsneitu Estratéjiku Militar no Lei ba Programasaun Militar nian;
- Haforsa edifísiu estruturante Planeamentu Estratéjiku Defeza no Militar nian;
- Promove estudu no reflesaun kona-ba obrigatoriedade ba servisu militar;

- Promove partisipasaun feto iha setor Defeza, inklui fó oportunidades iha progressaun karreiras, ne'ebé promove igualdade ba jéneru.

Atu alkansa objetivus hirak ne'e, sei implementa asoens hirak tuir mai:

- Asegura atu setor Defeza, inklui F-FDTL, sai kredível, profisional no ekipadu ho diak, ho kbit boot no luan atu hala'o misoens oi-oin, hodi bele partisipa iha esforsu seguransa, estabilidade no dezvoltimentu nasional (PED 2020);
- Haré fali ka revê no atualiza "Estudu Estratéjiku Forsa-2020" no defini fali planu ba dezvoltimentu no konsolidasaun ba Forsas Armadas, iha buat ne'ebé presiza to'o estabeselese dokumentus estruturante ba Planeamentu Estratéjiku Defeza no Militar;
- Implementa Konseitu Estratéjiku kona-ba Defeza no Seguransa Nasional, inklui revizaun no aprovasaun ba nia kuadru legal;
- Elabora Diretiva Ministerial ba Planemanetu no Defeza Militar, Konseitu Estratéjiku Militar, Misaun hirak F-FDTL nian, sistema no dispozitivu forsas sira nian no propin lei ba programasaun militar hodi konsolida siklu planeamentu estratéjiku defeza nian;
- Hadi'a infraestruturas no harí instalasoens foun ba komponentes tomak, inklui bazez teritoriais no navais nebé prinsipais;
- Halo planu ba estabesimentu Akademia conjunta ba Forsas Defeza no Forsas sira no Servisu Seguransa nian;
- Harí'i Bairros Militares, iha fatin-fatin nebé sei identifika no presiza duni;
- Dezenvolve estudus no planus investimentu ba konstrusaun Hospital Militar Ida, ne'ebé dedika ba prestasaun kuidadus saúde pesoal militar, polisial, no veteranus sira;
- Abastese F-FDTL ho ekipamentu, material no armamentu modernu no ho qualidade, atu hare'e ba lejislasaun nasional no internacional ne'ebé vigora hela;
- Implementa política integrada ba dezvoltimentu ba rekursus humanus iha setor defeza;
- Hadi'a prosesus rekrutamentu militar, ho baze iha méritu;
- Hadi'a sistemas no teknolojia informasaun no dezvoltive sistema de Komandu, Kontrolu, Komunikaun, Komputadores no Informasaun;
- Aumenta kapasidade ba komponentes operacionais, terrestre no naval;
- Abastese ka fó ba komponente naval meius ne'ebé adekuadus hodi hala'o ninia misaun;
- Estabesele no kapasita Autoridade Marítima Nasional, hodi asegura soberania no juridisaun nasional no defeza rekursus marítimus nian;
- Investe iha formasaun ba rekursus humanus, sivil no militar sira, hodi asegura funsionamentu ne'ebe diak ba Autoridade Marítima Nasional;
- Reforsa dezvoltimentu iha Unidades Forsas Espesiais nian;

- Hahú hari'I Komponente apoiu aéreo hodi partisipa ho forma integrada iha defeza militar nasaun nian, hanesan mós halo patrulha ba espasu aéreo nasional no partisipa iha misaun humanitarian hodi apoia populusaun sivil sira;
- Konsolida kooperasaun bilateral no multilateral iha área Defeza, promove parseria estratéjika ho paízes parseirus no kontribui ba desenvolvimentu nasional no internacional;
- Kria oportunidades ba treinu no apoiu lojístiku hodi aumenta partisipasaun elementus F-FDTL iha operasoens ba manutensaun da paz no operasoens humanitárias Nasoens Unidas nian;
- Reforsa kapasidade iha setor Defeza, iha âmbito unidades de enjenharia no saúde, hodi fó prestasaun de apoiu ba populusaun sira;
- Implementa Sistema Alerta Nasional no had'ia kapasidade hodi hatán ba dezastres naturais no emergjencias;
- Promove hamutuk ho Forsa no Seervisu Seguransa, nune'e mós ba protesau Sivil, ezersísu hamutuk iha âmbito sistema integradu Seguransa Nasional nian;
- Kontinua dezenvolve medidas no implementa asoens ne'ebé bele lori ba iha prosesu reforma ida ne'ebé justu no dignu, ba Veteranus sira ne'ebé sei ativu hela iha F-FDTL.

6.9.2 Seguransa

Seguransa, nudar funsaun ka dever essencial ida mós ba Estadu, sai hanesan kondisaun indispensável ba ezersísu direitus no liberdades fundamentais sidadauns sira-nian, no prezervasaun estabilidade iha sosiedade laran rasik no funcionamento normal atividade ekonomika, depende tebe-tebes ba garantia ida ne'e.

Tuir Konstituisaun, PNTL no servisu de Seguransa iha dever atu defende legalidade demokrátika no garante seguransa interna ba sidadauns, no Polísia no Forsas de Seguransa labele tama ka defende partidu ida, hodi bele atua ho forma ezemplar ka hodi sai nudar ezemplu, hatudu respeitu ba ema hotu-hotu.

Nune'e, Governu assume, hanesan prioridade ba nia asaun, kaer politikas no medidas nebé konkretas hodi kontinua garante katak Timor-Leste País ida nebé seguru duni, hodi reforsa autoridade Estadu-nian, no hodi dezenvolve no konsolida efikásia Forsas no Servisu de Seguransa, no rekonhese mós katak, iha área ida ne'e, investimentu sá-ida deit sei lori, iha kurtu, médiu no longu prazo, vantajens no benefísios nebé diak.

Governu mós sei kontinua implementa plano estratjiku abranjente ida, nebé bele fó resposta ba objetivus estratéjikus, husi nia realidade rasik, no loke-an ba kestoens relevantes, hanesan

prevensaun de riskus ba estabilidade social, kombate ba kriminalidade, protesau civil no sinistralidade ka asidentes iha estrada.

Iha setor seguransa, Governu sei kontinua implementa planu ida abranjente, ba tempu naruk ka longo prazu, hodi asegu katak setor seguransa kumpre nia papel primordial atu servi povu no garante paz, seguransa no estabilidade.

Governu hakarak alkansa objetivus hirak tuir mai:

- Dezenvolve no hare'e hikas kuadru legal ba instituisoens iha setor seguransa interna no protesau civil, haktuir politika ne'ebé estabesele ona iha PED 2011-2030 no iha Konseitu Estratéjiku Defeza no Seguransa Nasional;
- Dezenvolve kapasidade operacional husi Instituisoens seguransa interna no protesau civil, hodi hadi'a sira iha kumprimentu misoens nebé simu;
- Intensifika deskonsentrasaun servisu, hodi hakbesik tan ba sidadauns sira, iha territoriu nasional tomak;
- Kontinua haré atu reforsa Protesau Civil, iha ninia implementasaun lolós tuir lei no iha área operacional husi Autoridade Nasional Protesau Civil;
- Kontinua hadi'a Servisu de Migrasaun, hodi implementa leis no regulamentus nebé vigora, liuliu Lei (foun) de Migrasaun e Asilu;
- Reforsa kapasidade Diresau Nasional Seguransa Rodoviária, atu garante katak iha servisu asesíveis ba sidadauns sira no atu adopta regras no prosedimentus iha jestaun no prosesu halo autus ba kazus iha Estrada;
- Aperfeisoa mekanismus internus monitorizasaun nian no iha reporte kona-ba kumprimento ba respeito direitus humanus;
- Kontinua hadi'a Sistema prevensaun no rezolusaun ba konfliktus komunitários;
- Reforsa formasaun no espesializasaun iha Rekursus umanus, liu husi programas estudu ka estájius, ba media no longa durasaun, iha instituisoens hanesan iha Estados-membros CPLP;
- Reforsa kooperasaun bilateral ho Estados-membros CPLP ho ASEAN, iha áreas importantes ba kompetensias espesializadas no iha assistênsia téknika;
- Avalia, revê no atualiza Plano Estratéjiku Seguransa Interna nian 2030, atu nuné bele ajusta ho dezafius atuais ka ohin-loron nian, iha setores seguransa interna no protesau civil;
- Implementa Konseitu Estratéjiku ba Defeza no Seguransa Nasional no ba kapasidade ne'ebé identifika on aba iha forsas no servisu Seguransa nian;
- Aperfeisoa prosedimentus no mekanismus ba planeamentu, orsamentasaun, jestaun finanseira, aprovizionamentu, lojística no rekursus humanus, liu husi implementasaun leis nebé vigora no adopsaun regras no prosedimentus uniformes ka hanesan no transparentes, iha kada área nebé temi iha leten;

- Asegura orden no seguransa ema nian no sasán, garante paz no estabilidade nomós harmonia sosial, hodi prevene no kombate kriminalidade;
- Garante respeito ba direitos humanus sidadaun hotu nian, ho atuaun forsas seguransa nian;
- Profisionaliza forsas no Servisus seguransa;
- Moderniza instituisaun ida ne'e, inklui mós sistemas no prosesus, hodi adopta prosedimentus nebé modernus no eficientes, nomós liu hosi uza teknolojia informasaun;
- Promove partisipasaun Feto iha Setor Seguransa, inklui kriaun oportunidades ba progresaun karreiras.

Nune'e, sei desenvolve asoens hirak tuir mai:

- Asegura atu setor seguransa, inklui mós Polísia Nasionál Timor-Leste, bele ona funsiona ho profisionais kualifikadus no responsáveis, ne'ebé hetan apoiu iha infraestruturas no ekipamentus modernus, no haktuir didiak regulamentus ne'ebé promove efikásia, responsabilidade no boa governasaun iha Setor ne'e (PED 2020);
- Kontinua implementa Planu Estratéjiku ba Seguransa Interna tinan 2030, hodi tau maten liu ba tempu badak ka kurtu prazu, hodi implementa faze daruak, ne'ebé dedika ba “Alargamento no Desenvolvimento ba Segurança Interna” (2016-2020);
- Reforma kuadru legal hodi halo modernizasaun no hadi'a atuaun polísia no diresoens sivil no operacional nian, haktuir Konseitu Estratéjiku ba Defeza no Seguransa Nasionál no PED 2011-2030;
- Haré fali ka revê no halo reforma ba kuadru legal atu halo kontrolu efetivu ba iha fronteiras terrestre no marítima;
- Revê no atualiza Reglamentu de Disciplina PNTL nian;
- Kria mekanizmu prevensaun no jestaun konfliktu atu muda atitudes no mentalidades, promove democracia, toleránsia no respeito ba diferença;
- Reforsa modelu polisiamentu komunitáriu no kapasita forsas polisiais hodi buka rezolve konfliktus, hodi orienta profisionais iha setor ne'e ba modelu polisiamentu ida ne'ebé tau matan ba comunidades sira;
- Garante iha implementasaun Decreto-Lei ba Artes Marsiais no Armas brankas, reforsa estatuto Komisaun Reguladora Artes Marsias (CRAM) no mós fó continuidade ba prátika polisiamentu komunitáriu, ho vizibilidade, envolvimentu no profesionalismu);
- Hadí'a tan kapasidade operacional, iha konsolidasaun seguransa pública;
- Hadia diak liu kapasidade operacional hodi halo prevensaun ba kriminalidade no investigasaun criminal (iha tutela Ministériu Justisa nian);

- Reforsa koordenasaun no kooperasaun entre Polísia Nasionál Timor-Leste no Polísia Sientífika ba Investigasaun Kriminal;
- Reforsa kapasitasaun institusionál no moderniza infraestruturas, ekipamentus no teknolojias informasaun iha setor, inklui mós tau iha informática sistema rekolha no tratamentu ba informasaun;
- Investe iha kapasitasaun forsas seguransa kona-ba respeito iha atendimento ba públiku, hodi asegura atendimento ne'ebé adekua ba Feto no labarik sira;
- Asegura ezisténsia Unidade Tráfegu no Seguransa Rodoviária ne'ebé formadu ho diak no profisionál, iha estradas rai laran tomak, nune'e garante kumprimentu ne'ebé rigoroza iha kódiu estrada (PED 2020);
- Promove Diresaun Nasional Seguransa Rodoviária no hamenus asidente, nune'e mós aumenta asaun Polísia sira nian, hodi previne no kontrola, nune'e mós liuhosi promosaun kampanhas ne'ebé abranjente iha edukasaun rodoviária;
- Promove edukasaun sívika ba sidadauns hotu, kona-ba utilizaun via pública no ba regras trázitu, iha nível intersetorial;
- Haré fali no elabora kuadru legal ida ne'ebé bele harmoniza no hadi'a lejislasaun rodoviária nian no elabora Planu Nasional kona-ba Prevensaun no Seguransa Rodoviária;
- Proteje no prezerva patromóniu Estadu, tuir objetivus ne'ebé aprova ona;
- Kontinua dezenvolve kooperasaun internacional ho parseirus desenvolvimentu, hodi asegura desenvolvimentu iha setor;
- Kontinua investe iha infraestruturas, inklui mós edifísiu sivil, eskuadras no sentrus formasaun.

6.9.3 Servisus Migrasaun

- Regulamenta Lei foun n.o 11/2017, 24 maiu, kona-ba Migrasaun no Asilu, no elabora 'green list' foun ida;
- Aprova modelos no formuláriu nebé nesesáriu atu implementa Lei Migrasaun no Azilu;
- Regulamenta organizaun, konteúdu no funsionamentu ba Sistema de Jestaun Fronteiras;
- Implementa rede digital própria id aba komunikasoens ba Sistema jestaun fronteiras, nebé permite ligasaun entre Diresaun Jeral no Delegasoens rejionais no Postos konsulares;
- Estabelese konseitu fronteiras elektronikas (E-Gates) iha postos pinsipais entrada ka ema tama mai;
- Revê estatuto pessoal Servisu Migrasaun nian, hodi garante iha definisaun klara kona-ba funsoens no karreiras ba funcionarios sira iha instituisaun né;
- Konstrói edifísiu próprio ida ba Diresaun Jeral do Servisu de Migrasaun;

- Hadi'a infraestruturas no ekipamentus iha servisu migrasaun iha fronteiras hodi asegura kontrolu ba tama-no-sai sidadauns nasionais no estranjeirus;
- Regula no implementa Lei Foun kona-ba Migrasaun no Asilo;
- Forma no reforsa kapasidades profisionais servisu migrasaun nian no kontrolu iha fronteiras.

6.9.4 Servisu Nasional Intelijénsia

- Aprova no implementa Planu Estratéjiku Servisu Nasional de intelijénsia;
- Promove formasaun rekursus humanus no kapasitasaun institusional, iha Servisu Nasional de Intelijénsia;
- Adopta servisu ho meius ne'ebé adekuadus iha peskiza, rekolha no análise informasaun no dados, hodi kapasita instituisaun ho ekipamentu no meius teknolójikus ne'ebé nesesáriu, ba dezempenhu ninia funsaun;
- Promove koordensaun no kooperasaun ho Forsas de Defeza no Forsas de Seguransa, atu prevene no hasoru ameasas internas ka externas;
- Promove kooperasaun internacional entre Servisu Nasionál de Intelijénsia de Timor-Leste ho entidades konjéneres paízes seluk nian.

6.9.5 Autoridade Nasional Protesaun Sivil

- Elabora ka halo Lei de Baze da Protesaun Sivil, hodi define enkuadramentu legal no operacional ba Sistema Nasional de Protesaun Sivil;
- Dezenvolve kareira profisional ba funsionáriu Protesaun Sivil no Bombeirus sira, liuhosi kriaun estatutu rasik;
- Harí edifisiu propio ba Autoridade Nasional Protesaun Sivil, nebé iha ekipamentus nesesáriu ba planeamentu no koordensaun iha atividades protesau sivil no bombeiros sira nian;
-
- Organiza no implementa sistema número úniku emerjénsia nian, ba servisu apoiu polisia, médikus no Bombeirus sira;
- Estabelese akordu kooperasaun Bilateral iha area Protesaun Sivil no Bombeirus;

- Providencia katak iha fundus, nebé alokadus, ba nesesidades operasionais nebé mosu husi situasaun emerjensia ka dezastres naturais;
- Dezenvelope programa hodi apoiu ba kapasitasaun rekursus humanus, nune'e mós infraestruturas no ekipamentus ne'ebé presiza atu atua iha protesaun sivil, inklui mós Korpu de Bombeiros, organizadu no professional, atu bele lori sira-nia misaun servisu ho efisiénsia no responsabilidade (PED 2020);
- Kapasita Autoridade Nasional de Protesaun Sivil;
- Dezenvelope Servisu Nasional Bombeiros;
- Haré fali no estabelese kuadru legal ida kona-ba protesaun sivil, inklui mós iha aprovasaun Lei de Baze iha Protesaun Sivil;
- Investe iha formasaun ba profisionais husi instituisaun Protesaun Sivil, inklui mós Bombeiros;
- Kria mekanizmu Alerta, atu reaje no aviza molok iha situasaun dezastre natural, no meius adekuadus ba resposta no atuasaun.

6.10 Relasaun Internasional no Política Esterna

Timor-Leste hanesan Nasaun kiik ida, ho lokalizasaun jeográfika estratéjika tebes, ne'ebé nia seguransa depende ba estabeleimentu relasaun amizade no kooperasaun sólida ho paízes hosi fatin-fatin iha mundu, maibé, liu-liu, ho paízes vizinhos, paízess iha rejiaun no paízes ne'ebé Timor-Leste partilha lasus kulturalis, istórikus no solidariedade hori uluk kedas, hodi fo hanoin kon-serteza kona-ba paízes ho língua oficial portugueza.

Nomós konsistente ho fundamentus konstituissaun nian, Timor-Leste kaer metin prinsípius kona-ba independénsia nasional, direitu povus sira nian ba autodeterminasaun no independénsia, soberania permanente povu-nian kona-ba ninia riku-soi no rekursus naturais, kona-ba protesaun ba direitos humanus, respeito malu iha soberania, integridade teritorial no mos kona-ba igualdade entre Estados no kona-ba labele iha interferénsia iha asuntos internus Estados nian.

História independénsia nasional labele hadok-an husi atus diplomátikus, amizade no solidariedade hosi governus no povus iha mundu tomak. Objetivu política externa timorense labele iha dalan seluk, se lae atu kontinua mantein no reforsa relasoens amizade no kooperasaun, hodi promove, iha palku internasional, rekonsiliaaun, paz, estabilidade, justisa no orden ekonómika internasional, ne'ebé bele permite atu hala'o objetivus hirak ne'e, hodi kontribui hamenus kiak iha nível mundial.

Nudar nasaun joven ida ne'ebé sei iha faze atu develope-an, Timor-Leste, tenke lori política esterna ida ne'ebé promove kooperasaun bilateral no multilateral, hodi loke dalan ba parserias

kulturais, ekonómikas no komersiais ho nasoens sira seluk, liu-liu atu atrai investimentu no kapasitasaun ba instituisoens no ba rekursus humanus Paíe ne'e nian.

Iha kontestu ida ne'e, Governu sei hamosu objetivus hirak tuir mai, iha ámbitu relasoens internasionais no polítika esterna:

- Promosaun ba intereses nasionais no ba imajen país-nian, iha nível internacional;
- Fortalese relasoens amizade, kooperasaun no solidariedade ho Estados hotu-hotu, tuir prinsípius konstitusionais no tuir polítika “zero inimigus”;
- Reforsa lasus amizade no kooperasaun ho vizinhos ne'ebé besik liu, hanesan Indonézia no Austrália;
- Fó atensaun liu atu reforsa relasoens internasionais ho Rai sira ne'ebé Timor-Leste partilha lasus histórikus, kulturais no amizade, nune'e mós ho sira nebé ita iha língua komun, hanesan comunidade Países de Língua Portuguesa;
- Reforsa solidariedade, kooperasaun no agenda komun ida ba países frájeis no afetadus ho konflitu, liu-liu atu implementa inisiativas ne'ebé bele lori Rai sira né ba dalan dezvoltimentu no ba konsolidasaun paz no estabilidade, iha ámbitu g7+;
- Reforsa relasoens internasionais ho países ne'ebé empenhadus (ka haka'as-an) atu konsolida sira-nia dezvoltimentu no defende integridade teritorial, hanesan Estados husi Ilhas ki-kiik iha Pasífiku, ne'ebé buka hela hala'o sira dezvoltimentu, nune'e mós ho países sira ne'ebé empenhadus atu uza no kontrola sira-nia rikeza, hodi fó benefísius ba sira-nia povu;
- Reforsa relasoens amizade no kooperasaun bilateral ho países iha Sudeste Aziátiku, inklui loka tan no konsolida embaixada iha países membrus ASEAN nian, hodi kontinua promove reformas nasionais ne'ebé alinha ona ho diretrizes Asosiasaun ne'e nian, nune'e bele hatutan esforsus hotuhotu, atu Timor-Leste sai membru efetivu ho plenu direitu iha ASEAN;
- Reforsa relasoens amizade no kooperasaun bilateral ho países amigus nebé sai parseirus importantes ba dezvoltimentu, hanesan Portugal, Austrália, Indonézia, Estados Unidos Amérika, Kuba, Nova Zelândia, Japaun, Koreia do Sul, China, nune'e mós ho países nebé pretense ba BRICS, CPLP nune'e mós ho países hosi Rejiaun Golfo;
- Reforsa relasaun amizade no kooperasaun ho Santa Sé no kria kondisaun atu implementa Konkordata;
- Prepara adezaun ba Commonwealth;
- Konsolida lasus amizade no kooperasaun ho países iha Uniaun Europeia, nune'e mós kontinua aposta iha projetus kooperasaun ne'ebé hetan parseria ho organizasaun ida ne'e;

- Reforsa envolvimentu Timor-Leste iha Organizasaun Nasoens Unidas, liu-liu iha inisiativas no enkontrus ne'ebé tau matan ba paz, rekonsiliaun no dezvoltimentu ekonómiku no sosial povus mundu tomak nian, nune'e mós atu kontinua promove implementasaun Objetivu ba Dezenvolvimentu Sustentável, no partisipasaun iha debates konstrutivus, hodi halo reforma ba Konseihu Seguransa, nomós, kona-ba partisipasaun foras armadas no polisiais timor-oan, iha operasoens ba manutensaun da paz no operasoens humanitárias husi ONU;
- Defende prinsípius fundamentais Movimentu Naun-Alinhadu no Karta das Nasoens Unidas, kona-ba prezervasaun no promosaun paz iha mundu, liuhosi diálogu no diplomasia entre Estados, hodi evita uza fali forsa atu rezolve konflitus;
- Kontinua hametin papel Timor-Leste iha organizasoens rejionais no internacionais, hanesan Fórum das Ilhas do Pasífiku, Fórum Rejional ASEAN, Diálogu do Pasífiku Sudoeste, Grupu Estados Afrikanus ho Karaíbas no Pasífiku, ACP-UE, Banku Mundial, Fundo Monetário Internacional, Banku Asiático ba Dezenvolvimentu, Asian Infrastructure Development Bank, Organizasaun Mundial ba Komérsiu, Bali Democracy Fórum, Melanesian Spearhead Group, Iniciativa Koral Triangle, no organizasoens internacionais sira seluk.

6.11 Delimitasaun Fronteiras Terrestres no Marítimas

Timor-Leste, nasaun kosteira ida iha sudoeste aziátiku, situadu entre vizinhos rua nebé boot tebe-tebes. Husi norte, oeste no leste iha arkipélagu indonézio. Iha Sul, kontinente australianu nebé boot no luan, besik kuaze 300 milhas náutikas, hosi Tasi.

To'o loron 6 fulan Marsu tinan 2018, laiha fronteiras marítimas permanentes, ho nia vizinhos rua ne'e, Austrália no Indonézia.

Iha ámbitu política externa, delimitasaun fronteiras, iha tasi no rai, sai prioridade ida, tanba ne'e kestaun soberania nasional. Ho ida ne'e, hori uluk kedas bain-hira hahú independénsia, Timor-Leste dezenvolve esforsus atu hahú negosiasaun ho Austrália no Indonézia, hodi hetan delimitasaun ba fronteiras.

Ida ne'e sai hanesan kestaun soberania, liu-liu ba nasaun ida ne'ebé simu sakrifísus hotu, iha tinan 24 nia laran, atu defende ninia liberdade no independénsia. Fronteira ikus ba luta timor-nian maka iha tasi laran nebé hale'u Timor-Leste.

Importante mós atu afirma fali katak, ba povu Timor-Leste, nudar ilha. tasi ne'ebé hale'u sai parte integrante ba iha nia moris loron-loron nian no ho nia signifikadu espiritual, hosi lenda ne'ebé hatete katak timor-oan sira mai hosi Avó-lafaek. Povu depende ba nia tasi, ba nia sustentu no subsisténsia rasik, liuhosi peska no kaer spesies husi tasi. No mós, resifes koral no fatuk lolon naruk

no klean iha tasi-laran, ne'ebé hale'u ilha Timor-Leste, hetan importánsia boot tamba bele sai atrasaun diak tebe-tebes ba iha dezvoltamentu turístiku.

Nune'e mós, nasaun buka dezvoltolve nina indústria petrolífera no hakarak atrai investimentu ba reservas petróleo no gás, ne'ebé nakonu iha tasi okos, iha kosta sul. Atividades petrolíferas iha Tasi Timor dau-daun ne'e regula liuhosi akordu provizóriu, atu fahe rekursus ho Austrália, ne'ebé kaer tuir buat nebé hakerek iha Tratadu, ne'ebé uluk Austrália ho Indonézia mak assina, durante keda tempu okupasaun militar.

Ho razaun ida ne'e, bain-hira hahú hetan independénsia, prioridade prinsipal ida ba Nasaun maka hetan delimitasaun permanente iha fronteira marítima, haktuir direitu internacional. Estabelesimentu fronteira marítima ne'ebé permanente, sei permite Timor-Leste atu tau iha mapa nina fronteiras, terrestres no marítimas, ne'ebé sei hetan rekonhesimentu internacional, hodi permite tau seguransa boot no fó serteza ba dezvoltamentu indústrias no servisu lubun ida, inklui mós iha área seguransa, imigrasaun, peskas, turismu no alfândegas.

Iha lidun seluk, sei dudu dezvoltamentu empresarial no investimentu, inklui mós setor petrolíferu. Kresimentu no diversifikasaun ekonómika representa konstrusaun ba futuru nebé prósperu, seguru no sustentável, ba Timor-Leste.

6.11.1 Indonézia

Iha tempu badak, Governu sei reativa fali negosiasoens ho Indonézia, hodi finaliza delimitasaun fronteira terrestre, ho deit ona segmentos rua (Oben/Bijael Sunan e Citrana) iha Oé-Kusi, hodi nune'e aseguira definitivamente nia direitu soberania kona-ba espasu territorial Timor-Leste nian. Relasiona ho delimitasaun fronteira marítima ho Indonézia, hahú ona mós konsultas formais, hodi dezvoltolve daudaun ona, hosi governu rua ne'e, prinsipius no orientasoens atu tama ba negosiasoens, no konkorda ona atu tuir aplikasaun direitu internacional, iha âmbito Konvensaun Nasoens Unidas ba Direitu ba Tasi (CNUDM), hodi define fronteiras marítimas entre nasoens rua ne'e.

Nune'e, Governu sei retoma fali negosiasoens formais kona-ba fronteiras marítimas, hafoin hetan delimitasaun final iha fronteira terrestre. Nune'e, diskusoens internas no preparasaun dokumentasaun política, técnica no legal ne'ebé sei orienta negosiasoens sira ne'e, sei komesa prepara dau-daun ona.

6.11.2 Austrália

Loron 6 fulan Marsu tinan 2018, asinala duni momentu históriku ida ba ita-nia nasaun, ho asinatura Tratadu Fronteiras Marítimas entre Timor-Leste no Austrália, iha Nova Iorque. Tratadu ida ne'e mosu nudar rezultadu hosi prosesu ida naruk ba rezolusaun disputas entre paizes rua ne'e, kona-ba áreas maritimas idai-idak nian, prosesu ne'ebé inklui mós esforsus diplomátikus, konsultas no negosiasoens bilaterais nomós liuhosi prosesus legais entre Estados rua ne'e.

Wain-hira hahú, pela primeira vez iha história, iha fulan Abril tinan 2016, prosesu konsiliaaun obrigatória ho Austrália, iha âmbito Konvensaun Nasoens Unidas kona-ba Direitu ba Tasi, Timor-leste consegue, durante tinan 2017 tomak, lori Austrália ba tur iha meza atu negoseia. Ho asisténsia hosi Komisaun Konsiliaaun, paizes rua ne'e fó pasus signifikativus ho objetivu atu halo akordu ida kona-ba fronteiras marítimas permanentes, hodi, finalmente, iha Sede Nasoens Unidas iha Nova Iorque, ho prezensa hosi Sekretáriu Jeral Nasoens Unidas, Eng.^o António Guterres, bele assina duni Tratadu ne'e.

Governu sei, ho prioridade máxima, desenvolve esforsus atu implementa Tratadu kona-ba Fronteiras Marítimas, inklui kedas mós prosesu ratifikasaun hosi Parlamentu Nasional, nune'e mós kontinua negosiasoens ho kompanhias petrolíferas ne'ebé envolve iha Kampu Greater Sunrise, hodi estabelese rejime especial ida nebé fó benefísius ba parte rua hotu.

Nune'e, Governu sei kontinua desenvolve esforsus hodi implementa akordu ne'ebé estabelese ona ho Austrália, hodi rekonese ligasaun nebé labele hakotu entre delimitasaun fronteira marítima no kriaaun rejime especial ida ba desenvolvimentu Greater Sunrise, ne'ebé inklui desenvolvimentu rekursus nian no dispozisoens kona-ba fahe reseitas, ne'ebé sei mai hosi esplorasau rekursus hirak ne'e. Negosiasoens sira ne'e sei tuir política ida nebé firme, atu defende intereses nacionais, hodi harései ba desenvolvimentu social no ekonómiku, ne'ebé sustentável ba Povu timor.

Relasiona ho susesu iha prosesu konsiliaaun obrigatória no konsidera mós publikasaun hosi "Relatóriu Final no Recomendasaun hosi Komisaun Konsiliaaun", Timor-Leste, iha nia âmbito política esterna, sei kontinua promove direitu internacional no rezolusaun pasífika ba disputas entre Estados, hodi partilha ninia esperiênsia rasik no partisipa iha konferênsias no fóruns internacionais, ne'ebé promove direitu internacional, direitu internacional ba Tasi no, liuliu Konvensaun Nasoens Unidas ba Direitu ba Tasi, nomós kona-ba prinsípiu katak Estados hotu-hotu tenke, ho 'boa-fé', kumpre idaidak nia obrigasoens, tuir direitu internacional no respeita direitus legais Estados seluk nian. Estados hotu-hotu, boot ka kiik, hanesan deit perante direitu internacional no perante tribunais internacionais.

Iha nível internu, Governu sei implementa medidas estratégikas atu defende independénsia no integridade territorial, inklui mós supervizaun ba espasu terrestre, marítimu nomós aéreo, iha âmbito reforsu soberania nasional.

6.11.3 Dezenvolvimentu Institusional

Ho objetivu atu implementa polítika esterna Nasaun-nian, iha ámbitu relasaun internacional, Governu sei kontinua hametin instituisoens ne'ebé responsáveis ba aplikasaun ninia polítika esterna no atu promove kooperasaun bilateral no multilateral, ne'ebé orienta ba dezenvolvimentu Nasaun.

Nune'e, Governu sei:

- Kontinua dezenvolve kuadru legal, ne'ebé lori ba fortalesimentu setor ida ne'e, inklui mós estruturasaun no hasa'e estatutu ba karreiras diplomátikas, nune'e mós atu regula direitos no deveres funsionáriu sira-nian, iha servisu diplomátiku;
- Aprova no implementa lejislasaun kona-ba Protokolu Estadu, ne'ebé instituisionaliza prosedimentus lubun ida no regras internas, iha relasionamentu entre Timor-Leste ho Estados sira seluk, hodi nune'e dignifika Nasaun no Nasaun-nia representantes sira;
- Kontinua halo elaborasaun, produsaun no aprovasaun ba *Dokumento Mutin* (Livro Branco de Política Externa);
- Harmoniza kompromisu internacionais, ne'ebé vinkula Estadu Timor-Leste no halo nia divulgasaun intersetorial, hodi hadi'a profisionismu no hadi'a asaun husi Estadu, nune'e mós atu kumpre obrigasoens ne'ebé Estadu assume tiha ona;
- Sistematiza prosedimentus no regulamentasaun kona-ba Tratadus Internasionais no garante prezervasaun no divulgasaun dokumentus ne'ebé relasiona ho assinatura Tratadus Internasionais, Akordus, Memorandus de Entendimentu no Protokolus, hodi identifika no promove entidade depozitória ba dokumentus sira ne'e;
- Aprova estatutu no hametin liu tan Institutu Estudus Diplomátiku, núdar entidade privilejiada ba formasaun diplomatas no profisionais, inklui mós oficiais hosi setor defesa no seguransa;
- Dezenvolve planu formasaun kontínua ba rekursus humanus iha Ministériu dos Negócios Estranjeirus no Kooperasaun, inklui mós reforsu iha kompeténsia iha línguas nasionais no estranjeiras;
- Kontinua prosesu rasionalizasaun (katak hamenus) no redimensionamentu (katak bele haklot) ba misoens diplomátikas no konsulares iha estranjeiru;
- Hadia no atualiza portal Ministério Negócios Estranjeirus no Kooperasaun, inklui mós ható'o ba públiku informasaun ne'ebé promove país no facilita konhesimentu no asesu ba áreas interese nasional nian;

- Produz no fahe ba representasaens diplomátikas tomak, materiais promocionais (atu promove) kona-ba ita-nia País, hodi atrai investimentu, komérsiu no turismu mai Timor-Leste.

6.12 Komunitade Timor-Oan iha Estranjeiru

Governu empenhadu atu hametin lasu ne'ebé bele hametin ita nia kompatriotas sira iha estranjeiru. Ita entende katak, apezarde sirkunstánsia la hanesan ne'ebé bele halo timor-oan barak husik hela ita nia rai hodi ba buka seguransa no kondisaun vida ne'ebé diak iha rai seluk, ne'e fundamental tebes katak ita mantein nafatin, no se bele karik hametin liu tan, lasus ne'ebé liga timor-oan tomak iha estranjeiru ho Repúblika Demokrátika Timor-Leste. Ita nia kompatriota sira iha estranjeiru sai meu diak ida hodi halo promosaun ida ba ita nia País iha estranjeiru.

Foin dadaun ne'e, liuhosi proposta Governu nian, Parlamentu Nasional aprova ona lejislasaun ida ne'ebé permite ba ita nia kompatriota sira iha estranjeiru hodi halo inskrisaun ba resenseamentu eleitoral, hodi hare'e sira nia partisipasaun iha ita nia prosesu eleitoral ne'ebé hala'l iha tinan 2017 no 2018.

Partisipasaun polítika, aleinde sai núdar direitu fundamental ne'ebé rekonhesidu ba sidadaun timor-oan tomak, hanesan mós instrument importante ida hodi hametin ligasaun ita nia konsidadaun sir aba iha ita nia Komunitade Nasional.

Governu determinadu tebes atu kontinua promove medidas ne'ebé bele apoia ba ita nia kompatriota sira ne'ebé hela iha estranjeiru no hametin liu tan nia ligasaun ho Timor-Leste, nune'e, propoin atu hala'o tarfeas hirak tuir mai:

- Aprova leis ne'ebé permite atu aseguira prestasaun servisu públiku ba sidadaun timor-oan iha estranjeiru, liu hosi Embaixadas no Konsuladus Repúblika Demokrátika Timor-Leste iha estranjeiru;
- Hametin meus hirak ne'ebé iha Embaixadas no Konsuladus Repúblika Demokrátika Timor-Leste nian iha estranjeiru hodi fo'o prestasaun servisu kona-ba rejistus no notariadu ba sidadaun sira ne'ebé hela iha rai liur hosi teritóriu nasional;
- Hatama mekanismu hodi apoia no protesasaun Konsular ba sidadaun timor-oan ne'ebé hela iha estranjeiru;
- Hadia mekanismu hodi fahe informasaun ba comunidade timor-oan iha estranjeiru, ne'ebé relasiona ho vida no ho interesse ita nia Nasaun.